

ASO TOONAI, 27 FEPUARI 2021

Na nofoia e le Sui Fofoga Fetalai le Nofoa i le itula e 2:12 i le afiafi e tusa ai ma Tulafono Tumau 27(1).

Tatalo.

SUI FOFOGA FETALAI: Ou te faasilasila atu ua toe amatalia nei Tualumaga a le Fono Aoa Fautulafono.

E avea foi lenei avanoa e toe faafeiloai ma faatalofa i le paia maualuga o le Maota. E le mafai lava ona ou alulua, e ao ona afe ma momoli le faamalo i lau Afioga i le Palemia ma le Aiga Kapeneta, malo le usufono, malo le taumafai mai. E faapea foi i a outou Afioga i Minisita Lagolago a o lea foi Itu o le Malu, faafetai tele mo lenei aso. E i ai le manatu e i ai foi tuatuaanoa ma tuatuagia, a o lea lava ua taumafai mai talu lo outou fia tautua i lo tatou atunuu e ala i tofiga ua valaauina ai a outou Afioga.

Ia, le paia e o Ofisa Sili o Pulega o Matagaluega a le Malo, malo le onosai mai. E taua tele lo outou auai aua tualumaga o le tatou Galuega.

Ia, le tapuaiga Samoa, o oe lava o le ao mamala, tapuai maia ma le manuia se i alo Taitai o lou atunuu e filitagaga ae saili mafua aua ni manuia o si o tatou atunuu.

TUUIINA ATU O PEPA

Na tolaulauina e le Failautusi le Faasologa o le Tuuina atu o Pepa e tusa ai ma T.T.49(2).

1. P.P.2020/2021 Nu.138, Lipoti Faaletausaga a le Matagaluega o Fesootaiga ma Faamatalaga Tekonolosi 2019/2020.

**TULAFONO TAU FAAOFI O LE FAATATAUINA O TUPE
FAAOPOOPO (NU.1) 2020/2021 – felafolafoaiga faaaauau i luga
o le faitauga faalua – Aso 27**

FOFOGA FETALAI: E tolopo Galuega a le Fono Aoao i le po anapo ua maea ona saunoa le Afioga i le Minisita o Tiute ma Tupe Maua, faapea foi le Matagaluega o Leoleo ma Falepuipui ma le Ola Toefuataina. O lea la ua oo mai le faasologa i lau Afioga i le Minisita o Tupe. Ou te tapa ai lau Afioga ma le faaaloalo, tulai mai mo lau lauga e te talifuaitau i mataupu sa laga i lauga a sui usufono o le Palemene. Lau Afioga i le Minisita o Tupe.

Afioga Hon SILI EPA TUIOTI (Minisita o Tupe): Lau Afioga i le Fofoga Fetalai ma le mamalu i sui usufono o le Palemene, e lagona le agaga o le faafetai ua tatou aulia mai Fonotaga faaiu o lenei Paeaiiga Lona XVI a le Palemene o Samoa, a o lo o malutia pea si o tatou atunuu i aao alofa o le tatou Matai Sili i le Lagi. Ua malo afua ailao ua maua i Lona alofa ma Lona agalelei faasoa ua Ia taitaiina mai ai le soifua o lana Palemene e faatino tiute ma faiva o le valaauina ua Ia tofofi ai Taitai o le atunuu, mai lava i le amataga o lenei Paeaiiga i le tausaga 2016 e oo mai i le taimi nei.

Lau Afioga i le Fofoga Fetalai, ou te faatulou ma faatalofa atu i le paia maualuga o le Palemene ua potopoto, i le afio o lau Afioga i le Fofoga Fetalai o le Maota o Taitai o Samoa, afio lau Afioga i le Palemia ma Minisita o le Kapeneta, afifio Minisita Lagolago, Taitaifono o Komiti Faa-Palemene ma sui usufono mamalu o le Palemene o Samoa.

Ou te faatalofa atu foi i vasega o Ofisa Sili o Pulega ma Ofisa Sinia o Matagaluega ma Faalapotopotoga a le Malo o lo o tatou auai faatasi i Fonotaga uma a le Palemene, aemaise le Afioga i le Failautusi o le Fono, le aufaigaluega galulue faapea malu o le Malo o lo o faamoemoe i ai le puipuiga ma le saogalemu o Taitai o le atunuu i lana Fonousu i Tiafau nei.

Liliu alo o le lupe, ou te faatulou atu foi i le tapuaiga a Samoa i ona tulaga faalupe i Aiga ma latou Tama, faapea le usoga a Tumua ma Puleono i Salafai.

Ona o lo o ufitia le Palemene nei i le ao pogisa ona o le valaau paia a le Atua i se tasi o sui usufono o le Palemene, le Afioga ia Vaafusuaga Toleafoa Ken Poutoa, ou te fia momoli atu faamaisega i le faletua ma si o la alo, aiga aemaise foi lona itumalo o Lefaga ma Faleaseela. Ia manuia lau malaga Vaafusuaga ma ia maua sou nofoaga mau i le lagi faatasi ma lo tatou Matai Sili.

Lau Afioga i le Fofoga Fetalai, faafetai ua maua le avanoa e faamalamalamaina ai nisi o mataupu sa laga e sui usufono mamalu o le Palemene e tusa o le Tala Faatatau Faaopoopo (Nu.1) o le Tupe 2020/2021 ua i luma o le Laulau a Fono a le Palemene faatasi ai ma

mataupu e tusa o matafaioi o lo o ou tauaveina nei, o le Minisita o Tupe e nafa ma tulaga tau le tamaoaiga o Samoa.

E tomua sau faamatalaga, ou te toe fia talanoa i le tulaga o i ai le tamaoaiga o Samoa, e le gata i le taimi nei, ae faapea tausaga o muamua.

O le tausaga faaletupe 2019/2020 lea faatoa maea ia Iuni o le tausaga na tea nei 2020, sa i ai le talitonuga e avea o se tausaga e aupito siitia maualuga ai le tamaoaiga o le atunuu, ona o le tele o galuega ma atinae tetele sa faatinoina ai e le Malo, aemaise o taligamalo tetele sa feagai ma le atunuu e aofia ai taaloga faava-o-Malo a le Pasefika ia Iulai 2019 sa faimalaga mai ai le faitau afe o tagata taaalo ma o latou aiga e tapuaia a latou tausinioga. O ni vaaiga faagalogata le lagolago malosi o le atunuu e talisapaia le faamoemoe aemaise o le tele o le manuia na sasaa mai i lo tatou atunuu e pei o faletalimalo sa faatumulia uma ai, o faleaiga, faletaavale, pisinisi faatau meataulima ma le tele o isi atinae sa manuia ai lenei taligamalo. Ae peitai, e leai se isi na te iloa pe silafia foi mea o le a tutupu, e pei ona afea ai e lo tatou atunuu e le misela o le 2019 ma le Koviti o lo o faaauau pea ona aafia ai le lalolagi.

Ina ua faaiuina le tausaga faaletupe, sa faamauina le pau o le tamaoaiga i le 3.2% ona o aafiaga tuga i le vaega maoti o turisi lea o lo o avea ma se tasi o poutu o le tamaoaiga faatasi ai ma aafiaga i le tulaga tau fefaatauaiga ina ua faamalosia tapu ma vavao i maketi o lo o faatau atu i ai a tatou oloa ma galulue ai le tele o tama fanau i Samoa. E le i faatali lo tatou Malo ina ua maua tala ua aafia so o se vaega o le kelope i le faamai pipisi o le Koviti. Sa faatino loa galuega talafeagai e faamalosia ai le puipuiga o si o tatou atunuu e taofia ai le oo mai o lenei faamai i Samoa nei.

Lau Afioga i le Fofoga Fetalai, e le faigofie, ma e le taugofie foi nei galuega o lo o faatino pea e o tatou muaau pito i luma aua le puipuiga o Samoa. E matau foi ma le popole i taimi uma le saogalemu o le aufaigaluega ua tuuina atu lo latou ola ma le soifua e tautuaina ai le atunuu i nei galuega faatino. E faitau miliona tala tupe a lo tatou Malo o lo o faaaluina ai nei e faatau ai meafaigaluega ma laei faapitoa o le aufaigaluega, totagiina ai le faanofoesea o tagata Samoa ua toe faimalaga mai, aemaise tapenaga moomia e lagolagosua ai i galuega a le Komiti mo Faalavelave Tutupu Faafuasei.

Lau Afioga, ua ou taua lea vaega ona o lo o fesiligia pea e nisi po o le a le galuega a le Malo o lo o faatino, e tali atu ai i aafiaga o le faamai pipisi o le Koviti-19. Ou te toe fia taua foi fesoasoani faamamaavega tuusao, stimulus packages e 2 lea sa faalauiloina e le

Malo ia Aperila ma Iuni o le tausaga 2020, lea sa faatauina ai se vaegatupe tuufaatasia e latalata i le \$150 miliona.

E pei ona silafia, e 5 vaega autu o lo o ave i ai le faamuamua ma le faamamafa a le Malo i nei fesoasoani e aofia ai, muamua, o vaegatupe faapitoa mo le puipuiga o Samoa mai le faamai pipisi o le Koviti-19 po o le health and medical responds. 2. Fesoasoani mo tagata taitoatasi o le atunuu, household assistance. 3. Fesoasoani ma faamamaavega mo pisinisi tumaoti o lo o faamoemoe i ai le tamaoiga ma maua ai galuega a le toatele, po o le support for the private sector. 4. Tapenaga ia lava meataumafa, le food security ina ia aua ne i aafia Samoa i mala o lo o feagai ma nisi o atunuu, ua matelaina le toatele ua leai ni meataumafa. E pei ona matauina foi i televise laina taavale uumi a i latou o lo o faalagolago i fesoasoani ma meataumafa maua fua. Ia ma le 5. Fesoasoani faalauaitale mo isi vaega maoti e aofia ai aoga, atinae ma agafesootai mo nuu ma alaafaga, fesootaiga ma auaunaga faamuamua mo le saogalemu. O le a ou auililiina atu nisi o vaega tetele ua mafai ona fesoasoani ai lo tatou Malo ina ia faaititia ai afaina o le Koviti i le atunuu faapea. 1. Ua matauina i le taimi nei le tele o taumafa, e le gata i fua o faaeleeleaga o lo o maua i totonu o le atunuu, ae ua tele foi oloa mai fafo o lo o maua i so o se taimi. Sa faamatuuina atu e le Malo fesoasoani i atinae tau faatoaga i ana polokalame faamama avega e 2, ina ia aua ne i oge le atunuu i meataumafa i so o se taimi. O lea foi ua amata fausia fale ma masini e gaosi ai oloa Samoa mo le faamoemoe ia siitia ai oloa ma taumafa gaosi, e le gata ina maua ai pea taumafa ae siitia ai pea pisinisi i totonu o le atunuu ma maua ai avanoa faigaluega.

Ua siitia maua i nei le penisione a nai tagata matutua i le \$160 i le masina mai le \$145 i le masina sa i ai muamua. Ma e faaopoopo i ai auaunaga eseese e pei o femalagaaiga i le va o Upolu ma Savaii, ia faatasi ai foi ma togafitiga ma vailaau i falemai o lo o agavaa i ai i latou ua ausia le 65 o le soifua. O lona uiga, a faapea o se tagata penisione e malaga mai Savaii mo Apia faa-lua i le vaiaso toe faaopoopo i ai ma ni siaki faa-fomai, togafitiga faapitoa ma faataotolia i Motootua ina ia toe faafoisia vave le malosi faapea vailaau ma fualaau o lo o totonu uma e le tatou Malo, e le taumate le oo atu i le \$1,000 i le masina e tasi le faamama avega a lo tatou Malo.

O lea foi ua le tasi a ua lasi ona faasafua atu tupe mama a le Faalapotopotoga mo Faaputugatupe mo le Manuia o Tagata, le NPF i tagata faisaofaga, lea ua maea tuuina atu ia tupe faasili po o dividend cash payouts e 1.1% lea na totonu atu ia Tesema 2019, sa faaalu ai le vaegatupe e \$7.8 miliona. O le 5% lea na tuuina atu ia Iulai i le

2020, na tuuina atu ai le vaegatupe e \$35.5 miliona, ia ma le 1.5% ia Novema 2020 e \$10.6 miliona na faaaluu ai, ma le isi vaega o totoe e 1.5% i le masina o Mati i le tausaga nei, o le a faaaluu ai le vaegatupe e \$10.6 miliona i le tausaga.

I lona aotelega, o le sao atoa o le NPF i le tamaoaiga o Samoa e auala atu i tagata fai saofaga o le Faalapotopotoga, e \$64.5 miliona i lenei vaitau a o feagai ai ma le Koviti-19. Ua fausia maota ma laoa i faiga paaga ma le ADRA mo aiga o lo o matauina le le saogalemu o nofoaga o lo o faamautu ai faatasi ma le ono aafia gofie i faamai pipisi ona o siosiomaga o lo o nonofo ai.

I le tuusaunoaina o tiute i taumafa mo oloa moomia i aso uma lea sa saunoa i ai le Afioga i le Minisita mo Tupe Maua i le po anapo. O se tasi lenei o faamama avega sa manuia uma ai le atunuu ina ua faaitiitia tiute i luga o meataumafa e moomia mo le fofoga taumafa i aso uma, ma e le taumate foi lona fesoasoani tele ia i latou sa faamalolo mai galuega ina ua amata aafia atinae o turisi i le tausaga na tea nei. Sa faaitiitia foi le tau o le suavai ma le eletise mo tagata taitoatasi faapea pisinisi tumaoti, ina ua faatino a tatou faamama avega e lua i le tausaga na se i mavae atu nei. Sa tauave foi e le Malo i le vaega muamua o le stimulus package le 2% o le tului mo le 3 masina mo nonogatupe a tagata taitoatasi.

Ou te fiafia e faailoa atu e 11,799 tagata taitoatasi lea na maua lenei package ma faaaluuina ai le vaegatupe e \$2.3 miliona. Sa totogiina foi e le Malo le tului o nogatupe a paaga uma o Faletupe o Atinae Samoa po o le Development Bank of Samoa mo le 3 masina o le tausaga lea sa faamanuiaina ai le toa 2,290 ma faaaluu ai le vaegatupe e \$1.9 miliona. Ua faasolo foi i le taimi nei se tasi o polokalame e fesoasoani ai i atinae tau faatoaga mo le malupuipua o meataumafa o le atunuu faapea polokalame tau faatoaga e auala atu i se fesoasoani tupe e \$4 miliona e faaaogaina ai le Faletupe o le Atinae o Samoa. Sa faapafala foi totogi o nogatupe ma tului o nogatupe mo paaga o le Faalapotopotoga o Fale o Samoa, Samoa Housing Corporation, ma e toa 2,723 i latou po o aiga sa fai nonogatupe sa faamanuia ai. O lea fesoasoani e tele se vaegatupe ua le mafai ona aoina ma e le Pulega i le naunautaiga e tuu atu le tauau i le atunuu a o feagai ai Samoa ma luitau o le faamai pipisi. O lea ua siitia maualuga le fesoasoani mo aoga uma o le atunuu e ala i le \$18 miliona mo le one government grant. E \$3.6 miliona ua siitia ai lenei fesoasoani e pei ona i ai le \$14.4 miliona i le tausaga ua mavae atu. Ma o se polokalame na amata mai e le Faigamalo a le HRPP i tausaga ua tuanai e saga uunaia ai aoga a le fanau. O lo o i ai foi se vaegatupe faapitoa e faaleleia ai apitaga mo le aufaigaluega a le Matagaluega o le Soifua Maloloina i nuu ma afioaga i tua, o se fesoasoani ua faamalositia ai le

auaunaga tau soifua maloloina ina ia maualuga lona faatinoga i so o se alaafaga o lo o i ai maota gasegase mo le tautuaina o le atunuu.

Siitia o fesoasoani mo atinae i nuu ma afioaga e aofia ai polokalame a le Matagaluega o Tina i falelalaga faapea le toe faatuina o komiti tumama i afioaga uma i totonu o le atunuu. O nei komiti tumama o le a uunaia ai atinae a afioaga taitasi, faataua ma faamalositia ai le feau ia tumama i totonu o aiga aemaise fanau laiti e pei ona faia i tausaga ua tuana'i, aemaise o se nofoaga tutotonu e faatino ai polokalame a le Malo e aofia ai tuiga a le fanau, le immunization programmes i tulaga masani sa outou soifua ma o tatou ola ai i tausaga e tele. O lea foi sa faaogaina le resitalaina o tagata Samoa uma ma faaogaina atu i ai se fesoasoani tuusao e \$50 i e na mafai ona resitala i lenei faamoemoe. O lenei fuafuaga pe a tino mai, e tele lona aoga e pei ona faatauaina ai faamatalaga ma faamaoniga o tagata taitoatasi e tapenaina ai atinae tetele ma fesoasoani tuusao a le Malo i le lumanai.

E fia faaleoina foi se tasi o fesoasoani taua a lo tatou Malo, lea ua faamatuu atu ai vaegatupe e fesoasoani i auaunaga e faatino i nisi o paaga a le Malo, o faalapotopotoga i tua atu o le Malo po o NGOs. E aofia ai le nofoaga i Mapuifagalele, Loto Taumafai, Nuanua o le Alofa, Goshen Trust, Samoa Cancer Society, Samoa Victim Support, Faalapotopotoga a le Agabe Nursing Association ma le tele o isi faalapotopotoga o paaga a le Malo o lo o tuu mai le agaga fia fesoasoani i faamama avega i galuega tauave a le Malo o lo o manuia ai le atunuu, aemaise o se fesoasoani i lenei vaitau faigata.

Lau Afioga, e tele foi fesoasoani ma galuega laveai a le Malo ua tuuina atu i pisinisi tumaoti faapea a latou tagata faigaluega, a o feagai ai ma le luitau tetele o lenei vaitau. E pei ona silafia e lau Afioga, o le faigapaaga a le Malo ma le vaega o pisinisi tumaoti po o le private sector ua autausaga talu ona faavaeina ma ua tuu atu foi le tauau o le Malo e fesoasoani i atinae nei o lo o faamoemoe i ai le atunuu i lo latou faalupega, o latou e uunaia malosi le tamaoiga po o le private sector is the engine of growth. O le fesoasoani a le Malo e aofia ai le faatino lea e le Malo o fesoasoani mo i latou ua leai ni galuega e ala i aoaoga faapitoa o lo o faafoeina e le Iunivesite Aoao o Samoa ma le Aoga Matata Esee o le Australian Pacific Training Coalition po o le APTC e tapena ai i latou uma nei i le lumanai pe a toe tatala faigamalaga ma toe foi i galuega masani. E 699 i latou ua resitalaina ma faamanuiaina i lenei polokalame. Ua maea faamatuu atu foi e le Malo fesoasoani faapitoa, unemployment benefits mo le sili atu i le 2,000 tagata ua leai ni galuega, faapea i latou ua faaitiiti itula faigaluega, ma e agai se vaega tele o lenei fesoasoani i le atinae tau turisi.

E i ai foi i latou e sili atu ma le 200 ua saofaga i polokalame a le Malo e auala atu i le Matagaluega o Faatoaga, e faaoga ai i latou ua leai ni galuega e toe totoina laau ua ave i ai le faamamafa a le Malo e pei o le koko ma le popo. O le a faaauuina foi lenei polokalame ina ia uunaia malosi ai atinae tau faatoaga ma maua ai avanoa faigaluega mo le toatele. Ua maea faatino foi le fesoasoani faamama avega e totogi e le Malo le tului e 2% mo le 3 masina mo nonogatupe a pisinisi tumaoti e 1,665 i faletupe o pisinisi e 4 ma faaalu ai le vaegatupe e \$3.1 miliona mo lea fesoasoani. Ua tuuina atu foi le faamama avega i pisinisi tumaoti mo oloa e auina atu i fafo faapea le tuusaunoaina o nisi o totogi ma lafoga ina ia fesoasoani ai i pisinisi.

Fesoasoani e ala i le faapafala lea o totogi o lisi mo se vaitaimi i maota ma ofisa o le Malo e pei o le NPF, ACC, Malae Vaalele i Faleolo ma le Uafu i Matautu, Maketi i Fugalei, Savalalo, Vaitele ma Salelologa ma isi fale o le Malo o lo o faamautu ai nisi o pisinisi tumaoti.

O se tasi o fesoasoani tele a le tatou Malo i pisinisi ma atinae tau turisi, o le faaogaina lea o faletalimalo e faanofoesea ai le faitau afe o tagatanuu o Samoa ua toe foi mai i le atunuu talu mai Me o le tausaga na tea nei. Mo le silafia, e \$6.3 miliona ua maea faaaluina i faletalimalo e tele o lo o faaogaina e le Malo ae le aofia ai le \$3 miliona ua faamautu atu i nofoaga o lo o tuuina atu i nofoaga o lo o tau faasoasoina ai le atunuu femalagaai ua toe foi mai i Samoa nei. O se fesoasoani tele lenei ua tuuina atu e le Malo, e le gata ina ia maua ai pisinisi a nai faletalimalo i lenei vaitau, ae ua atagia ai foi le naunautaiga o le Malo e malupuipua Samoa i taimi uma.

E ao pea ona ou taua fesoasoani eseese a le Malo o lo o lagolago malosi e le gata i pisinisi tumaoti, ae faamamafa lava i le uunaia o le atinae o turisi i tausaga taitasi. Lau Afioga i le Fofoga Fetalai, e oo atu i le \$13 miliona le tupe faaagaaga i tausaga taitasi e faatupeina ai auaunaga faalauiloa a Samoa i maketi i atunuu mamao faapea ma galuega tauave masani a le Pulega o Tagata Tafafao Maimoa Mai Fafo. E ese mai i nei vaegatupe tuusao, e tele galuega ma atinae a le Malo o lo o auala atu ai fesoasoani i le atiaaina o le turisi ma e auiliiliina atu e faapenei.

Muamua, o le fausia o se siosiomaga talafeagai e siitia ai auaunaga mo pisinisi tumaoti faapea atinae tau turisi, po o le conclusive environment for private sector development e aofia ai atinae nei, fausia ma faaleleia auala tetele a le Malo e agai atu i Faleolo ma le itu i sisifo. Auala i le itu i sasae e maimoaina ai mataaga faapea auaunaga mo faletalimalo i lea vaega o le atunuu. Faaleleia eletise ma suavai mama i so o se tulimanu o le atunuu. Faaleleia ma siitia auaunaga tau telefoni ma fesootaiga mai so o se vaega o Samoa.

Faaleleia malae vaalele ma uafu mo feamalagaaiga a tagata tafafao maimoa mai fafo faapea le auina mai o oloa moomia mo le auina atu o a tatou oloa mo maketi i atunuu mamao. Faatutu faailoilo o auala i le taulaga ma faasolosolo atu i afioaga i tua faapea le faaigoaina o maota ma laoa ina ia faafaigofie ai femalagaaiga o aso uma faapea le maua o avanoa e atiae ai pisinisi e faaaogaina ai telefoni ma tekonoosi faaneionapo.

2. Ua i ai foi le Kamupani vaalele o le Samoa Airways e fesoasoani e faataugofie ai pasese ma maua ai nofo faaopoopo e mafai ona malaga ai turisi i lo tatou atunuu. Mo le silafia mo lenei taimi, o lo o fai pea ia feutagaiga a le Kamupani a le Samoa Airways ma latou e lisiina mai vaalele, ina ia faapena ona vaai i le tulaga i le taimi ma mea e tatau ona sau ai. Aua a aumai i le taimi lenei, o lona uiga e na o le tutu o le vaa i luga o le malaevaalele ae leai se tupe e maua ai. O le tulaga lea, o lo o fai pea sailiiliga ina ia tau vaai i ai i le faaiuga o lenei tausaga pe afai e mafai ona tatala mai tatou borders.

Ua fausia foi le Falemataaga, Museum faapea nofoaga faapitoa mo maimoaga faapea sauniga faapitoa Apia City Lookout e faaopoopo i auaunaga eseese, e tosina mai ai turisi i Samoa nei.

O le faaleleia o vaa mo femalagaaiga i le va o Upolu ma Savaii, faapea Samoa ma Amerika Samoa. O le aso ananafi sa matauina ai le taunuu mai o le vaa lea mai Ausetalia. O le a fealuai i le va o Mulifanua ma Salelologa. O le vaa foi e saogalemu ma e ese le mea e nonofo ai le pasese ese le mea e tu ai taavale. Ae faafetai i le Minisita o Atinae tetele, o latou na sa taumafaia lenei atinae. Ma o se faaopoopoga lelei ia maua ai le saogalemu o tatou femalagaaiga.

O le poloketi e toe faamatagofie atoa ai le taulaga i Apia, po o le Apia Waterfront. E ono uunaia oloa e fausia ma gaosi i totonu o Samoa, e le gata ina taugofie mo tatou tagata ae maua ai foi galuega a le toatele.

O se toe faatepa lena lau Afioga ma sui mamalu o le Palemene nei, i nisi o atinae ma poloketi tetele o lo o taumafai i ai le Malo e siitia ai le tamaoaiga, emaise le lagolagosua i atinae tau turisi ma pisinisi tumaoti. Ma e tatau ona toe faailoa ina ia manino ma malamalama ai le atunuu, o lo o faaauau pea fesoasoani a le Malo mo vaega uma o le atunuu.

Lau Afioga i le Fofoga Fetalai, a fua i vaega ua ou taua i luga, o foliga vaaia ia o se atunuu o lo o malosi ai taitaiga lelei, strong leadership, ma atagia ai le ave o le faamuamua i ona tagata. E le taumate foi le mafuaaga o le malosi o le lagolago mai ma le faatuatuaga a paaga, lea o lo o tatala mai ai pea fesoasoani i taimi uma. I luga o le talitonuga o lo o lelei faafoeina tupe o lo o tuuina mai e lo latou Malo, ma o lo o mulimulitai foi Samoa. I taitala o

pulega lelei faapea pulega manino ma malamalama, transparency, accountability and principle of good governance. E taua tele le tatou faigapaaga. E tatou te taumafai lava ina ia faapena ona tatou mulimulitai i faiga faavae ma le lipoti atu i a tatou paaga. O i ina o lo o malosai ai pea lo latou lagolago mai ona e le o faaletonu i tatou i le tali atu i manaoga o i latou.

Lau Afioga i le Fofoga Fetalai, o le masina o Ianuari o le tausaga nei, sa faatino ai se suesuega faapitoa a le Faalapotopotoga o Faaputugatupe a le lalolagi po o le International Monetary Fund Article for Consultation, e mataituina ai le tulaga o i ai le tamaoiga o Samoa. O lea suesuega e tai-lua pe tolu tausaga faatoa faatino e le tele o atunuu o le lalolagi. Ae peitai o Samoa o lo o faatino ia sailiiliga i tausaga uma. O le uiga o lenei faamatalaga e faatauaina e Samoa ana faigapaaga ma Faalapotopotoga tetele o lo o mataituina le tamaoiga o le lalolagi. Ma o se faailoilo taua foi e faamaoni ai le faaaliga a le Malo, e leai ni gaoioiga faalilolilo po o ni faamatalaga o le tamaoiga ua tuulafoai, ona faatino e Matagaluega o lo o gafa ma le tamaoiga o Samoa. Ua maea nei lenei galuega ma ua faailoa mai i lenei suesuega le ono faaitiitia o le tamaoiga o Samoa, i le 7.8% mo le tausaga faaletupe o lo o faagasolo nei 2020/2021. O lea ua toe 4 masina o totoe ona faaiu lea.

Lau Afioga i le Fofoga Fetalai, a fua lenei faailoilo i le tele o atunuu o le lalolagi aemaise le Pasefika, lea e i le va o le 10% agai atu i le maualuga e 21% lea ua pau maualalo ai le tamaoiga o le Malo o Fiti, e le tataua ona faapopoleina le atunuu. Ona o lo o faatino uma lava e le Malo gaoioiga talafeagai, e sapaapaia ai si o tatou tamaoiga i lenei vaitau o faigata. O le toatele foi o atunuu o le Pasefika, ua matua maualuga lava le pasene o i latou ua leai ni galuega. E le gata i le vaega o turisi, ae faapea le lautele o le atunuu e faatasi ma Matagaluega a le Malo. Ona o le tulaga faaletonu ua feagai ma o latou tamaoiga. O nisi o atunuu o le Pasefika, ua na o nonogatupe lava mai fafo o lo o faalagolago ai le tamaoiga atoa. Ma e le faatusaina i le tulaga o lo o i ai Samoa, lea o lo o maua pea tupe e faagaoioi ai le Malo ma okaina mai ai oloa mai fafo mo manaoga o aso uma. I faamaumauga a lenei suesuega ua maea, o le toe fetuunaiga o le tamaoiga o Samoa, ua faavae i mafuaaga nei. 1. Tuai ona faatino nisi o atinae tetele ona o mafuaaga le maalofia e aofia ai le vavao o le puipuia ai o tatou tuaoi. E faapea luitau i le okaina mai o masini ma mea faigaluega i maketi o lo o aafia tele i faamai pipisi o le Koviti-19. 2. Aafiga lautele o le tamaoiga i lologa sosoo e lua, i le masina o Tesema 2020. O lea ua faamauina le oo atu i le \$71 miliona le tau atoa o atinae sa faaleagaina faapea galuega sa toe faamamaina atoa o le taulaga. 3. O le le mautinoa o vaitau e mafai

ona faasopolia ai vailaau ma tui puipua po o le vaccines, o le Koviti-19, lea e faamoemoe ai le toe tatalaina o a tatou femalagaaiga ma atunuu o lo o faamoemoe ai lo tatou tamaoaiga aemaie le atinae o turisi.

Lau Afioga i le Fofoga Fetalai, e lagona lava le agaga o le faafetai ma le mafanafana i le faaiuga ua taunuu i ai lenei suesuega. O lea o lo o manaino ai le tele o le sao o a tatou faamama avega, e 2 lea na faia. Sa faatino, lea ua taua e le IMF ua faaitiitia ai aafiaga o le Koviti-19 o le tamaoaiga o Samoa, ma fesoasoani ai i tagata aupito i mafatia, the most vulnerable. Ua latou lagolagoina foi taumafaiga a le Malo e uunaia atinae tetele. O lea ua mafai ona maua ai galuega a le toatele mo le tausiga o aiga ma saga uunaia ai pea ma faataamilo ai le tamaoaiga i le taimi e matuai moomia ai gaoioiga faapenei. O lea foi ua atagia i le suesuega a le Faalapotopotoga a le IMF, le toe vave faafoisia o le tamaoaiga o Samoa i se tulaga malosi i totonu o le isi 2 tausaga o lumanai. O lo o fai ma le talitonuga maumaututu nei valoaga, o lo o lelei tapena ma ua maea faataoto e le Malo mo le isi tolu i le lima tausaga o lumanai. I le tulaga tau tupe o fefaatauaiga po o foreign reserves, o lea ua taoto a taoto a tatou tupe faaagaga mo fefaatauaiga i se tulaga malosi tele, e lei vaaia muamua. Ma o le a ou tautala faamalamalama i ai i vaega o lo o mulimuli mai.

SUI FOFOGA FETALAI: Malie lau Afioga i le Minisita o lo o saunoa, se i tuu atu le avanoa i le sui usufono mo Faleata.

Tofa Lealailepule Rimoni Aiafi (Faleata Sisifo): O le mea muamua lau Afioga, ona o lea e le o malamalama tele lou sui i le upu lea e te faaogaina o le IMF, lea na faia nei le suesuega lea ua i ai le tulaga tau tupe a Samoa ma lona tamaoaiga. E po o le a lea mea e tau o le IMF? faamolemole lava. Ona e fia iloa e matou ia mai tua. O lona lua, o lea ua e saunoa i le poloketi mulimuli, le vaa fou lea o le a aumai mo Salafai. O lea ou te manatua na aumai le vaa lea e i ai nei, o lea ou te i totonu o le Palemene. O lona uiga e le o umi tele le vaa lea i inei, a o lea o le a toe aumai le isi vaa. Ona o lea ou te le o manino, po o le a la le tele o lea vaa. O lea ou te tau faalogo fai mai e eseese mea e tuu ai taavale ma tagata. O le a le tele o le vaa fou lea o le a aumai? Ae o le a foi le tau? O lona uiga la o le a matua faigofie ma atili ai ona lelei le motu o Salafai. Pe mafai ona faalatele laititi e lau Afioga aemaise la, afai la o le IMF po o a ea lea mea e fai ai le suesuega lea. O lona uiga o tagata popoto faapitoa mai fafo, e avea uma lava tupe a le lalolagi ma tau i le lalolagi, o Samoa o le tulaga lea o lo o i ai. E fia maua lava se faamalamalamaga. Faafetai.

SUI FOFOGA FETALAI: Ia se i tulai mai le Minisita o Galuega tetele. E masalo e maua le fesoasoani.

Susuga Hon Papaliitele Niko Lee Hang (Minisita mo Galuega, Felauaiga ma Atinae Eseese): Ia faafetai mo le avnoa, e le i tali atu le Minisita o Tupe i le IMF, sa ou faapea lava au ua leva ona silafia e le sui mamalu le IMF, a o le tulaga i le vaa o lea e i details uma o le vaa lau Afioga. Ae se i ta o e inu le ta ti ona faasino atu lea o le vaa lea. E leaga ua uma foi ona faamatala muamua, a o lea foi o lea toe faamatala atu. Ae e te le i laga i sau lauga le vaa. Faafetai.

SUI FOFOGA FETALAI: E ese le taua foi o le fesili a matou ia o sui mai Savaii, taatia ia la le..ae o le mea sili ua taunuu le vaa mo Salafai.

Tofa Lealailepule Rimoni Aiafi: Atonu o lea na ou fesili i le Afioga i le Minisita o Tupe, ona e fia malamalama matou mai tua i le IMF, aua e le o malamalama tele tagata po o le a lea mea e tau o le IMF. Ia tuu ia Lealailepule ia o lena tou te silafia. IMF, WEF, e iloa uma lava e Lealailepule, a o na i tagata la e faafofoga mai. Ia faamalulu atu i lau Afioga i le Minisita o Galuega, e sao sa e saunoa i le vaa lea. Ae le iloa lelei e matou, po o le a tonu lea ituaiga vaa. O se vaa fogafaletole, fogafalefa, aua o atinae tetele nei o la e fia faafofoga mai ai Samoa i mea ia e fai e tatou ma ave i ai le faamuamua aua o tatou tagata. Ae le o au lea ou te fia fesili, ae mo tagata la e faafofoga mai. Faamolemole lava

SUI FOFOGA FETALAI: Tapa lau Afioga i le Minisita mo Vaa o Samoa, e te saunoa e tali i le fesili lea?

Tofa Olo Fiti Afoa Vaai (Salega Sasae): Lau Afioga i le Fofoga Fetalai, se i...

SUI FOFOGA FETALAI: Olo, o le a le mea lea e tulai mai ai lau Afioga.

Tofa Olo Fiti Afoa Vaai: E tutusa lelei lava ma fesili ma Lealailepule,

SUI FOFOGA FETALAI: E leai, e le tatau ona e tulai mai. Se o le a toe fai atu foi. E te le i taua i lau lauga.

Tofa Olo Fiti Afoa Vaai: E leai se Tulafono tumau i le tulaga lena lau Afioga.

SUI FOFOGA FETALAI: O la e i ai. A le taua mataupu e ono laga e tali i ai le Malo...

Tofa Olo Fiti Afoa Vaai: Po o se vaa lapoa i te i ua alu atu toe paulia i o i le ava ia matou i Salelologa.

SUI FOFOGA FETALAI: Alala mai lalo Olo, faafetai. Malie le sui mamalu ua leva ona e i inei i le Maota. O lea e i ai le Tulafono tumau, e le mafai ona e toe lagalaga ni mea fou na o mea na lagalaga i lauga, lea e tali ai le Malo. O lea na laga i le lauga.... a lea e te au le pepa o lea e maua ai. E leai ma se mea na taua e Olo, e uiga i mea ia. O le mea lea o le toe tupu o lagona i le taimi o la e aumai ai fingalo, o la e taumafai le Malo e faamanino ma faamalamalama e le talafeagai. Malie le sui usufono.

Tofa Olo Fiti Afoa Vaai: E faamalulu atu i lau Afioga, e pau lava le mea o lou saunoa mai e le i taua i lau lauga. O le mea la lena, o lo o manino e leai se tulaga faapena faapea o le le taua. E pau lava le mea lea e i ai, sa ou lauga i le Tala Faaopoopo o le tupe a le tatou Palemene. O le ala la lena, e fou lava le mea lea e saunoa i ai..

SUI FOFOGA FETALAI: Ua lelei, o lea ua maua e le Nofoa. E i ai lou taimi e te...pe a oo i le taimi e faitau auiliili ai le tala o le tupe. E masalo a ou tuutuua nei i tua le faamatalaga lea, ona manumanu atu lea i lau Afioga. Ae malie, e le i taua i lau lauga ae faaauau pea le tali a le Malo. A lea na e faalogo ai lava. Tulai mai lau Afioga i le Minisita o Tupe e faaauau lau saunoaga e talifuaitau i saunoaga a sui mamalu, na lauga i le po anapo i mataupu ia tau tupe.

Saunoa lau Afioga e uiga i le vaa, ma aua le amanaia fua le mea lea ua tautala i ai le Nofoa.

Susuga Hon Papaliitele Niko Lee Hang: Se i tali muamua la le fesili a Olo. O la ou te faalogo faapea, ai o se vaa e alu atu foi paulia i Salelologa. E leai e le o se vaa tele Olo. O le vaa e fuafua mo tatou lava ava ia e i ai i le taimi lenei. E pei lava o le Express la e i ai, o le tulaga lena. A o le tali o le fesili a Leala, e le o se vaa fogafaletolu Leala le tatou vaa, na o luga lava o lea...e tai pei lava o le ata o le Express la e i ai. Ae pau lava le mea, e tele laititi le vaa toe saosaoa le vaa lea. E a, ua manaia lena tali?

Afioga Aliimalemanu Alofa Tuuau (Alataua Sisifo): Lau Afioga i le Fofoga Fetalai pe maua lava se avanoa.

SUI FOFOGA FETALAI: O le a tuu atu le avanoa i le Afioga i le Taitaifono, ona e i ai lona sao i totonu o le tala o le tupe lea.

Afioga Aliimalemanu Alofa Tuuau: Ia faafetai mo le avanoa. O lea sa taua i le lauga ona o lea sa i ai i totonu o fesoasoani tuusao mai le vaa lea i le va o Apia ma Tutuila. O lau fesili la, e ese le vaa lea i le va o Apia ma Tutuila, ese ma le isi vaa lea ua taunuu mai mo Mulifanua ma Salelologa? Faafetai.

SUI FOFOGA FETALAI: Se i tulai mai...o le faigofie ia... Ae saunoa.

Susuga Hon Papaliitele Niko Lee Hang: Ia faafetai mo le faafesili a le Taitaifono o le Komiti o Tupe.

SUI FOFOGA FETALAI: O le a toso ai le tatou galuega.

Susuga Hon Papaliitele Niko Lee Hang: O le vaa lea e faapea, o lea e fai e Iapani lea e alu i Tutuila, o le vaa lena e faameaalofa mai e Iapani e masalo e taunuu mai i le tausaga fou. A o le tatou vaa lea ua iinei i le taimi lenei, masalo o le Aso Faraile lea e fuafua tatou te o ai e vaavaai ma faapaia le vaa, o le Aso Faraile o le vaiaso fou. A o le tupe e faatupe lava e le Kamupani Vaa le vaa lea mai Ausetalia. Ma le faaaloalo lava.

SUI FOFOGA FETALAI: Ia faafetai. Se i tulai mai lau Afioga i le Taitai o le Maota.

Susuga Hon Tuilaepa Sailele Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi (Palemia): E oo loa i mea tau vaa, ona ou manatua lea o vaa sa feoai. E toetiiti lava atoa le 3 itula ae le i aumaia vaa ia mai fafo, 3 itula o faasusu atu i le sami. Ae tasi lava le agaga na fai ai fuafuaga nei e aumai vaa. Ua tupu le tatou tamaoaiga, ma ua toatele foi e faimalaga i Savaii ma i latou foi e faimalaga mai Savaii i Upolu nei. O lona uiga o lea mea, e na ona tau lava faapea o le vaa e malaga i Savaii. A o le vaa, o le vaa mo Samoa atoa. E toatele foi o tatou tagata e o atu iinei. Ma o le agaga lava lea ia vave ona malaga i Savaii, aemaise lava faalavelave o aiga. E le o se mea taumatea le vaai mamao lea, lea sa alu atu lava i totonu o le Maota lenei, le

tulaga o vaa e manaomia aemaise o vaa e tatau ona fuafua, o lea e lata mai le faiga palota. Ia faapea foi ma i latou e fia malaga i Savaii e palota ai toe foi mai. O le ala lena o lea e momoli ai le faamalo foi i le Minisita ma le latou Komiti, ua le faatali i le vaa lea sei maea. Ia le vaa lea e tapena mai e le Malo o Iapani. O le vaa tele lava, e pei o vaa tetele ia mai Iapani. A o le vaa lea, o le vaa e faaopoopo atili i tatou femalagaaiga. Sa ou faapea e le tau fesili foi i latou nei, e taufesili i le vaa ona o lea e tupu le tatou tamaoaiga. Ma e oo mai i le taimi lenei, o le isi lea mataupu o lo o lagalaga, ona o tapu ia a le Malo e fai nei, ina ia tatala ia le saolotoga o vaa, i le taimi lenei ia Aso Sa. Ma o le mea moni lava, o le toatele o i tatou nei e o atu i Savaii, e malaga atu i ine ia latou feau ma o atu foi e tafafao. O lena e o atu e sasaa atu le manuia mo faletalimalo. E tele taimi aemaise lava weekends, e toetiti lava oo i o i le faletalimalo la e i o i le agai atu lea i Fagamalo, le tutumu o faletalimalo. E le o se tulaga la e avane ai ia fuafuaga mamao ia a le Shipping. E mo le femalagaai i le va o tatou atumotu ia e lua, ona o lea o lo o tupu pea tagata femalagaai, aemaise o tatou faalavelave e tupu pea i o tatou aiga. Ou te manatu e le o se mataupu e lagalaga ai finagalo, e pau o le mea o lea ua saunoa atu le Minisita. E pau lava le mea tatou te faia, o le agaga o le faafetai, ua toe maua le isi auala ina ia sologa lelei ai a tatou faigamalaga.

Lau Afioga o le fesoasoani atu lea.

SUI FOFOGA FETALAI: E le toe oo foi i ai se faamatalaga a le Nofoa. Malo faafetai i fuafuaga alualumamao a le Malo, aemaise o lea ua lalata ina lului le faamoemoe tele o le tatou atunuu. Ia o lea ua talafeagai. Faafetai tele ia ouluga Afioga i Minisita.

Ou te tapa lau Afioga, e manaia le faatea pea o se definition o le IMF. Ia faa-Samoa, ai o le mea lea e manao ai le sui usufono lea o Faleata.

Afioga Hon SILI EPA TUIOTI: Ia faafetai tele i lau Afioga i le avanoa e faamalamalama ai. E faamalulu atu foi, sa tatau ona avatu ma le igoa faa-Samoa. O le Faaputuga-tupe Faava-o-Malo, International Monetary Fund, o le igoa Samoa lena. E manatua foi o le toatele o le tatou Palemene, o le vaega lea o le faaputuga-tupe faava-o-Malo, o latou na e pei o fomai, specialists, e omai e vaai mai o atunuu taitasi i le tulaga lea o le tamaoaiga. O le a le mea o faaletonu ai ia tamaoaiga. O latou e o mai faatalanoa. A o mai le IMF, e 2 i le 2 vaiaso o nonofo iinei i Apia. E omai fono muamua ma le Minisita ma le Ofisa Sili o Pulega o le Matagaluega o Tupe, o le afioga i le Kovana o le Central Bank. Aua e pei o vaega ia o tatou,

e feagai ma le vaega lea o le Faaputuga-tupe Faava-o-Malo. O latou la e matua sailiili lava, e uma ona matou fonu, fonu ma le Ofisa Sili o le Pulega o le Matagaluega o Tupe ma le latou aufaigaluega, fesiligia aitalafu, o fea le mea e ave ai ia aitalafu, po o guarantee, o le tulaga o le tala o le tupe. O le faatulagaina o le Tala o le tupe, faiga faavae. Ia e faapena foi pe a talanoa ma le Kovana ma le aufaigaluega, i tulaga o mea ia. E pei foi ona silafia o le tatou Central Bank, o latou na e vaavaaia tulaga ia o faletupe, ma tupe e aumai i totonu o le atunuu, ma tupe o avatu i fafo. O le tulaga lena, e toe avatu uma lava, oo i le isi aso ua avatu le Ofisa o Faatoaga, e talanoa i ai, o le a le mea ua faaletonu ai mea ia, o le a le mea ua le export ma tulaga faapena. E tusa e o mai e fai le diagnostics po o a faafitauli ia e le o mafai ona tatou foia, ina ia faapea ona siitia ai i luga le maugaluga o le tamaoaiga. E pei o le latou galuega lena, ma e faalogo tasi uma lava i ai ia faalapotopotoga tetele a le lalolagi, e pei o le World Bank ma le IDA mai latou uma na. E faalagolago uma lava i le tulaga i fesoasoani e ave i atunuu e faalagolago i le fautuaga lea a le IMF pe a foi atu. O le mea foi lena o le tele o atunuu, e tai 3 tausaga faatoa fai, a o Samoa na matou talosaga lava i le taimi na matou fonu ai. E ui lava na matou pisi, ae matou te mananao lava e o mai i tausaga uma lava ia Mati. O le lelei foi o Mati, aua e uma ona tatou talanoa ai, ua matou iloa loa ia mea e tataua ona faalelei ai tala o le tupe ma tatou faiga faavae. O le faamalamalamaga puupuu lena i ai, e taua tele lenei Faalapotopotoga.

SUI FOFOGA FETALAI: Se i tuu atu le avanoa i le Afioga i le Taitai o le Malo.

Susuga Hon Tuilaepa Sailele Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: O lea ou te tau to manatu o le tausaga e 1971 na avea ai tatou ma sui auai o le Faaputuga-tupe Faava-o-Malo. O le 1973 na avea ai tatou ma sui auai o le Faletupe o le lalolagi. O lea sa taua e le Minisita o Tupe, e i ai la feiloaiga ia ma atunuu. O le latou galuega lea e fai, e o mai e mataitu po o a mai le tulaga o lo o i ai le tamaoaiga o Samoa. O le tausaga e 1972 na omai ai, a o le 1973 na fai le latou article for consultation. I aso na, e matua toatele tagata e auai, toetiiti auai ia le toatele o le au faipisinisi. A o i ai la le faletalimalo foi lele sa i tua i Siumu, o le Hideaway. O i ina la sa fai ai le matou article for consultation. A o ou galue i totonu o le Matagaluega o le Tupe. Alu atu lava le matou fonotaga i le ta o le 5, 6, 7, 8, 9, 10, 11, 12, manava loa i le po. O le po la lea, o le matua manaia o le po i le masina. E i ai la ia le isi aualii o le matou Ofisa na matou o. Matou iloa e ta loa le

6, ona matou o lea e fai le matou meaai, malolo, i feiloaiga la nei e faatalanoa ai le tulaga o lo o i ai le tatou tamaoaiga. O le ta la o le 6 matou o loa matou taele i le sami. O i la i le faatausiuga o le Hideaway, e i ai le vaitafe. O lea la matou te taele, ae napa la i i le sami, ua amata loa ona tatafe. Ae fai mai loa le isi alii, se e i ai le matou upega la e aumai e tatao. E 4 ea ia faalau, matou o lea tatao. E sau la i o, i totonu a o le lotoloto, ta le 1 i le vaveao ua tusao le masina i luga. Fai loa le matou tonu matou te o e asi lo matou upega. Matou te omai lava, o lea lava e ola moli o potu o officials nei na omai o la e faigaluega lava. Ou alu loa lea ou fai i isi papalagi, sole a saga fai lava na galuega. Tatou o tatou taele i le sami. I le ta o le 1 i le po? Ioe, e manaia o la ua pe. Ma le manatu foi lele, o la lava e i ai sina sami, ae matou o atu i le sami, ua matu atu lava i lalo e agai i tai toetiti atoa le 200 iata, o la ua matu, ma ua matua pe eleele lava le tai. Ae matou maua atu le matou upega, e 5 tamai malie la e taupeupe mai ai. Matou omai loa faaali i le aualii ia, ua e vaai la ua tou le vaai i le manaia o le puega o malie ia. Ua ala ona ou taua le mea lea, e le fou le mea lea o le o mai pea. O lenei ua ua see tatou i luga, a o lenei e omai pea, omai pea. O le fesili, aisea e omai ai? Leaga e i ai le mafuaaga. I le va o le isi feiloaiga ma le isi feiloaiga e ono tupu ai faalavelave i totonu o se tamaoaiga. Pe agai i lalo pe agai i luga, e faamaumau uma mea ia. Ona e le tumau, e le tumau e pei lava ona ou taua, fesoasoani ia mai fafo, e latou te mataitu. O le uiga o le upu lata mai o le mataitu, spy. E spy ina ia latou iloa po o fea lea e agai i ai, na ona faaletonu lava tipi uma ma fesoasoani e aumai. O le ala lena, o lea e talanoa atu pea, talanoa atu ai pea i le mea lea, mataitu ma mataalia i taimi uma. E leaga o lea e i ai le vaega lea, a o lea foi e i ai le Faletupe o le lalolagi, a o lea foi e i ai le Faletupe o Asia, e omai e mataitu le taualumaga o le tatou tamaoaiga, aemaise foi atunuu o le Pasefika. E matou te i ai i o i le tausaga e 1995, i i i le fonotaga sa fai i Spain, sa fai ai i ina le fonotaga. Ae matou o atu, ua umi ona matou faatali, o lea matou te fia feiloai ma le vaega ia le pulega o le IMF. E toetiti atoa le itula o matou faatali, ae omai i fafo le vaega lea na umi ai o matou faatali, o Papua Niu Kini, le savali a Papua Niu Kini. Ia ona ou fesili atu lea i le Minisita, “A o le a alii le mea ua umi ai ua leva ona matou faatali?” Fai mai le tala a le Papua Niu Kini, toe lava o ni nai aso uma le matou tupe teu faaagaaga mo fefaatauaiga, toe lava o ni nai aso. O lea la matou te sulufai mai i i le IMF e tootutuli i ai e fesoasoani mai, a faaletonu loa, tasi la lea latou fesoasoani e aumai, e aumai le fesoasoani e faaalu ai pea le tamaoaiga i mea ia, ia lava le tupe e faaauau ai pea teugatupe ia mo fefaatauaiga ina ia aua ne i alu alu nofo. Ae mafai ona le aumaia pe afai foi e vaai mai o faaletonu.

O le tausaga e 1983 ina ua tulai mai le HRPP, o le malosi ia o le savali na omai a le IMF i le tulaga o fuafuaga ia e fai a le Malo, aua o le mea lea na oti ai le Malo ua leai se teugatupe mo fefaatauaiga ina ia faaauau pea ma sologa lelei fefaatauaiga a Samoa. E omai le Malo ua matua tele le faaletonu. O le tulaga la na i ai, sa latou vaaia pea le faatulagaga o faiga faavae a le Malo po o ogatasi ma le latou foi fuafuaga o le mea e tatau ona i ai le Malo, aua o lea e uu e latou le fesoasoani lea, o le aumai o le latou tauau i taimi e moomia ai e tatou tulaga e faatupe ai tatou teugatupe mo fefaatauaiga. Ma o le taimi lava e faaletonu ai faiga faavae ma gaoioiga fai a le Malo, tipi motu loa, lea e ala ai ona saunoa pea le Minisita o Tupe ma ou faaopoopo atu i ai, e taua tele le mea lea o le responsible government, e omai i totonu faataoto fuafuaga mamao e le o ni vale tagata la i o, tagata la e i o e sau ai le fesoasoani, o le matua sharks i mea tau tupe, e faaletonu loa X ma tatou. E maaleale tele mea ia i le tulaga faava-o-Malo aemaise lava le taimi lenei o faalavelave ia e afaina uma ai lava Malo, faalavelave ia o le Koviti ma le aafia o fefaatauaiga o oloa i le lalolagi.

Lau Afioga o le toe faaopoopo atu lena i mataupu ia ua laga.

SUI FOFOGA FETALAI: Malo saunoa i lau Afioga i le Taitai o le Malo. Ua manino foi i le faafofoga a le Palemene. Ia, o lena ua faafofoga foi si o tatou atunuu i le tele o le aoga, ma ia manino foi i tulaga o le vaega lea. O le mea lea ou te tapa lau Afioga i le Minisita o Tupe e faaauau lau saunoaga.

Afioga Hon SILI EPA TUIOTI: Faafetai i lau Afioga i le Fofoga Fetalai. Ia, o lo o lelei foi le tulaga tau tupe ma galuega faatino a le Malo i aso uma po o cash balances. Ma e momoli ai lau faafetai i Matagaluega ma Faalapotopotoga uma o lo o faatino la latou pitolaau e ala i le aoina mai o tiute ma lafoga faapea tupe maua masani e faatupe ai fuafuaga uma a le Malo.

E faaaoga foi lenei avanoa e momoli atu ai lau faafetai i a tatou paaga mo fesoasoani o lo o agaleleei mai ai i tausaga taitasi. Ou te fiafia foi e faailoa atu, o lo o lelei faafoeina a tatou aitalafu, lea o lo o matauina pea le faaititia pea i tausaga uma pe a fua i le tamaoaiga. Ma o se tulaga ua manino ai le savali o le Faigamalo lenei i ana folafolaga e faatoa faatino lava nonogatupe pe a moomia, e ui ina malosi ma mafai lava ona gafatia e a tatou tupe maua masani ona totogi a tatou aitalafu.

Ina ia saga faamanino vaega ua ou taua i luga, ou te fia ototoina atu nisi o faailoilo taua i totonu o le 5 tausaga ua faaiuina o lenei Paeiga. Muamua, o le tamaoaiga o Samoa ua siitia maualuga nei, pe

a tatou toe tepa i le 2015 e oo mai i le taimi nei. I le tausaga e 2015, e \$1.9 piliona le aotelega o le tamaoaiga tuufaatasi o Samoa sa i ai. E \$2.09 piliona na siitia ai i le tausaga na sosoo ai 2016. O le 2017 e \$2.11 piliona sa faamauina ai ma le 2018 ma le 2019, e \$2.23 piliona sa faamauina ai, sosoo ai ma le \$2.17 piliona i le tausaga e 2020. Lau Afioga i le Fofoga Fetalai, e \$270 miliona ua faaopoopo i ai i totonu o le 5 tausaga o nei Paeaiga, ma o se fua taualuga lenei o galuega ma atinae tetele o lo o taulamua ai le Malo aua se tamaoaiga malosi e manuia ai tagatanuu uma.

Lua, o le tulaga i aitalafu total public debt. Lau Afioga, o lo o mulimulitaia pea e le Malo taiala o le faafoeina ai o ana aitalafu. O lo o malamalama foi vaega ma tulaga uma e pei ona folasia manino i Tala o le Tupe i tausaga taitasi faapea Lipoti Faaletausaga a le Malo, so o se aitalafu o lo o nonoina mai e le Malo e faatino ai ana atinae tetele i tausaga taitasi.

O le mea moni lau Afioga, o le vaega aupito sili ona taua i so o se Malo, o le gafatia lea o le debt service ratio e ana lava tupe maua masani ona totogi ana aitalafu. O Samoa e na o le 11% o ana tupe maua o lo o faaaogaina e totogi ai a tatou aitalafu. O lona uiga e 89% o a tatou tupe maua masani o lo o faaagaaga mo galuega ma atinae tetele e lagolagosua ai le tamaoaiga ma le atinae o Samoa. O lea ua faaitiitia nei i le 48% o le tamaoaiga a tatou aitalafu tuufaatasi po o le percentage of debt to GDP faatusa i le 50% o lo o avea ma alafua po o le tapulaa. O se pau maualalo lea pe a fua i le 58% le maualuga na oo i ai a tatou aitalafu i le tausaga e 2015 ona o tapenapenaga moomia sa faatino e tali ai aafiaga mai mala faalenatura sa aafia ai le atunuu i tausaga ua tuanai atu.

A tatou vaavaai foi i isi atunuu o le Pasefika e pei o Fiti, e 83% le maualuga ua oo i ai a latou aitalafu, e fua i le tamaoaiga. Ma e leai lava se tulaga e ono faapopoleina ai lo tatou atunuu ona o lo o lelei faafoeina a tatou aitalafu, aemaise o le maua o le malosi e mafai ona totogiina ai a tatou aitalafu i tupe maua masani a lo tatou Malo. Lau Afioga, e i ai ni siuleo o lo o faapea mai, tatou o loa e matua nono mai ni aitalafu e tufatufa i le atunuu i lenei vaiata. O le Faigamalo lenei, o se Faigamalo ua masani i le faafeagai ma so o se luitau. Ua tuanai atu peau faigata o le vasa sa tatou faimalaga mai ai, lea sa fetai ai le atunuu ma le mala faalenatura o afa fulifao tetele, o mafuie, o galulolo ma lologa tetele ma faamai pipisi, faapea aafiaga o tamaoaiga o le lalolagi i tausaga ua tuanai atu.

Lau Afioga, e ui ina malama le ulugalua o ataata o tauleleia o lea ua maua vailaau e togafiti ma taofia ai le sosolo faaafi o le faamai pipisi o le Koviti-19, e le o mautinoa po o afea e toe foi ai le lalolagi i le tulaga sa i ai muamua. O lona uiga, e tataua ona fuafua tataua le

tamaoaiga i le taimi lenei, aua tatou te le iloa ala o le matagi, ua na o le Atua lava na te silafia mea o le a tutupu i le lumanai. Ua faagasolo foi faatalanoaga ma tapenaga a le Malo i le ono faataunuuina ai o se isi faamama avega 3, stimulus package phase 3 i le tausaga faaletupe o muamua, ae faalagolago lona tapenaga i le gafataulimaina e a tatou seleni o lo o maua e faatino ai.

3. O le isi vaega taua ou te fia faailoa, o le tulaga malosi o lo o i ai a tatou tupe faaagaaga mo fefaatauaiga po o foreign reserves mo le okaina mai o oloa mai fafo. O se alafua masani o lo o tausinio ma taumafai i ai le tele o Malo e ausia, o le umi lea e 4 masina mo fefaatauaiga o oloa mai fafo pe a feagai le atunuu ma ni luitau tetele.

Mo Samoa lau Afioa, o lea ua 11 ma le afa masina le malosi ua tatou ausia i le taimi lenei. O lona uiga, a tulai mai ni mala faalenatura ogaoga i le taimi nei ma taofia ai galuega ma atinae uma o lo o faamoemoe i ai le tamaoaiga, e lalata i le 12 masina le umi ma le malosi o tatou tupe faaagaaga e faaauau ai ona okaina mai ai oloa mai atunuu mamao. O se matatia o lo o moomoo i ai le tele o nisi atunuu i totonu o le Pasefika. Mo le silafia, o le fua faatapulaa o lo o ausia e le tele o atunuu laiti o le Pasefika, na o le 6 masina e okaina mai ai oloa, a o Samoa ua tatou tulalata i le 12 masina po o le tausaga atoa.

4. O le tulaga i a tatou tupe maua po o le domestic revenues lea e aoina mai i lafoga, tiute ma tupe maua masani, o lea ua ausia le \$631.2 miliona e faatusa i le \$493.2 mliona sa aoina i le tausaga e 2015. O lona uiga, ua atagia foi i lenei alafua le tulaga maualuga o le tamaoaiga aua ua siitia tupe o lo o taamilo i totonu o le atunuu, ma o se mitamitaga foi ona o le lelei faafoeina o galuega a Matagaluega uma o lo o nafa ma le aoina mai o a tatou tupe maua e faatupe ai atinae ma auaunaga a le Malo.

5. O lo o atagia foi i tupe alu a le Malo i tausaga taitasi o lenei 5 tausaga o le Paeaiga le ave pea o le faamuamua i aoga ma soifua maloloina. Mo aoga ua siitia i le 48% le fesoasoani tuusao a le Malo ma le Matagaluega ma le \$81.9 miliona i le 2015 i le \$103.3 miliona i le 2020. E ese mai lenei vaegatupe, e \$18 miliona ua faaagaaga i le tausaga nei 2020/2021 mo fesoasoani i aoga e ala i le one government grant lea ua manuia ai aoga a Ekalesia eseese i totonu o le atunuu faatasi ai ma aoga tumaoti. E le o aofia foi i nei vaegatupe ua faamatuuina atu i aoga fesoasoani a Malo o Iapani ma Saina e tauala mai i le Malo mo le fausiaina o faleaoga o alaafaga ua faamanuia ai i nei fesoasoani tuusao.

6. Mo le soifua maloloina, e 42% ua siitia ai vaegatupe faaagaaga mo galuega a le Matagaluega mo le tausaga 2015, lea sa faamauina ai le \$83.9 miliona i le \$103.2 miliona i le tausaga 2020. E ese mai lea

vaegatupe le fesoasoani e auina atu ai gasegase i atunuu mamao po o le overseas medical treatment scheme lea ua siitia mai le \$5 miliona i le 2015 i le \$8 miliona i le tausaga e 2020/2020. Ma e faitau afe foi tagata Samoa ua auina atu i togafitiga nei i tausaga e tele i lalo o le faiga faavae lenei a le Vaega Faaupufai o le HRPP.

E fia faaleoina foi se fuafuaga a le Malo i le lumanai ina ia faatuina lava i Samoa nei se nofoaga tutotonu, le referral centre for specialized treatment e togafitia ai a tatou tagata ma le moomia ai le toe malaga atu i atunuu mamao e pei ona valavala ai ma aiga i lenei vaitaimi o le faamai pipisi o le Koviti-19.

7. E faitau miliona tala le tele o atinae ma poloketi tetele ua faatinoina e le Malo i totonu o le 5 tausaga ua tuanai atu e aofia ai aualatetele ma ala sima fou ua fausiaina nei, o le toe faaleleia ma le fausiaina o faleaoga ma falemai fou i totonu o le taulaga faapea afioaga i tua, fausiaina ma siitia tulaga o malae vaalele ma uafu mo le faaleleia o femalagaaiga i totonu o Samoa faapea ma atunuu mamao. Faaleleia eletise, suavai ma isi auunaga moomia a tagata uma. Siitia o totogi o le aufaigaluega a le Malo ma le faaleleia o meafaigaluega ma Ofisa o lo o galulue ai. Faaauuina o le toe faaleleia o vaega o le atunuu sa aafia i faalavelave faalenatura faapea le tele o isi atinae faaauuua uma ona faamautuina feagaiga ma paaga, ma e le o toe mamao ona amata faagasolo lea.

8. Ou te toe fia faatepa foi le mamalu o le Palemene nei i nisi o matatia ua mafai ona ausia e lo tatou tamaoaiga ma le Malo lea ua avea ai ma alafua o lo o faaoga e isi atunuu o le Pasefika le tulaga tau tupe o le public finance reforms e faapea. Muamua, faatulagaina lelei a tatou lipoti i tausaga taitasi a Matagaluega ma Faalapotopotoga uma a le Malo – updated Annual Reports submitted to Parliament. Ua le toe tutupu faafitauli i aso ua tuanai, e tai 10 tausaga pe sili atu foi o tuliloa pea Lipoti a Matagaluega ma Faalapotopotoga a le Malo.

Lua, faamalosia ma faatulaga aiaiga ma fautuaga o oloa ma auunaga mo le Malo, procurement operation manual. Ua manino foi tulaga uma ma faailoa faalauaitetele foi i latou ua faamanuiaina i a latou ofo i galuega ma atinae tetele a le Malo. 3. Faatuina o komiti suetusi o le lotoifale po o internal auditors mo Matagaluega a le Malo. 4. Faaleleia ma faamalosia auunaga e mataituina le tamaoaiga. 5. Tapenaina lelei o se faavaa e tuufaatasia ai tala o le tupe a le Malo e ala i ana tupe maua, tupe faaalu, tupe faameaalofa, ma isi vaega masani o lo o lipotiina atu e le Malo i tausaga taiatsi.

6. Faamalosia ma le uunaia o faavae na fuafuaina ai tupe maua a le Malo i tausaga taitasi po o le cash revenue broadcasting model. 7. O le faatulagaina lea i tausaga taitasi o a tatou suesuega o le tamaoaiga

e faatino e paaga faava-o-Malo e pei o le IMF. O isi atunuu uma e 2 i le 3 tausaga faatoa faatino ma ua vaai maualuga foi a tatou paaga faatasi ma lo latou faatuatuaga, o Samoa e leai ni faamatalaga e natia pe faalilolilo foi ona fai ona o lo o faamanino ma faamatala lenei vaega uma o le tamaoaiga. 8. Ua avea foi Samoa o se laumua muamua o le Pasefika ua faia ai le suesuega o le tamaoaiga ua taua o le PEFA Climate Change Assessment. O se saililiga e ave ai le faamuamua i le siosiomaga o se atunuu ina ia faamautuina vaega aupito aafia pe a tulai mai mala faalenatura.

O le mea moni lau Afioga i le Fofoga Fetalai, e tautala galuega ua faatino e lenei Faigamalo. E tele matatia ua ausia faatasi ai ma luitau tetele ua mafai ona tali atu ai le Malo ina ia vave faafoisia le tamaoaiga i se tulaga malosi ma se tulaga vave. Lau Afioga, e lagona foi le agaga o le faafetai ona o le tulaga maualuga o lo o i ai Samoa i upufai o Malo o le Pasefika ma le lalolagi atoa, ua tu matila lo tatou sao. Lea foi sa to mai le matupalapala o le Malo Afaatasi ia Samoa ia Ianuari o le tausaga 2014 sa tatou faaauauina mai ai, o se atunuu e maualalo le tamaoaiga i se tamaoaiga ua siitia lona atinae, graduating from the least developing country to middle income countries.

Ou te fia tautala foi i le faaaloaloga o Samoa i totonu o le lio o faalapotopotoga tau tupe faava-o-Malo lea foi e avea ai Samoa ma sui o le Pasefika i komiti o lo o faafoeina fesoasoani e pei o le International Development Association po o le IDA a faletupe o le lalolagi ma le faletupe o le atinae o Asia po o le ADB. O le Minisita o Tupe a Samoa o lo o avea nei ma sui o lenei itulagi i le Komiti o le Asian Development Fund. O nei avanoa o lo o moomoo uma i ai atunuu o le Pasefika, aemaise lava i lenei vaitau e mafai ai ona faaleo so latou finagalo ma siitia ai foi fesoasoani tuusao mo latou Malo. O lea foi ua filifilia le Minisita o Samoa e avea ai ma Sui Taitaifono o fonotaga faaletausaga a le Faletupe o Atinae o Asia ia Me o le tausaga nei 2021 e faaoga ai upega tafailagi i lenei fono. Faafetai i le Atua i Lona valaauina o tatou tagata faatauavaa e fai ma sui o atunuu o le Pasefika e tuuina atu se fautuaga lelei ma amanaia i nei Faalapotopotoga tetele faava o Malo ma fesoasoani ai i le atiaaina o le tamaoaiga o atunuu laiti o le Pasefika.

Ona oo mai lea lau Afioga i le Fofoga Fetalai i se faamatalaga i fuafuaga alualumamao a le tatou Malo lea o lo o faavae ai gaoioiga uma a lenei Vaega...

SUI FOFOGA FETALAI: Malie lau Afioga i le Minisita o Tupe se i tulai mai le Afioga i le Minisita mo Atinae Tetele a le Malo.

Susuga Hon Papaliitele Niko Lee Hang: Faafetai mo le avanoa. Sa le fia faalavelave i le saunoaga matagofie a le Afioga i le Minisita o Tupe, ae matau atu lava o le a umi tele na pasi le mea lea sa saunoa ai, le mea lea i tatou aitalafu ia mai fafo.

Lau Afioga, ou te vaai atu foi nei i le pepa i le taeao, o la e foi e laga mai ai e le sui usufono lava lea e tetee i le galuega lea o le uafu, o la ua tau mai le \$250 miliona, a o lea na tau i lau lauga o lea e tapena. O lea e faatali le feasibility study pe faapefea la na omai ma nei fuainumera ae le i maoti se ata o le uafu. O le pepa lea na sau nei o la e ua tau mai ai e \$250 miliona le tau o le galuega, ma o le a pologa alo ma fanau o lona itumalo e totogi nei aitalafu. Masalo ua faafia ona faamalalama e le Afioga i le Palemia, o tatou aitalafu ia, o le mea taua e mafai ona totogi, ua saunoa foi le Afioga i le Minisita o Tupe. O la e lava a tupe. O tupe nei e totogi ai aitalafu o tupe lava a tatou, o tatou lava tupe ia e maua mai totonu o le tatou atunuu, o lea la e sefe lava. A o lea foi ua sau i le pepa ananei e \$250 miliona. A o la e foi fai mai... e le i faia ni tapenaga o le tau o le... e le i faauma maia le feasibility study ma mautinoa ai le ituaiga uafu lea tatou te tapena. A o lea foi ou te vaai atu nei i le pepa, o la e foi ua tetee mai foi ma faaali mai nei mea. Ioe. E le tonu ma sao nei mea. Se i fai le feasibility study, aumai ma tapena le tau faatoa iloa le tau o le galuega. A o lea foi ua faaali ona manatu na o lea o le a \$250 miliona le tau ae leai se mea faapena o tapena. Ma lou faaloalo lava.

SUI FOFOGA FETALAI: Ia, se i tuu atu lava le avanoa e fesoasoani mai ai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, na ou faitau ai foi. Na ou faapea, o le tama ua leaga le ulu. Ia malie ia ona pau lava o tagata ua faapea ua leaga le mafaufau.

Afioga Faumuina Asi Pauli Wayne Fong (Nuu Tu Taulaga i Sisifo): Lau Afioga i le Fofoga Fetalai, e mafai ona ou tali atu i le tulaga lea lau Afioga?

SUI FOFOGA FETALAI: Ia, e taua foi le faafofoga o le atunuu i itu e lua. Ia se i aumaia po o le a lea mea ua i le pepa i lenei taeao.

Afioga Faumuina Asi Pauli Wayne Fong: Lau Afioga ai lava o tusitusiga na a le pepa, ae faaali atu pea lou tetee i le uafu. Pe \$100

miliona pe \$20 miliona pe \$300 miliona pe piliona, e tetee lava lenei itu i le faiga o le uafu i Vaiusu. Ma lou faaaloalo lava. Faafetai.

SUI FOFOGA FETALAI: Faafetai o lea la ua faafofoga.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, ia o le mea la lea ua atili faamaonia ai o si tama ua leaga le mafaufau.

Afioga Faumuina Asi Pauli Wayne Fong: Lau Afioga i le Fofoga Fetalai, ia a o ai la e totogia? Pei o le fesili tele lava lena. Pe totogi e le Malo pe totogi e le atunuu pe totogi e Vaiusu, ia pe totogi foi e Faleata 2. Ma le faaaloalo lava.

SUI FOFOGA FETALAI: O le taua ia. Se i tau fai atu lava le tala a le Nofoa malie lau Afioga ona tulai mai lea. O le taua ia o le saunoaga a le Afioga i le Minisita o Galuega ma Atinae Tetele a le Malo. E afua ona fai atu le tala lenei, o le manino lava o mea uma o le Maota lenei. O le Maota lenei e avatu ai faamatalaga amiotonu ma le sao. A o faafofoga mai le atunuu, malie le atunuu, o i inei e avatu ai faaiuga uma i le Maota lenei. O tulaga i mea o pepa o ai lava o agai i ai, e leai, e le o le amiotonu lena. O lea la ua taua ai le saunoaga ma le fesoasoani mai a le Afioga i le Minisita o Galuega Tetele a le Malo, ina ia silafia ai e le atunuu, e le o le amiotonu lea. Ou te tapa lau Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, o le tusi lea, lea sa avatu ia te outou uma, e tou te maua i lalo o le itulau 26, 27 ma le 28 seia oo i le 29 faa-Roma, lea e avatu atoatoa uma ai lava nonogatupe a le tatou Malo. O lea foi ua saunoa le Minisita, afai na o le 11 sene mai le \$1 taitasi tatou te maua o le GDP. O le GDP lau Afioga i le Fofoga Fetalai, o le tuuaofaiga lea o le tupe maua a le atunuu atoa. Afai la na o le 11 sene mai le \$1, leaga o lea e faapasene o le uiga lena o le upu eleven percent. O lea la e matua manino lava i le aumaiga, lea e totogi ai aitalafu a le atunuu, o tai \$1 uma lava. O le a la le mea lea e fai i le isi 89 sene? O le mea lena o lea e faagaoioi ai le tamaoiga. O le mea lena e lelei ai ona faalogo i ē e malamalama i mea ia. Ou te tatalo, ia malamalama le itumalo, aumai faipule e malamalama, leaga e matua mataga le tau faasaosao atu. E matua mataga lava i se itumalo le faalogologo mai i le latou sui o tau faasaosao atu i totonu o le Palemene, le

malamalama i tulaga ia o lea ua uma ona faataoto atu. Vaai ua leva ona e nofo ma le pepa lenei o lea ua silia i le tausaga? O lea e i ai uma tatou aitalafu ma faamatala uma atu mea ia e saunoa mai ai le Minisita, le aofai o tatou aitalafu ma le malosi o le totogi aitalafu. Na pau lava lenei o le mea e tilotilo i ai, o tagata nei e i fafo o tagata atamamai, e tilotilo i le malosi o le tamaoaiga, ma le malosi o le totogi aitalafu. O i ina e fua i ai. O lea e manino lelei i le saunoaga a le Minisita, o lea foi e fesoasoani mai le Minisita o Galuega sa Minisita foi o Tupe. E leai la se mea e popole ai, ae afai e te tetee lava oe i mea lelei, fai pea lau tetee, ae lafo i lou itumalo e faia le faamasinoga o oe. Ua atili ai ona mataga le itumalo i le faasaosao atu o le latou sui i totonu o le Palemene, leaga e atagia ai. A na e nofonofu, e le iloa sou vaivai. Talanoa i mea e oo i ai lou malamalama, ae aua e te talanoa i mea e le oo i ai lou malamalama.

Lau Afioga i le Fofoga Fetalai, se ta te musu e fai atu mea ia, a o le faasoesa i le Fono mamalu. Leaga e fai sina maotua o mea ia. Afai e te le malamalama, e sili ona e nofonofu. Aua e mataga tele le matou tutulai atu ona faamalalama atu lea ia te oe, a ua le faa-tasi, ua faa-lua, ua faatele. Lau Afioga i le Fofoga Fetalai, ua uma foi ona ou faamalalama atu, o tagata la e i o e nofonofu i totonu o Faalapotopotoga nei, o tagata atamamai. O i foi lea e faamasino ai e Niu Sila economist ma latou e faia polices a Niu Sila, Ausetalia, Iapani, Saina, Amerika. E le fia aumaia e se Malo se fesoasoani i se Malo e leaga ana fuafuaga fai. E aumai i le Malo i le vaai mai e leai se mea e popole ai. Ae afai o lou agaga lea e leaga lava lou loto e fai ni atinae e manuia ai tagata o le itumalo, e le pei le latou tamaoaiga o lou tamaoaiga. Malie, e le faapena le agaga o le Malo. O le Malo e taumafai e fai atinae e manuia ai tagata e le tutusa le maualuga o le latou manuia ma lou manuia. A o le mea sili o lea ua faafogafoga mai le itumalo, e te le manao e fai ni atinae e manuia ai ni tagata vaivai o lou itumalo. A na se i e nofo lava ma aua e te pisa ai, e le iloa e lou itumalo lou manatu faapito.

Lau Afioga i le Fofoga Fetalai, ia o si au fesoasoani atu lenei.

Afioga Faumuina Asi Pauli Wayne Fong: Lau Afioga i le Fofoga Fetalai, e a, e mafai ona ou tali atu i tuuaiga ia ua tuuina mai?

SUI FOFOGA FETALAI: E mafai. Na pau lava o lea, afai e te toe tulai mai, o le tatou Tulafono Tumau, e toe tali foi le Malo. O lona uiga, e alu lava lenei afiafi, afai lava ma e tali mai, o le a nofo ai i i le tatou galuega. Ae o le a toe tuu atu le avanoa, e toe tali foi la le Malo.

Afioga Faumuina Asi Pauli Wayne Fong: E leai se mea o i ai lau Afioga. Na pau lava le mea e momoli atu le faafetai tele. Leai, ou te le valea foi. O tagata la e i fafo, e le nonofo i Faleata Nu.2, e nonofo lava latou i fafo i le mea e faasoa mai ai le seleni. Ae malie ia le finagalo, e leai, o lou itumalo o lea ou te finau atu i le mea e lelei mo lou itumalo. Filifili le itumalo, a faapea ou te toe sau i le isi faiga palota, o le tali lena. Ae a faapea ou te le toe sau, ae malilie ia, e tataua lava ona ou tu i luga aua o lo o aafia ai lou itumalo. Ae faafetai tele atu lava mo le fesoasoani mai. O le tusi lea na uu mai e le Afioga i le Palemia, o la e tefisiti. O lona uiga, e le mafai ona fai ai le uafu. O lona uiga, e tataua lava la ona aitalafu.

SUI FOFOGA FETALAI: Ia, o lea ua maua. Ou te tapa lau Afioga i le Taitai o le Malo.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, o le mafuaaga lea ou te fai atu ai, e te tilotilo i i i le malosi o le tamaoaiga ma le tele o le avanoa e maua ai fesoasoani e fai ai mea ia. Ma e leai se Malo o lo o faipaaga ma le Malo lenei e aumai ni fesoasoani. E le fia aumaia e se Malo se nogatupe po o se fesoasoani e fai ai se tamaoaiga o se atunuu pe afai e le mafai ona latou totogia a latou aitalafu. So o se Malo o le lalolagi, o le mea lena. E oo foi ia te oe... E a e le o faia la ni au aitalafu? O lea e fesili atu ia oe, e le o faia ni au aitalafu? O lea foi sa e toto foi i mea ia sa e faigaluega ai, ma le mea lea sa e faaogaina ai power a le EPC. E a, ou te manao ou te talanoa atu i mea na? Lau Afioga i le Fofoga Fetalai, se ta te musu e talatala tele i tua. Ona alualu lea o le isi au pisinisi gau, tapuni, aisea? Lau Afioga i le Fofoga Fetalai, o le a tauau lava ina le taofiofia, le taofiofia le tulaga lea, o lena e maua luga lou tamaoaiga. O le mea lea e taumafai le Malo e fai, ia faatulai mai ni atinae e manuia ai tagata lautele. A o lea e tu i le itumalo lea. E le na o oe foi e ana le itumalo lea. A lea sa tulai mai le sui o Vaitele, le sui o Vaitele. Ae musu lava oe, musu ai pea ae le mafai ona taofia le atinae lelei. Na toso le moli lea eletise, ae faatoa soo le atunuu ina ua oo mai i le tausaga e 1989. Na uma le faiga palota i le 1988, ae to mai loa ma timuga tetele lava. O timuga na e maoae, lea na lipoti mai e i ai afioaga ua tafefea fanuatanu i tai, ona o ituaiga fanuatanu foi ia e le alu tele i lalo, sau lava le tafe ua faalautatai, ave ia tuugamau nei, ave ma pusaoti ma tafefea mai tai. Na malepe ai ma le auala laupapa lea e i i Vaimoso, lea na ala ai ona toe fau le auala laupapa lea. Ona fai ai lea o le fono mo le toe faaleleia o le tamaoaiga, ma o le isi la mea lea sa fai ai le iuga o le a alu loa le polokalame, e faaeletise le

atunuu atoa. E le i mamao atu le eletise i tua, ae aumai ai loa le faamatalaga a le pule papalagi sa i ai i le EPC, e le mafai ona fai. Fesili le Tootooalii, ma au lea e saofai. O le a le mea ua le mafai ai? Tali, e leai ni masini tetele e aumai e eli ai le palapala e faatutu ai pou. Faatonu loa, matua leva ona e nofonofu, ua leva ona vili mai e faatonu oe e faaalu le eletise i le atunuu atoa. Ae o lena e te nofonofu e le i tau maia. O se masina e eli ai palapala, o e malamalama, o totonu o nuu, o la e toatele ai taulelea e o ifo e eli i luga po o le a le maualalo. Alu loa le polokalame. O atu loa i i i Falealili, i le mea o lo o tu ai le maota o le faipule e le lagolagoina le Malo e pei lava o oe. Ona sau loa lea o lana poloaiga, e sa ne i faaalu le eletise i totonu o lou itumalo. Alu loa ma le faatonuga, o le a laasia le nuu lena ae faaalu pea i nuu ia e i talaatu. Ona alu lava lea, o le a le mea na oo i ai? Toe tolotolo mulimuli mai, faamolemole, tuu i ai i totonu ma le matou itumalo. O le mea lava lea o le loto, loto e leaga. O le a la le mea lea ua i ai? O lea ua soo le eletise i le atunuu atoa vagana nai aiga ia e i tua atu, o lea lava e faagasolo lava. O le tausaga e 1989 na tupu ai le mea lea. Ae ala ona ou fai atu, e le toatele ni tagata faapea, e toa laititi. O le tagata ua leaga le loto ona taofia ai lea o atinae lelei. A o lea la ua ou talanoa atu, o la e faafogafoga mai le itumalo. E fai e outou le iuga o le faipule e manuia ai le itumalo.

SUI FOFOGA FETALAI: Ia malie sui, ua toa-lua oulua ia e tulai mai. O le faatonuga ma le poloaiga, e mafai ona oulua alaala mai i lalo se i fai le tala a le Nofoa. Faafetai. Vaai la i le manaia. Koma laititi, o le mea o le pao ma oso, o le mea lena a le taaloga o le kirikiti. Ia e i ai le taimi e tamoe atu ai ua le au ua pe. O le pao ma oso... Ia oulua malilie ua maea ona talanoa, ua auiliili ma toe auiliili le tulaga o le uafu i Vaiusu. Ua maea ona tali le Malo, e pau lava si vala laititi lea, o faasalalaga i tua atu o le Maota lena, o lea la e tau avatu ai se faamatalaga. E na o i inei e avatu ai le amiotonu o mea uma. O lea ua saunoa le Minisita, o lea e i le vaega o le tapenaga a le Malo mo le faamoemoe lea ua maea ona tali i ai. O le mea la lea ou te fautuaina ai sui usufono mamalu, o le a fai le faaiuga a le Nofoa, o le a faamuta i i le talanoaina o le mataupu lea.

Tofa Lealailepule Rimoni Aiafi: E le faatautee i lou finagalo lau Afioga, ona o lea e tautau lava lou itumalo, a o lea ou te nofonofu. E na o si mea laititi lava lea.

SUI FOFOGA FETALAI: E taua la lou tulai mai, leaga o lea e tau Vaitele.

Tofa Lealailepule Rimoni Aiafi: Faafetai. Sa ou usitaia le finagalo o le Palemia sa fai mai i le mataupu leni muamua. Aua tatou te toe talanoa i le pola e motu mai tua. A o le mea lea e tulai mai, o lea foi ua faafofoga le Palemene, e na o mea sese lava mea ia e fai.

Muamua, fai mai o le military that time is a... e sese. O le tau lea na aumai nei, e sese. O le mea lena o lea na ou nofonofo ai lava, e na o mea sese mea ia e fai. O le a la le mea tatou te amanaia ai? Ia manatua lelei e le sui usufono lea ma tatou ma le atunuu. E le i manao Saina i se uafu. E le i nofo nofo lava Saina, fai mai tou te mananao e fai se tou uafu? E leai, o le atinae a Samoa tuutuu mamao.

Ma le isi la mea mulimuli lau Afioga malie ai lou loto, leaga o lea e saunoa soo le sui usufono lea, o lona itumalo, lona itumalo. E le o sona itumalo, o le itumalo o au, o i a o uta i o...

Afioga Faumuina Asi Pauli Wayne Fong: Lau Afioga i le Fofoga o le Fono, o au o le sui usufono o le Itumalo Tu Taulaga i Sisifo. E alu atu lava mai Vaimoso e tau i Puipaa, tau i luga o le mauga, tau i tai i le aau. O lona uiga e tele atu le itumalo lea ou te i ai i lo le itumalo lea e i ai Lealailepule.

SUI FOFOGA FETALAI: O lea ua maua...o lea ua manino.

Susuga Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Se manaia tele le tatou talatalanoa. Tatou te talanoa ma talitalie, o lea foi toetiti oo i le taimi. Ae i ai le mea lea ou te iloa lelei. O lo o i ai lo latou mafaufau, o le atili faaleaga o le uafu lea, e faatupu ai le manatu i le Malo lea e uma ona tuu mai lo latou agaga, o le a fesoasoani mai ia aua ai ne i omai. Se pei lava o le ao. O le mea la lena, o ia lea ma isi o lo o i ai le manatu lea, e mumusu foi lele e fai se mea lelei e le vaega leni, e manuia ai le itumalo e leaga e tau ai le vaega leni. Ona nofo loa lea ma alu mea ia i fafo, ma alu mea ia i fafo ina ia faapea ai le Malo o lea e le manaomia e le atunuu. O le ala foi lena o lea e fai ai ma ou faasalalauina o ituaiga manatu faapea e aumai i tagata ua le lelei le mafaufau. Aua la le amanaia. O lea foi la ou te toaga foi au, o taimi uma lava e sau, alu atu lau faasalalauga, sau alu atu lau faasalalauga, sau alu atu lau faasalalauga e counter ai ituaiga manatu mai tagata ua leaga loto.

SUI FOFOGA FETALAI: Ia malie lau Afioga i le Minisita, o lea ua manino...

Susuga Hon Papaliitele Niko Lee Hang: E i ai si vala lea se i toe...

Afioga Faumuina Asi Pauli Wayne Fong: Lau Afioga, o lea ua uma i i, o lea ua ou faapea atu, ia ua lava ia lea. Sao ia outou, ae manaia pe a ave le uafu e fai i tua i Lepa, ona ou fiafia lea ou te au i le uafu. Ma le faaaloalo lava faafetai.

SUI FOFOGA FETALAI: Se o le ituaiga tofa lena e pule lava le tagata ia i lona finagalo. Se i tuu atu le avanoa i le Minisita.

Susuga Hon Papaliitele Niko Lee Hang: Ia faafetai lava mo le avanoa. O le mea lea ou te fia tulai atu ai. O lea foi ua toe tau mai e le sui usufono lea le mea lea o le tefisite. O lea la ua ou iloa nei le tagata na mafua ai le mea lea. E faapea lava au o le Afioga ia Laauli, o lona uiga o fautuaga a i lea e ave i i lea e sese mai ai ma Laauli ia. O Laauli ua leva ona malamalama i mea ia, deficit, ma e le faatupeina e ni deficit po o ni a i le paketi mea ia e te saunoa mai ai. E sue lava e le Malo se tupe, a le maua fesoasoani aumai fua, ia fai le loan. O le a le mea e popole ai le loan? O lea lava e mafai gafatia e tatou na totogi. Ma aua e te popole e le totogia e alo ma fanau a Vaiusu ni loan. E totogi i tupe ia e sue mai e le Malo e faatupe ai le paketi... Se e le i faataga... e soli Fono.

Afioga Faumuina Asi Pauli Wayne Fong: Lau Afioga i le Fofoga Fetalai, o lea e faalogo atu, faafetai lava o lea ua maua...

SUI FOFOGA FETALAI: Se i faaiu mai le saunoaga a le Minisita...

Susuga Hon Laauli Polataivao Leuatea (Gagaifomauga Nu.3): Lau Afioga i le Fofoga Fetalai, se o lea ua taua fua lo ta igoa faamolemole.

SUI FOFOGA FETALAI: Ioe Laauli se i uma oo atu, ae lea se i...

Susuga Hon Laauli Polataivao Leuatea: E leaga o lea ua ta lavelavea atu ai fua i mea a Papalii.

Susuga Hon Papaliitele Niko Lee Hang: E leai o lau faatoesega ia Laauli...

Susuga Hon Laauli Polataivao Leuatea: E sese lau upu, e fia faasao faamolemole.

Susuga Hon Papaliitele Niko Lee Hang: E leaga o Laauli lea na laga mai le tefisite anapo. Ae o lea sa ou faapea o lea la ua iloa o le fautuaga mai lona uso laititi lea i ona autafa. O lea e tau faasao atu lava le mea lea.

Afioga Faumuina Asi Pauli Wayne Fong: Lau Afioga i le Fofoga Fetalai, e le o au o se uso latiiti o Laauli faamolemole. O le uso matua, ae le faapea o au o se uso laititi.

SUI FOFOGA FETALAI: Ia alaala i lalo sui usufono, se i faamaea pea le saunoaga a le Afioga i le Minisita o Galuega Tetele.

Susuga Hon Papaliitele Niko Lee Hang: A umi foi ona faamatala se mea ua atili ai ona valea, ae taatia ia faapena. A le malamalama lava le malamalama. Ae o lea lava ou te fai atu au i le mea sao. E leaga e le o se gau le mea lea o le tefisite.

Susuga Hon Tuilaepa Auelua Fatialofa Lupesoliai Lolofietele Neioti Aion Galumalemana Dr. Sailele Malielegaoui: Lau Afioga i le Fofoga Fetalai, ua tauau lava ina le mafai ona ou tu atu e faatu le lafo, e aveese ai ituaiga tagata le mafaufau faapea. O le tulaga lena e tatau ona oo i ai. O se faipule e sau ma faaali soo lona le mafaufau i totonu o le Maota lena. Ua tauau lava ma lalata mai lava lou faatuina o le lafo, ave i fafo o le Maota ituaiga tagata le mafaufau faapenei. Ua tauau ina le mamalu ai felafolafoaiga a le Maota. Se mea leaga se mo mea o faipule leai ni faiai.

SUI FOFOGA FETALAI: Ou te faasilasila atu, ua ou faamutaina le talanoaina le mataupu lea e pei ona laga e le Minisita o Atinae ma Galuega Tetele a le Malo. Ae o lea e matau atu, ua e tulai mai.

Susuga Hon Laauli Polataivao Leuatea: Ioe, lau Afioga, o lea na ou tatalo atu.

SUI FOFOGA FETALAI: O le mea lea na e fia faasaoa lea ua mau i faamaumauga.

Susuga Hon Laauli Polataivao Leuatea: O le mea lea na saunoa i ai Papalii. E le i limataitaina au i le finagalo lea ua tuuai mai faapea o fautuaga a le Tofa ia Leatinuu, lea e ala ai ona ou tulai atu. O lou

lava manatu. O lau foi lena faauigaina o le upu lea deficit. Afai foi o la outou faauigaina lena, fai la outou faauigana. Fai foi le matou faauigaga, ae faamasino le atunuu. Ona taatia lea i lagatonu. A o le tulaga lea faapea ua ou taitaiseseina, e le taitaiseseina au e se isi. Ou te alu lava au i lou lagona ma lou talitonuga. Afai foi o lou talitonuga lena Papalii, o lou lena finagalo. Ae aua le faapea mai, ua taitaiseseina au e se isi. E leai, tatou o e faamasino le atunuu po o le a le mea e tau o le tupe gau.

SUI FOFOGA FETALAI: Se i tuu atu lava le avanoa i le Minisita o Fesootaiga, leaga o lea e naunau mai lava.

Afioga Hon Afamasaga Lepui ai Rico Tupai (Minisita mo Fesootaiga, Faamatalaga ma Fesootaiga Vavave Faaneionapo): Ioe, malie lau Afioga ua ou tulai atu, i le faapea po o fea e sau ai tupe ia. Ae lua lava laina e fai i le mea. A faapea le uafu, e faapea le tupe e maua. A faapea le uafu, e faapea foi le tupe e maua. O i ina e amata mai ai tupe e totogi ai le mea lea tatou te talanoa ai. O le faigafie ia o le mea lau Afioga. Faafetai.

SUI FOFOGA FETALAI: E ala foi ona ou avatu le avanoa i a outou Afioga i Minisita, leaga o outou e i ai le collective responsibility. E fesoasoani le isi leaga o outou o le Malo, le Kapeneta, o lea tou te i luga o le laulau, o lea e faasoa ai ia fuafuaga tetele a le Malo. O le ala lea o le tuu atu o le avanoa. Ia malie sui o lo o fia tulai mai, o lea ua maea le mataupu. O lea o le a faasee i le Minisita.

Afioga Fuimaono Teo Samuelu Teo (Falealili Sasae): E le o le mataupu lea lau Afioga se avanoa laititi, e le o le mataupu lea. Lau Afioga, se i vagana ua faataga mai.

SUI FOFOGA FETALAI: O le taimi lena o lea o le a tatou agai i le Minisita o Tupe, seivagana la o se...

Afioga Fuimaono Teo Samuelu Teo: E leai o le tautaualemau lau Afioga, pe a faapea. Ona o lea e matau ma le totoa e matou nei, po o ai ea e faataga ona tutu ae lava i luga fai atu le saunoaga. Ae o ai e faataga ma e saunoa i ai, ua soli Fono. Ae o lea ou te matauina, e na o le faalua lava ona ou tau tu atu i le po lea ua tuanai, ae e faaaogaina le upu, ua malomaloa i le Maota. A o lea ua faafia selau ona tu i luga, e aunoa ma se avanoa e te tuu maia. Ae leai se mea o e fautua i ai. Ma le agaga faaaloalo.

SUI FOFOGA FETALAI: Malie le sui usufono, ua uma ona ou faia le faaiuga, sa ou tuua foi le avanoa leaga o lea e tuuaia. E tatau la ona tulai mai, o lea la ua iu le mataupu. O le tali mulimuli, o le Malo. Malie la e le tatau ona toe tulai mai se isi sui i le mataupu lea ua fai i ai le faaiuga a le Nofoa.

Ou te tapa lau Afioga i le Minisita o Tupe, e faaauau lau saunoaga.

Afioga Hon SILI EPA TUIOTI: Lau Afioga i le Fofoga Fetalai, ona ou oo mai lea i se faamatalaga i fuafuaga alualumamao a lo tatou Malo o lea o lo o faavae ai gaioiga uma a lenei Vaega Faupufai. I le agaga e le alu pogisa le HRPP, e faatino ni atinae, e aunoa ma tapenaga e ao ona faatino muamua.

O lea sa ou faalauiloa muamua le faamoemoe o le Malo i lana taiala mamao mo le lumanai o le Samoa 2040 ia po o Samoa 2040. O lenei fuafuaga o lo o faataoto ai vaega autu e 7 o le a ave i ai le faamuamua a le Malo, aua le uunaia o se tamaoaiga malosi i totonu o le isi 20 tausaga o lumanai. O nei vaega e 7 o le a ave i ai le faamuamua, o le a aafia ai le: 1. Siitia mauuluga le atinae o faatoaga. 2. Ia malosi ma mausali le atinae o Turisi. 3. Uunaia le tulaga o fesootaiga faaneionapo. 4. Siitia avanoa faigaluega faavaitaimi. 5. Ia saogalemu ma malupuipua Samoa. 6. Atinae gafataulimaina e tali atu ai i suiga ogaoga o le tau. 7. O le tulaga mauuluga i auaunaga tau le soifua maloloina ma le aoaoga.

O lea ua maea tapena tapenaga uma o lenei taiala. Ma ua sauni nei le Malo e faalauiloa ma amata faatino loa ana fuafuaga mamao mo se manuia o Samoa, a o tatou aga atu i le folauga o le isi 20 tausaga o muamua. E i ai nisi o luitau sa feagai ma le Malo a o tapena lenei taiala, e pei o suiga tetele sa toe fetuunai mulimuli ina ua aafia le lalolagi i le Koviti-19 ma ua le mautonu ai foi nisi o atinae ma vaaiga taulai. Sa i ai faatofalaiga, 1. O le agaga o le faafetai, o lea ua taoto i lagatonu lenei galuega tele, ma ua tatou sauni foi e faatino ma ave le faamuamua i vaega autu e tatau ona siitia mauuluga. Ina ia ausia ai matatia ma sini autu ua faatulagaina mo Samoa i le isi 20 tausaga, e pei ona faataotoina i vaega nei. 1. O le ausia ma le siitia mauuluga o le tamaoaiga i tausaga taitasi. 2. Ia siitia ma faaopoopo avanoa faigaluega i tausaga taitasi. 3. Ia faaleleia atili le tulaga o tupe maua a le Malo mo ana atinae faatino. 4. Ia manuia ma siitia le tulaga o le tamaoaiga mo tagatanuu uma. Lau Afioga i le Fofoga Fetalai, e tele atinae tetele a le Malo lea ua amata faataoto nei, e lagolagosua ai i taumafaiga ina ia ausia manulauti o le Samoa 2040.

E le o toe po malae i le faamuamua a lo tatou Malo o lo o ave i le atinae tau faatoaga ma faiga faiva. O nei atinae e aofia ai auala galue ua fesootai ai afioaga ma eleele o lo o galulue ai. Ua amata faagasolo

foi polokalame o lo o fai paaga ai le Malo ma Faalapotopotoga mai fafo e pei o le Faletupe o le lalolagi, o le IFAD ma isi paaga ua faaigoaina o le SAF-PROM, lea o lo o faafoeina nei e le Matagaluega o Faatoaga ma Faiga Faiva. O lo o uunaia malosi foi e le Malo e auala atu i le Faletupe o Atinae o Samoa nonogatupe mama, mo le faamoemoe e fesoasoani i le aufaifaatoaga ma a latou atinae. O lea ua faamatuu atu foi vaegatupe e faatuina ai fale ma masini e amata gaosia ai e le Faalapotopotoga o Suesuega Faasaieini o Samoa ni oloa e gaosi mai a tatou lava faaeleeleaga. E i ai foi le tuutuuga faapitoa mo le aufaifaatoaga e mafai ona saofaga ai i fesoasoani, mo concession a le Malo mo atinae e maua ai galuega mo fanau a Samoa. Mo atinae gafataulimaina e tali atu ai i uiga o le tau, ua uma ona faalauiloa atu e Minisita o le Kapeneta nisi o poloketi tetele ua uma ona faia feutagaiga ma le Matagaluega o Tupe ma a tatou paaga mai fafo. Ma ua i ai ioega e faatino loa i se taimi lata mai. E aofia ai ia: 1. Faatanoa tele i Alaoa, e US\$100 miliona lona tau ma o le a faatupe atoa i fesoasoani grants e le Faletupe o Asia ma le fesoasoani mai a le Malo o Ausetalia. 2. Faaauuina o le fausiaina o le talivai sima i le apovai i Vaisigano mo le puipua ma le saogalemu o i latou o lo o alaala ma papaaao i lea vaega o le atunuu. O lo o faagasolo feutagaiga ma le Green Climate Fund e faamautu nisi o aiaiga ae le i amata faatino galuega i se vaitaimi o lenei tausaga. Ou te fia faailoaina foi se tasi o fesoasoani tele o lea poloketi i aiga, Faalapotopotoga Tumaoti ma Pisinisi tau lata ane i le apovai i Vaisigano. O lea ua maea ona faamatuu atu i ai le \$3.9 miliona muamua i talosaga ma atinae e 192 i le tausaga na tea nei. O lea foi ua faagasolo tapenaga faaiu mo le 319 o talosaga i le tausaga nei i lona tau atoa e \$6.9 miliona. 3. O le auala kolosi mai Tanugamanono e agai atu i Siumu le cross island road. O lea ua i ai le ioega a paaga e faatupe ai, ae o lo o faagasolo feutagaiga i ata ma konekarate. 4. Auala tele e agai atu i sisifo o Upolu. O lea o le a faaauuina mai Malua i Faleolo i le west coast road, ma le auala tele i le itu sasae o Upolu, mai Moataa i Aleipata, le east coast road. O lea foi ua tuuina atu i paaga mo le faatupeina o fesoasoani. 5. O lea foi ua tapena le Malo e faatupe i ana tala o le tupe taligalu ma isi aseta manaomia mo le puipuiga lautele o le atunuu, aemaise afioaga ua mautinoa ua le saogalemu gataifale i le taimi nei i le malosi o le galu ma le siisii o le suasami. 6. O le toe faatulagaina o le taulaga i Salelologa ina ia maua uma ai auunaga a le Malo, ma maua uma avanoa faigaluega, faapea atinae e uunaia ai pisinisi i Salafai. 7. Ua 2 nei tausaga talu ona faatuina le insure a le Malo, Self Insurance Fund. O se faaputuga-tupe e tua i ai galuega e toe faaleleia mo atinae tetele a le Malo, pe a aafia i le lumanai i faalavelave faale-natura

matuia. Mo le silafia o nisi o aseta tetele a lo tatou Malo, ua i ai le faamalumaluga a lenei insure. E aofia ai le Maota autu o le Malo i Matagalalua, Maota o le TATTE, o faleaoga, Maota Gasegase, Iunivesite Aoao o Samoa, Maota Fono lenei i Mulinuu, ma isi aseta taugata a lo tatou Malo.

Mo le vaega o turisi, o lea ua amata faataoto nisi o fuafuga a le Malo, e aofia ai le fetuunaiga mo se vaalele fou a le kamupani o le Samoa Airways. O le fausiaina ma le faaleleia o malaevaalele i totonu o le atunuu, e le gata i Upolu nei, ae faapea foi Salafai faapea isi fesoasoani tuusao i le vaega tumaoti o turisi. E pei ona faatino i lalo o faamamaavega a le Malo. O lea foi ua taoto tapenaga mo isi atinae tetele a le Malo o lo o ave i ai le faamuamua i le Samoa 2040. E aofia ai: 1. Siitia ma faaleleia fesoataiga faaneionapo. 2. Sailia o avanoa i galuega faavaitaimi e pei na i ai talanoaga ma paaga. 3. Faatino gaoioiga e maua ai le saogalemu o tagata Samoa uma. 4. Aemaise o polokalame ma atinae tau aoaoga ma le soifua maloloina, ua maua ona ua uma ona ou taua muamua. Ma le tele o isi fuafuaga o lo o tau faasoasoina atu, e fua i le seleni ua tatou maua aemaise o le mafai ona faatino e le afaigaluega.

Lau Afioga i le Fofoga Fetalai, e soosoo tauau fuafuaga mamao a lo tatou Malo mo le isi 20 tausaga ma se tasi o ana fuafuaga ua taua. O le taiala mo le atinae o Samoa, Strategy for Development of Samoa SDS, e 5 tausaga le umi e faatino ai. O se avanoa foi e mataituina ai galuega ma atinae e faatino o lo o faamoemoe i ai le ausia o taunuuga moomia, aoatotetele ua faataatitia i lalo o le Samoa 2040. Lau Afioga o le taiala mo le atinae o Samoa o lea ua tapenaina nei mo le isi 5 tausaga o lumanai, o lo o saofaga uma ai galuega ma faailoilo faatino mo vaega maoti e 14 o le tamaoaiga. E aofia ai; 1. Mataituina o le tamaoaiga, po o le Finance Sector. 2. O vaega o Faatoaga ma Faigafaiva, Agriculture and Fisheries. 3. Vaega o fefaatauaiga i totonu ma fafo atu o Samoa, po o le Trade Commerce and Manufacturing Sector. 4. O le vaega o tagata tafafao maimoa mai, le Tourism. 5. O le Vaega o Pulega ma Auaunaga lautele a le Malo, Public and Administration. 6. Vaega a le Soifua Maloloina, Health Sector. 7. Vaega o Aoaoga. 8. O atinae o Nuu ma Afioaga, le Community Sector. 9. Vaega o le Tulafono ma le Saogalemu, Law and Justice Sector. 10. O le Vaega o Vai. 11. O le Vaega o Felauaiga. 12. Vaega Fesoatai Faatekonolosi, Communication Sector. 13. Vaega o Malosiaga, Energy Sector, ma le 14. Vaega o le Siosiomaga ma le Suiga o le Tau, Environment Sector.

Lau Afioga i le Fofoga Fetalai, ua tuu faatasia ma tapenaina nei fuafuaga mamao. E aofia lea i le Samoa 2040 ma le taiala mo le atinae o Samoa i le 5 tausaga muamua e ala i faatalanoaga sa faasoa,

faasoa ai ma le atunuu atoa faapea paaga uma a le Malo, ma aumai ai lo latou fingalo tatala, ma le tofa loloto e ala i atinae ma gaoioiga talafeagai e ao ona faatino ina ia siitia maualuga ai le tamaoaiga o Samoa. E maualuga le faamoemoe o nei taiala ma fuafuaga mamao, o le a ausia ai le sini autu o la tatou folauga, o le siitia lea o le soifua manuia o o tatou tagata uma. O le faa-Peretania, improve quality of life for all. Lau Afioga i le Fofoga Fetalai, o atinae ma fuafuaga uma a lo tatou Malo o lo o sosolo lelei...

SUI FOFOGA FETALAI: Ua ou faalavefau o folau le sa tele o lau Afioga i le Minisita o Tupe, ua manatu lava e ese le taua o le sao o lau Afioga. Ae peitai e le mafai ona tuua ai le mea e tataua ona fai o le tatou galuega.

E talu ai o lea ua tatou taunuu i le tatou taimi malolo masani, ou te faasilasila atu ua faataatiaese nei Galuega a le Maota mo lana malologa masani.

Na faataatiaese Taulumaga a le Fono Aoaio Faitulafono mo lana malologa masani i le itula e 4:10 i le afiafi ma toe faaauau i le itula e 5:00 i le afiafi.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu 1) 2020/2021.

SUI FOFOGA FETALAI: Ou te faasilasila atu ua toe amatalia nei Taulumaga o le Fono Aoaio Faitulafono. E i ai le manatu o lea ua sao i alo le taumafataga aua foi se faamalosiगतino i le paia o le Palemene. E momoli le faafetai i le afioga i le Failautusi ma le paia o le Ofisa aua le latou gasesega i lenei aso. Malo le tapena, aua le mamalu o le Palemene.

E faataatiaese galuega a le Maota o saunoa le Afioga i le Minisita o Tupe. O lea ou te tapa ma le faaaloalo lau Afioga i le Minisita e tulai mai, e faaauau lau saunoaga.

Afioga Salausa John Ah Ching (Faleata Sasae): Lau Afioga i le Fofoga Fetalai, pe maua se avanoa, o se mea e fia faamalalalama faamolemole.

SUI FOFOGA FETALAI: O le a maua le avanoa.

Se i saunoa lau Afioga i le sui mamalu mai Faleata.

Afioga Salausa John Ah Ching: Faafetai tele mo le avanoa i lau Afioga i le Fofoga Fetalai. Ua manaia tele foi le folasaga a le Minisita o Tupe i fuafuaga alualu mamao a lo tatou Malo mo le isi 40 tausaga. Ma e mea mananaia ia e faafogafoga ai le atunuu, e nonofo malie ai ma faatalitali le taimi e oo mai ai faamanuiaga. E pau lava lea o si mea laititi lea na faalau mai, po o le numeru 6 o tapenaga nei. O lea e sau ai taligalu, o le mea la lea e fia malamalama ai faamolemole. Pe aafia ai ma talivai o ala vaitafe i le mea lea po o le mea o se mea ua pau, pe tatau ona tuu i ai, ia talivai o vaitafe. Ma lou faaloalo lava.

SUI FOFOGA FETALAI: O lea ua maua... Tuu atu le avanoa i le sui usufono mo Anoamaa i Sasae.

Afioga Alaiasa Muagututi'a Moefaauouo Malagaitutogiai Sepulona Moananu (Anoamaa Sasae): Ia, faafetai mo le avanoa i lau Afioga. O lea foi ua maea palegaaau le taliga o le sua i le paia o le Maota. Ou te nofo lava ma ou lagona le agaga faafetai ona o lea ua saunoa le Afioga i le Minisita i le tulaga lea ua uma ona pasia le tupe lea e fai ai lo matou auala lea i le itu i Sasae. Ia o se toatuga e oo mai lava i le taimi nei o faafeagai pea ma si o matou itu o le atunuu. Ia o lea ou te faafetai ai i le Afioga, ua le gata i lo tatou auala i le itu i Sisifo, o lea lava ua o tatou tietie i ai i le matagofie o le tapenaga a le Malo, ia lea foi ua faapea foi i le itu i Sasae lea o le a oo i ai le fuafuaga matagofie a le Malo.

Ae i ai nai au faamaumauga lea i fuainumera lea na tolaulau e le Afioga i le Minisita, se o lo o atagia ai leaga o lea sa ou tautala i le mea lea o le Debt Service Ratio. Ia lea la ua aumai e le Minisita le ata foi lea ae mo le malamalama foi lea o si o matou itumalo, e \$2.1 piliona lea ua taua o le GDP, ae 11% lea e alu i le totogiina o loans. O lona uiga e \$238 miliona ia ao o le tupe maua lea e maua e le atunuu e \$638 miliona ia o lea la e malamalama ia si o matou itumalo, e \$460 miliona lea e totoe mai ai mo atinae. E ese la le manaia o le ituaiga fuainumera lea pe a malamalama lelei si ou itumalo, ia ma nai tagata leaga o le itumalo seiloga foi o le leo o le sui usufono faatoa malamalama lelei ia tagata o le itumalo.

Ia ae faamolemole lau Afioga i le Minisita, e i ai lava nai mea ia ou te le iloa pe oo i ai lau lauga i se taimi. A o mea ia o pyramid scheme, ia ma nai mea ia o isi ituaiga investment ia ua sau nei o coins ma mea na, se pe mafai ona toe faamalamalama atili, ia mo le silafia foi o le tatou atunuu, leaga ua fai si tele o le au taufaasese lea e

feoai nei i totonu o le atunuu e faaseseina tagata. Ia ma le agaga faaalalo ia manuia le faaauuina o le lauga.

SUI FOFOGA FETALAI: E taua tele le finagalo o le sui usufono mamalu faatoa faamaui atu nei aua o le tasi lea o sui usufono o le sui o le au suetusi o Samoa. O lea la e matua manino lelei i mea ia, ia lea na saunoa ai nei. Ia amuia lea itumalo. Ia, o lea ua e saunoa e lelei lava le ifo o le fuiniu i le lapalapa ia. Ioe, e faalogo lava le itumalo i lo latou sui usufono na tusi aao i ai ona atoa lava lea o le lio o mea uma. Ae o le faalogo fua i le tagata ese ia e le afaina lena.

Ae tapa lau Afioga i le Minisita o Tupe e faaauau lau saunoaga.

Afioga Hon SILI EPA TUIOTI: Faafetai i lau Afioga i le Fofoga Fetalai, se i ou tali i ai i fafo pe a manava le tatou... i tulaga ia.

Lau Afioga i le Fofoga Fetalai, o atinae ma fuafuaga uma a lo tatou Malo, o lo o sosolo lava i atinae sa faataoto mai i le amataga o lenei Paeaiga. Ae tualuga lava i le Tulafono e pito sili ona taua, a vaai atu loa i se mea ua tataua ona fai, fai loa. E le sao ma le moni faamatalaga taufaasese o lo o folafola e nisi toaitiiti e faapea, e faatali lava le Malo se i lalata mai faiga filifiliga faatoa faatino lea o atinae.

O le mea moni lau Afioga i le Fofoga Fetalai, e faaauau pea galuega a le Malo i aso uma. E faataua e le Faigamalo a le HRPP le atunuu e ala i auaunaga eseese e ala i le taupati mai ai o so o se Samoa, i so o se taimi e latou te savalia ai Taitai o le atunuu mo se fesoasoani. Ia ae pau le tulaga i ai pe a faapea e talafeagai lelei ma faiga faavae ma tapenapenaga.

Lau Afioga i le Fofoga Fetalai o le a ou faailoa atu nisi mataupu sa laga e sui usufono mamalu e faasaga i Matagaluega ma Faalapotopotoga o lo o ou vaaia i le taimi nei. Muamua, o le Faalapotopotoga o Faaputugatupe a Tagatanuu o Samoa po o le NPF. I totonu o le 5 tausaga o lenei Paeaiga, ua siitia a latou meatotino po o aseta i le \$278 miliona tala mai i le \$578 miliona i le 2016 i le \$856 miliona tala, lea ua faamaui i le taimi lenei.

O a latou tupe mama faasili, ua taoto i se tulaga malosi, e pei ona faamaui ai le \$59.8 miliona tala tupe mama i le tausaga 2021, faatusa i le \$30.4 miliona tala i le 2016. Ona o le siitia maualuga o a latou tupe mama, ua siitia maualuga ai foi tupe faasili ua tuuina atu i le aufaisaofaga. Ma le \$33 miliona tala sa faamatuu atu i le tausaga i le 2016, i le \$64 miliona i le tausaga 2020.

Lau Afioga o lea ua siitia lenei le pasene o le saofaga i le 7% i le 2016, i le 10% i le tausaga nei mo le tagata faigaluega, ia faapea foi le 10% mai le Ofisa o lo o galue ai. O se suiga lenei ua siitia ai faaputugatupe mo tagata faisaofaga aua le tausiga o le lumanai pe a

malolo mai galuega. E ese mai i faamanuiaga a le aufaisaofaga ua maea ona ou taua i luga, e pei o tupe mama o lo o faasoasoina atu. O se tasi foi o lenei o Faalapotopotoga a le Malo o lo o mafai ona fesoasoani atu i le atunuu i lenei vaitau, o lo o mafai ona nono mai i le faisaofaga o lana lava vaega o faatupugatupe, e faatino ai atinae ma manaoga o le aiga i aso taitasi.

O lo o avea foi i le taimi nei le Faalapotopotoga a le NPF, ma paaga faisea i totonu o atinae tetele i Samoa nei ma atunuu mamao. E le gata ina maua ai faamanuiaga o le aufaisaofaga a o se tasi lenei o meafaigaluega, a tool, na taofia ai e le atunuu sea faavae i atinae ma faalapotopotoga tetele i totonu o Samoa, faapea ma atunuu o le Pasefika o maua ai avanoa, e avea ai le NPF ma se tasi o faisea ma manuia ai pea le aufaisaofaga.

Lau Afioga o lea ua faipaaga foi le NPF ma Kamupani Niu Sila, o lo o faafaigaluegaina a tatou tagata faigaluega faavaitaimi. O lona uiga, e le gata ina maua galuega ma lafo mai tupe i aiga i Samoa nei, ua mafai foi ona teu faafaigaluega a latou tupe i faaputugatupe a le NPF aua le tausiga o aiga i le lumanai. Ua na o Niu Sila o lo o faatino ai lea auunaga i le taimi nei, a o le faamoemoe ina ia mafai ona faasopolia a tatou tama fanau, i so o se atunuu o galulue ai, e aofia ai ma Ausetalia.

Ou te fiafia foi e faailoa atu, o lea ua le o toe mamao ona tatalaina lea o le Ofisa Autu o le NPF i le taulaga i Salelologa. Ua matauina foi le faaauuina o le faigapaaga ma Kamupani e 3, o lo o latou faaogaina le maota o le Yazaki i Vaitele, o ni aseta a le Faalapotopotoga a le NPF o lo o aoina mai ai tupe faasili e fesoasoani e siitia ai faamanuiaga, mo le aufaisaofaga i tausaga taitasi.

O lo o faagasolo foi sailiiliga a le Faalapotopotoga, pe ua alagatau ona faavaeina se Inisiua faapitoa mo le soifua maloloina a le aufaisaofaga aemaise lona talafeagai i lenei vaitau o faamai pipisi e ono lepetia ai le ola maloloina o tatou tagata.

Lau Afioga i le Fofoga Fetalai, ou te fautuaina le Pulega o le NPF ina ia faatopetope lenei suesuega ina ia mafai ona fesoasoani ai foi i le aufaisaofaga ia e afaina i tulaga o faamai pipisi i lenei vaitaimi. O le 2 o Faalapotopotoga o le gaoiga faatino a le Faletupe Tutotonu o Samoa le Central Bank of Samoa.

Lau Afioga o nisi nei o faailoilo taua o lo o tuufaatasia e le Faletupe Tutotonu o Samoa, ma manino ai le tulaga o lo o taoto ai le tamaoaiga. I le tulaga o le tau o le soifuaga, po o le inflation...

Afioga Hon Faumuina Tiatia Faaolatane Liuga (Palauli le Falefa): Lau Afioga i le Fofoga Fetalai...

SUI FOFOGA FETALAI: Malie lau Afioga i le Minisita o Tupe o lo o saunoa, ia tuu le avanoa o lau Afioga i le sui usufono o Palauli le Falefa, ona o lea sa taua i lau saunoaga autu.

Afioga Hon Faumuina Tiatia Faaolatane Liuga: Faafetai i lau Afioga i le Fofoga Fetalai, faafetai foi i le Afioga i le Minisita o Tupe i le malamalama o folasaga e pei ona faafoe ai ia lo tatou tamaoiga ma le faaaogaina o le oa ua tuuina mai i o outou aao ma o tatou lima.

Sa ou talosagaina pe tuualalo i le Minisita, le tulaga lea o le voluntary contributors. E a foi lea leaga o la e talia e le NPF, ae e le o tutusa ia le treat ina o le aufaisaofaga ia, lea lava e avatu a latou faisaofaga, e pei lava ona fai atu o le isi auvaega e lavea ai o le aufaifaatoaga, o le aufaifaiva, o nai faifeau. O i latou nei, ia e lelei lava i faifeau e toatele ia aulotu a o faifeau e le o toatele ni aulotu, tasi lea faaputugatupe e tua i ai i le taimi e oo mai ai ia le tagata matua.

E pei la o lau talosaga, pe le silasila le Minisita ma le Pulega o le NPF i le toe fetuunaiga pe toe fai se teuteuina o le Tulafono ina ia tutusa ai faamanuiaga o nai tagata foi ia e le o ni tagata faigaluega, a o la e fiafia e teu ia latou tupe i le NPF ma lou faaaloalo.

SUI FOFOGA FETALAI: Ia faafetai, tapa ma le faaaloalo lau Afioga i le Minisita o Tupe e talifuitau i le saunoaga a le sui usufono mamalu.

Afioga Hon SILI EPA TUIOTI: Faafetai i le faafesili a le sui usufono mamalu. Ia e pei foi ona taua le tulaga lea i le NPF o lo o vaavaai i se tulaga foi lea e fai ai se tatou vaega foi lea faa-inisiua o a tatou faisaofaga, ia o le taimi foi lenei aua e le faapea o le a tumau ai lava tatou, e tatau ona fai ma o tatou vaai e po o a tulaga lea ua i ai, e mafai ona faalautele atu i ai nisi o auaunaga o i ai, i a tatou faalapotopotoga.

Ma o se tulaga e tatau foi ona tagai i ai le Komiti Faatonu ma le Pulega, ia ona aumai lea e tilotilo i ai. A o le tulaga lava latou ia pe a faapea i le tulaga lena, e le tutusa foi lea le tulaga o latou lea e faigaluega e totogi ia le latou contributions, a o lo o i ai foi ma le contributions a latou o lo o faigaluega ai. Ia a o le vaega lea e tatau ona toe vaai i le Tulafono, suesuega o le Tulafono, pe a faapea e mafai ona liliu, a fai e mafai, e tatau lava ona fai se faataitaiga ina ia inform ai ia le tatou fund.

Afioga Hon Faumuina Tiatia Faaolatane Liuga: Ia lau Afioga i le Fofoga Fetalai e toe...

SUI FOFOGA FETALAI: Malie lau Afioga i le Minisita se i toe tulai mai ia le sui usufono mamalu lea, o Palauli le Falefa.

Afioga Hon Faumuina Tiatia Faaolatane Liuga: Faafetai i lau Afioga mo le avanoa, faafetai i le Afioga i le Minisita mo le faamalamalamaina o le itu lea. O le a avatu le faataitaiga e te silafia ai le mea lea e taumafai atu ai.

A faapea o contributors foi lea i tulaga o tagata faigaluega, e te amata loa ona e totogi, e entitle i benefits uma. Mo le faataitaiga, a faapea e te join nei, taeao maliu lou toalua ma lou atalii, e maua le benefit. A o le tagata lea e voluntary, e 2 tausaga e faatali ai. Ma lou faaaloalo lava.

SUI FOFOGA FETALAI: Ia, o lona uiga e i ai le eseese lea e taumafai atu ai le sui usufono. Tapa lau Afioga i le Taitai o le Maota.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, masalo e sili ona taatia mai o lea e faafogafoga mai ia Ofisa Sili o Pulega. Ou te lagona foi e faigata i le Minisita ona tali vave atu ona o le itu lea e ono tele ni mafuaaga. E ono tele lava ni mafuaaga aemaise foi lea ua e taua ia mo voluntary contributor. E le faapea e voluntary, ona regular ai lava lea o latou totogiina. O le aso ua fai, misi ia masina toe fai. E tele lava mea faapena ua oo mai ia te au. E le faapea lava e tipi lava e tai 2 vaiaso ma totogi, 2 vaiaso ma totogi.

Ae e ono tele nai lavelave o i ai, ae o lea ua aumai lou fingalo. Ia taatia lea e tilotilo i ai latou po o a ni lavelave o i ai, ma ni afaina o seleni a i latou ia e a foi o lo o teu, aua manatua foi a fua la i le tagata faatoa alu atu. Ia o le a te i lava o lea faatoa tasi ona join atu ae entitle loa i le mea lea? A o lea faatoa totogi lana tupe. O lona uiga e maua lava le toe sau, pe le toe sau, ae o le agaga lava o le mea lea ia maua lava e oe le tului e faasino lava i lau seleni lea e avatu. O lona uiga la, a fai le mea lea e aumai, o tupe la a isi tagata le a e te fai ai lou ivi.

O le mea la lea, e tele le mau lavelave taatia mai o lea ua aumai lou finagalo. Se i tilotilo i ai le Ofisa.

SUI FOFOGA FETALAI: Faafetai, ia...

Afioga Hon Tuitama Talalelei Tuitama (Minisita mo Tina ma Tamaitai, Atinae o Nuu ma Afioaga ma Agafesootai): Lau Afioga i le Fofoga Fetalai...

SUI FOFOGA FETALAI: Tuu atu le avanoa i lau Afioga i le Minisita o Tina ma Tamaitai ma Agafesootai, saunoa.

Afioga Hon Tuitama Talalelei Tuitama: Ona o lea ua taua mea ia o voluntary contributors, ae mo le silafia e le Palemene e le mafai ona join ai tatou. E alu lava i lalo o Tulafono ia e 2 tausaga faatoa maua au benefits. Ia sa ou taumafai foi i le tulaga lea ona o tatou lea e i ai le Parliamentary Pension Scheme. Ia na ou talosaga lea i le NPF, ou te manao e tipi sao mai lava i lou totogi ia si au contribution e ave i i le NPF lea e... ae fai mai e le mafai, leaga o la e i ai le Parliamentary Scheme. E le mafai la ona e join i ai in that sense e pei o le mea lea sa taua e le Taitai o le Malo, ia regular lau contribution.

O lea la e alu lava seiloga e te manao e ave foi lea lump sum i lea taimi pe a maua se seleni ia ave lea faaopoopo i lau contribution o le NPF, ae e le mafai ona tipi mai i lou totogi ona o la e alu i o i le Pension. Ae sa tatau ona i ai se avanoa, a ua lagona e le member e fai sana NPF, ia why not? O si au lea fesoasoani atu e tusa ai ma le mataupu faafetai.

Afioga Aliimalemanu Alofa Tuuau (Alataua Sisifo): Lau Afioga i le Fofoga Fetalai...

SUI FOFOGA FETALAI: Lau Afioga i le Taitaifono, tuu atu le avanoa i le sui usufono mamalu, le Taitaifono o le Komiti o Tupe.

Afioga Aliimalemanu Alofa Tuuau: Faafetai, ona o lea ua taua tonu lava le tulaga lea i penisione. Ia, mo le silafia o tatou nei o sui usufono, a o lea ua atoa le tai-55 tausaga, o la ua mafai, ona fai lau voluntary contribution ae tipi sao mai la i lau Bank Account. Ia la e lavea ai matou ia e fou mai, lea sa talosaga ituaiga ia e faaauau pea, ia ae ese ai lava ia le Pension a le Palemene. Ia mo le silafia, faafetai mo le avanoa.

SUI FOFOGA FETALAI: Manatu o lea ua manino auofala i le sui usufono e pei ona i ai lona finagalo faaalua, ia ma ua maua foi le tali o le mataupu lea.

Tapa lau Afioga i le Minisita o Tupe e faaauau lau saunoaga.

Afioga Hon SILI EPA TUIOTI: Faafetai i lau Afioga i le Fofoga Fetalai, ia e pei ona taua i le tau o le soifuaga, po o le inflation e matauina le pau maualalo i le pasene o lenei faailoilo mai i le 1.91 sa i ai muamua i le 1.76 i totonu o le vaitau 2016/2020. O lona uiga o lo o mafai e le Malo ona taofiofi le tau o le soifuaga, e ala i gaoiga ma atinae faatino o lo o lagolagosua ai i le tamaoaiga a le atunuu.

Ua atagia foi i nei faailoilo, nisi o taumafaiga sa faatino e le Faletupe e tuusaunua ai le maketi o fefaatauaiga, e ala i Tulafono o aso lelei ma aso oge, lea e faaitiitia ai tau o oloa pe a tele oloa i le maketi ae siitia le tau, pe a tele oloa gaosi. O lona uiga, ua tele oloa gaosi i totonu o le atunuu, o le mafuaaga tonu lea, o le faaitiitia o le tau o le soifuaga pe a faatusa i le 5 tausaga ua tuanai atu.

O lo o faaauau foi ona faatino sailiiliga suesuega ma gaoiga talafeagai a le Faletupe Tutotonu e taofia ai fefaatauaiga faa-solitulafono o tupe i totonu o Samoa, faapea ana faipaaga ma isi atunuu. O se tasi o galuega ma matafaioi tauave o lo o ave foi i ai le faamuamua a le Faletupe Tutotonu, o le mataituina lea o auunaga tau tupe i totonu o le atunuu mo pisinisi Inisiua, Faletupe Pisinisi, faapea pisinisi laiti o lo o faafoe aitalafu, small loan firms lea ua fai si maualuluga o tului, ma ua agai atu i ai le galuega a le Faletupe Tutotonu mo le puipuia o a tatou tagata, ma faiga soonafai ma le alofa, a nisi o nei kamupani o lo o faafoeina aitalafu laiti mo le mamalu o le atunuu.

Ua amata foi fuafuaga a le Faletupe Tutotonu, e toe fetuunai ai le tau o aitalafu mo pisinisi ma tagata taitoatasi, e ala i feutagaiga i ai latou o lo o teu faa-faigaluega a latou tupu i totonu o faletupe, i le agaga e faaitiitia tului o tupe teu ina ia faaitiitia maualalo ai foi le tului o tupe nonoina atu e ala i Tulafono i se gagana faafaigofie, reduce deposit rates, translate to reduce lending rates. E pei foi o le tele o vaitaimi e toatele o latou o lo o avatu ia latou tupe e deposit i i faletupe, e mananao lava e aua ne i i lalo ifo o le 7%. Ia manatua a faapea e talia e le faletupe le 7%, lea e avatu e deposit, a alu atu la le tagata e manao e fai le aitalafu ia e mautinoa lava e le i lalo o le 10%. O le naunautaiga lena o le Faletupe Tutotonu, ina ia taumafai ona taofiofi le tulaga lea.

Mo le agai atu i le lumanai, o lo o faagasolo fuafuaga mo le faamautuina o nisi o poloketi o le faletupe. E ao ai le taofia o pisinisi solitulafono...

Afioga Afoa Amituanai Faleulu Maui: Lau Afioga i le Fofoga Fetalai...

SUI FOFOGA FETALAI: E malie lau Afioga i le Minisita, e malie lau Afioga e i ai se mea o tulai mai ai le sui usufono o Palauli Sisifo.

Afioga Afoa Amituanai Faleulu Maui: E i ai le mataupu e aafia ai le tamaoaiga o tatou tourism. O le poutu o le tatou tamaoaiga, lea e aafia ai ma le Central Bank lea ua oo i ai le Minisita lau Afioga pe mafai ona tuu mai se i fai atu ai sina faamalamalamaga ma le fautuaga foi faamolemole.

SUI FOFOGA FETALAI: Ia, leai e le sau i ina le faamalamalamaga e sau i le Malo. O se mea e fia sailia lona faamalamalamaina, o lena le upu tonu e tataua ona faaoga. Ae tulai mai le sui usufono mamalu e saunoa.

Afioga Afoa Amituanai Faleulu Maui: Faafetai mo le avanoa, ua ou tulai atu ona o le tulaga lea ua i ai le tatou Tourism Industry, ua matua faaletonu lava, tusa o lea ua poloka uma le tulaga foi lea i le fesoasoani.

Ae faafetai i lau Afioga i le Minisita sa e faailoa mai le tele o fesoasoani lea ua uma ona ave i le tulaga lea e pei o le 2% lea ua ave i le tatou faamama avega interest o nai pisinisi. Ia ma mea foi ia o tupe ia na ave i tagata ia ua le toe faigaluega lea e tai \$100, \$200 ea i le tulaga foi lea pe tasi ea le payment foi lea na avatu, o lona uiga e na o le tasi lava le masina na faaoga ai uma.

Ia ma le tulaga foi lea o le fesoasoani a le NPF, lea na avatu i contributors faafetai manaia le fesoasoani lena o le tatou Malo lea sa ave i contributors. Ae o le tulaga lea e i ai, e le i oo atu le tulaga foi lea o le fesoasoani foi lea i faipisinisi ia e aafia i lalo o le Tourism. Ou te faatusaina lau Afioga i le Fofoga Fetalai, o le mai lea e mai ai le tatou Tourism Industry, e tai pei foi lea o le tagata lea e i le ICU ua mai. E pei e pau lava le mea la e tautau ai e na o le IV, ae o la e faatalitali se mea foi lea o le paina toto. O le tulaga la lea e i ai ua manaomia e le part lea o le Industry ia se paina toto. E pei o le mea o le capital, tupe fegaioiai ona ua atoa nei le tausaga talu ona loka le tatou boundary, border, ia a ua leai ma si na tala e sau ai.

So o le uiga o lau tala, o le role la lea a le Central Bank i le taimi lena, this is their extraordinary times needs extra to all its solutions, ona fesoasoani ai lea o le Central Bank, e tai pei o le mea foi lea sa fai i le taimi o le tsunami ma le afa foi lea lata mai nei, lea sa fesoasoani ai lea sa... Minisita muamua i le faiga o special a...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, lea ua manino, ae tuu ia i le Minisita o Tupe e tali atu, ae ua manino uma lava mea na. E aafia uma ai lava pisinisi e le na o turisi, e aafia uma ai lava pisinisi. Tuu maia se i tali le Minisita o la ua manino.

Afioga Afamasaga Lepuiai Rico Tupai: O le isi mea lau Afioga ou te tulai atu ma le faaaloalo, o le lotu lea a le Afioga i le sui usufono mamalu e faasa ona tui le toto.

SUI FOFOGA FETALAI: Saunoa le Afioga i le Minisita.

Afioga Afoa Amituanai Faleulu Maui: Lau Afioga i le Fofoga Fetalai...

SUI FOFOGA FETALAI: O lea ua manino lou finagalo, o le matau a le Nofoa e faalogologo ma le totoa, o lea lava e pei e toe agai i tua au faamatalaga ma au saunoaga. O so o se taimi lava e te tulai ai e te pese lava i le pese lea. Ae o lea e moomia le aumaia atoa o le ata o le faamoemoe o le silasila mamao ma atinae a le Malo, e le o po malae i le mea lea e tulai nei.

O le mea la lea malie le sui usufono mamalu, se i tuu atu le avanoa faasau ai pea le tali a le Minisita, e oo lava i le mea lea e te saunoa ai. O lea ua uma le isi vaega i le taimi ua sola, ae o lena...

Afioga Afoa Amituanai Faleulu Maui: O lea toeitiiti lava ou oo i ai, tuu mai sina avanoa.

SUI FOFOGA FETALAI: Malie le sui usufono mamalu, lea ua maua lou finagalo, ae o lea o le a tuu atu le avanoa. Tapa lau Afioga i le Minisita e...

Afioga Hon SILI EPA TUIOTI: Lau Afioga o le a faaauau pea lau lauga mo le agai atu i le lumanai, o lo o faagasolo fuafuaga a le Faletupe Tutotonu mo le faamautuina o nisi o poloketi a faletupe e aofia ai le taofia o pisinisi solitulafono, o lea e taua e le sui usufono o pyramid schemes, fausiaina o faamatalaga soofaatasi mo tagata uma. Know your client database. Faamalosi faigapaaga ma Faalapotopotoga mai i fafo e pei o le Faletupe o le Lalolagi ma Atinae Asia, faamaea ma amata ma faaoga loa le polokalame faaneionapo mo fefaatauaiga tau tupe, Modernisation National Payment System ma le faaauau o le faalauiloa i totonu o le atunuu, o

auaunaga a le Faletupe, faapea soligatulafono mo i latou e le o utagia ma usitaia taiala tau tupe a le Malo.

Ona see ifo lea i le Faalapotopotoga e 3 o le Pulega o Tupe Faava-o-Malo, po o le Samoa International Finance Authority.

Lau Afioga i le Fofoga Fetalai, ou te fia faaaogaina lenei avanoa e momoli ai le faafetai i le Pulega ma le aufaigaluega, mo le sao o le Faalapotopotoga i le faatupeina o le Tala o le Tupe a le Malo i tausaga taitasi lea sa matauina foi e \$15 miliona sa tuuina mai i le Tausaga Faaletupe 2020/2021, e fesoasoani ai i le Tala Faatatau o le Autu o le Tupe a le Malo. E tele foi fesoasoani tuusao a le Faalapotopotoga lenei ia autaaalo a Samoa o lo o tausinio i faaagatama faava-o-Malo, faapea fanau o lo o tapena a latou taleni i taaloga o lo o faia i Samoa nei.

O lo o matauina pea le lelei o tupe a le Faalapotopotoga, lea ua siitia mai ana tupe mama mai i le \$22.3 miliona i le tausaga 2016, i le \$23.3 miliona i le faaiuga o le Tala Faaletupe i le 2020. E ui ina feagai ma nisi o luitau ona o le tulaga maaleale ua aafia ai pisinisi i atunuu o lo o i ai a latou faigapaaga. E tele ni Tulafono sa faavaeina e le Faalapotopotoga i le 5 tausaga ua tuanai atu. E le gata ina faamalosia ai taiala mo le faafoeina o ana galuega faatino, ae faapea le tausisia o Tulafono faava-o-Malo o lo o mulimulitaia ai ana pisinisi.

O lo o faagasolo foi i le taimi nei nisi o tapenaga tetele o le Faalapotopotoga e aafia ai tapenaga ma gaoiga e aveese ai Samoa mai le lisi o atunuu ua aafia faiga faapaaga ma le Iuni a Europa po o le EU Black List. O nei taumafaiga uma, o lo o galulue ai le Komiti filifilia e aafia ai le Matagaluega ua tofia e le Kapeneta, e latou te soalaupule ma faatino galuega e talafeagai e vave fofu ai lenei mataupu lea ua fuafua e tatau ona maua se tali ia Oketopa o le tausaga nei.

O lea foi ua sauni le SIFA e faamaea tapenaga moomia mo le fausiaina o lona nofoaga tutotonu fou i Matagalalua, i se taimi e le o toe mamao i le tausaga nei 2021.

O faaputugatupe teu faafaigaluega o mavaega tausi a Samoa po o le Unit Trust o Samoa. Lau Afioga o se tasi lenei o miti a lenei Vaega Faaupufai ua manuia ai le atunuu i lenei vaitaimi. Ma ou te fiafia e faailoa atu nisi o latou matatia ua ausia, faatasi ai ma ana galuega ua fuafuaina e tatau ona faatinoina i se taimi lata mai. O nai matatia na ausia e le Pulega po o Management Company ma le Faaputugatupe Teu Faafaigaluega o Mavaega Tausi a Samoa, le Unit Trust of Samoa e aafia ai vaega nei: 1. Siitia le 87% mai le 1,763 i le 3,300 le faitau aofai o le au fai iunite i totonu o le 5 tausaga mai le 2016 i le 2020. E na o le 200 i latou na faatauina iunite i le 2011, lea na faavae

ai lenei faaputuga-tupe. A o lenei ua ausia le 3,300 tagata fai iunite i le faaiuga o le tausaga 2020. 2. Ua siitia i le 123% i totonu o le 5 tausaga 2016 i le 2020 tupe faavae po o tupe mau mai i le faatauina atu o iunite, Unit Holders Fund mai le \$57 miliona i le 2016 i le \$126 miliona i le tausaga 2020. 3. O le aofai atoa o tupe e toe tufatufaina atu, dividend paid are already i ana paaga fai iunite talu ona faavae mai le faaputuga-tupe i le tausaga e 2011. Ua \$30.3 miliona, o le 82% o lenei tupe po o le \$25 miliona, sa tufatufaina atu i totonu o le 5 tausaga ua tuanai atu o lenei Paeaiaga. 4. O tupe ua faafagaluegaina, i le faaputuga-tupe, sa amata mai i le \$16 miliona i le tausaga na faavae ai 2011. O lea ua ausia i le taimi nei le \$160 miliona i le faaiuga o le tausaga faale-tupe 2020. 5. O le tausaga 2017 na tatala aloaia ai le polokalame mo le lesitalaina o iunite i luga o le upega tafailagi, e mafai ai e le mamalu o le au fai iunite mai so o se itu o le lalolagi ona siaki paleni o a latou teugatupe. E o faatasi lenei polokalame ma le faamoemoe o le UTOS app, ua mafai nei ona siakiina ai paleni o teuga-tupe e faaoga ai telefoni feaveai. E le gata i lea, ua faaogaina foi MTala a le Vodafone Samoa, e tului ai teugatupe a le au fai iunite ma le manaomia ai le toe faimalaga mai i le Ofisa autu i Apia e faatino ai lenei auaunaga. 6. O nisi nei o atinae tetele a le Malo sa mafai ona fesoasoani atu i ai le UTOS i le faavaeina mai le amataga. 1. O le faatauina mai po o umia o le 25% o sea a le Kamupani a le Bluesky lea ua avea nei ma Vodafone Samoa. 2. O le faatauina mai po o le umia o le 20% o sea a le Submarine Cable Company lea e faafoeina le laina o fesoataiga mai luga o le sami. 3. Faatupeina o le fausiaina o le fale o le Malo, Samoa Centre i Aukilani i Niu Sila. 4. Faatupeina o le fausiaina o le ofisa fou o le Malo mo le High Komesina o Samoa i Ueligitone i Niu Sila lea e fuafua e tatau ona faamaeaina i se taimi o lenei tausaga. 5. E tusa ma le \$47 miliona o lo o faamatuu atu i le taimi nei i nisi o Faalapotopotoga tumaoti a le Malo, mo a latou atinae e fia faatino. 6. Lau Afioaga o se avanoa faaauro lenei e le gata ina teu faafaigaluega ai tupe a le mamalu o le atunuu, i tututuuga lelei ma malu puipuia. Ae o se avanoa taua e lagona ai e so o se Samoa le mitamita o ia e i ai lona leo po o se sao i totonu o atinae tetele a le Malo. E mafai ona faapea ifo se fai iunite, o ia e pulea le kamupani telefoni a le Vodafone Samoa o lo o i ai sea faavae a le UTOS. Ou te fia faailoa atu foi fuafuaga a le Faaputuga-tupe Teu Faafaigaluega o Mavaega Tausi a Samoa, mo le lumanai e faapea. 1. Ia faatupulaia auala e teu faafaigaluega ai tupe a le faaputugatupe e le gata i Samoa nei, ae faapea foi atunuu i fafo. 2. Ia faia ni ofisa po o ni sales agent a le UTOS i Niu Sila ma Ausetalia, ia faafaigofie ai ona oo atu lana auaunaga i ona sui fai iunite. Ma isi tagatanuu o Samoa o lo o aumau

i atunuu i fafo, e fia maua lenei auaunaga. 3. Faaauau pea ona fesoasoani atu i le Malo e faatupeina nisi o ana atinae taua. E pei o le fausiaina o se Ofisa fou o le Malo i Amerika Samoa, faapea Suva i Fiti. E mafai ona fesoasoani atu i ai le UTOS pe a talafeagai. 4. Toe fetuunai matafaioi a le Faalapotopotoga ina ia mafai ona teu faafaigaluega tupe a le au fai iunite i fanua ma fale, faapea aseta tau pisinisi, Commercial Property Development Projects. 5. Faalatele atu a latou auaunaga i Savaii ma afioaga i tua, e aofia ai ma le faatuina o se Ofisa fou i Salafai. Atonu o le a mafai ona faatu lea ofisa pe a fai le fale o Ofisa a le Malo i Salelologa. 6. Ia ausia le 10,000 o i latou e avea ma sui fai iunite a le Mavaega Tausi i totonu o le isi 5 tausaga. 7. Ia ausia le \$200 miliona, o tupe faafaigaluega, o le total investment portfolio a le Mavaega Tausi i totonu o le 3 tausaga o lumanai. 8. Ma le vaega faaiu lau Afioga, o le faatuina lea o se fale faafogafale a le Malo i le vaega o i ai le flea maketi tuai i Savalalo, e faatupeina ma puleaina e le UTOS, ma mafai foi ona avea ma o latou laumua ina ia siitia ai le faalauiloa, o a latou auaunaga i totonu o le atunuu.

Ona faasolo mai lea i le Faletupe o Samoa le Development Bank o Samoa. Lau Afioga i le Fofoga Fetalai, ou te otootoina atu nisi nei o auaunaga, o lo o faatinoina e le Faletupe o Atinae e tautuaina ai le atunuu. E ui ina feagai Samoa ma luitau o le faamai o le Koviti-19, o lo o faaauau pea auaunaga tau nonogatupe i paaga a le faletupe, e aofia ai. 1. Tina ma tupulaga talavaou i vaega eseese, differentiers, o na i nonogatupe mai le \$2,500, \$5,000 e agai atu i le \$7,500. Ma e amata i le pisinisi laititi ona faauu pea, faauu lea pe graduate i le fuainumera tele atu, pe a siitia lau atinae ma moomia ai se vaegatupe faaopoopo. 2. Polokalame faipaaga, e faapaaga ai le au fai faatoaga koko, popo, ma le talo ma i latou e ana atinae mautu, e malolosi maua fesoataiga i maketi, pe faapuina foi o le value chain financing. 3. O lo o ave le faamamafa ma le fesoasoani a le Malo i le faatupulaia ma siitia ai atinae o pisinisi tau atiae laiti, o le MSMEs lea e tuufaatasi i le taimi lenei, ua oo atu i le \$34.3 miliona lona tuu aotelega. Ua matauina foi le siitia maua o lenei fesoasoani, mo atinae i le motu tele i Salafai lea ua siitia mai i le \$8.6 miliona i le 2016 i le \$17.2 miliona i le tausag 2020. 4. O lo o faaauau foi isi polokalame fesoasoani a le Malo e aofia ai le faamama avega lea sa faamatuu atu ai le \$4 miliona e uunaia ai atinae tau faatoaga ma faigafaiava i tuutuuga mama ma faigofie, ona tali manao i le atunuu o lo o manaomia le fesoasoani i atinae tau faatoaga. 5. Sa faatinoina foi e le faletupe i auala atu i le faamama avega a le Malo le stimulus package, ia fesoasoani e le gata ina faapafala ai le tului o ana nonogatupe mo ana paaga uma mo se vaitau. Ae sa fesoasoani foi le

Malo e taofia le totogi o lisi a i latou o lo o nofo totogi ai a latou pisinisi i le maota o le Faletupe o Atinae. 6. Ua amata faagasolo foi le faamoemoe o le Malo ma le Matagaluega o Faatoaga, i le poloketi ua taua o le SAF-PROM lea o lo o faatupeina e le Faletupe o le Lalolagi, ma faaoga ai le auunaga a le Faletupe o Atinae o Samoa, e faamatuu atu ai fesoasoani tupe i e e agavaa mo atinae tau faatoaga i aiaiga ua maea faatulagaina ma tatou paaga e pei o le World bank.

Mo le agai atu i le lumanai, o nisi nei o atinae o lo o fuafua e tatau ona ave i ai le faamuamua a le faletupe. 1. Ia faamalosia ma tapena faiga faavae e uunaia ai pulega lelei ma taiala manino i auunaga eseese, e aofia ai polokalame tau nonogatupe faatasi ai ma le galuega masani a le faletupe. 2. Faamalosia fesootaiga vavalalata ma Faalapotopotoga faava-o-Malo. E le gata ina maua ai avanoa e fesoasoani i tupe tuusao, ae o faiga paaga e faasoa mai ai le tomai e ala i tagata faapitoa po o technical assistance e mafai ona fesoasoani i polokalame ma fuafuaga mamao a le faletupe. 3. Le faaopoopoina o fesoasoani tuusao a le Malo, capital injection from government e lagolagoina ai atinae e faamuamua e pei o atinae o faatoaga ma atinae o faigafaiva. 4. Ma le vaega mulimuli lau Afioga, sa ou taua i se tasi o fonotaga o vaiaso na tea nei, o fuafuaga mamao a le Malo e tapena ai le Faletupe o Atinae o Samoa e ave ma paaga aloaia, po o le Accredited Agent a le Green Climate Fund i Samoa nei. O lo o faaauau feutagaiga a le Matagaluega o Tupe ma le GCF, ina ia faamalieina aiaiga uma ina ia mafai ona ausia ai lenei faamoemoe taua. Pe a taunuu lenei miti, o le a maua le avanoa tatou te fesootai sao ai i le GCF i o tatou manaoga, po o atinae e fia faatino e aunoa ma le fesili muamua i paaga eseese e pei ona i ai i le taimi nei.

Mo le silafia e lau Afioga, o lo o ave nei se tasi o lala o le Malo Afaatasi le United Nations Development Program, UNDP ma paaga e fatinoina fesootaiga uma a le Malo ma le GCF. I mataupu ma talosaga uma e patino i le poloketi i Vaisigano. O lona uiga e le gata ina sefe ai le taimi ae maua le avanoa tatou te fesootai sao ai, e aunoa ma se faalavelave i le tele o aiaiga e pei ona feagai ma i tatou i le taimi nei. Faalapotopotoga insure tau i le soifua, le SLAC. O lo o lelei faafoeina tiute ma galuega faatino a le Faalapotopotoga. E le gata i ana tupe maua e maua i tausaga taitasi ae o lo o ave foi lenei faalapotopotoga o se tasi o Kamupani fai sea o lo o lotolotoi foi i nisi o atinae tetele, o lo o faamoemoe i ai le atunuu ia latou auunaga. A o feagai ai Samoa ma le lalolagi atoa ma luitau o le Koviti-19, o lea ua ae se finagalo o le pulega e toe fetuunai nisi o ana galuega faatino i le lumanai, e aofia ai vaega nei. 1. Faagasologa fuafuaga ma sailiiliga, pe ua alaga tatau ona faatu loa insure mo muaau pito i luma a le Malo, compulsory insurance for frontline essential workers, e tua

i ai pe a aafia ia latou galuega faatino. 2. Saili faiga paaga ma le Faalapotopotoga ACC, aua le puipuia o le aufaigaluega a le Malo i taimi e manaomia ai. 3. Faatalanoa ma fai saililiga pe ua talafeagai se insure mo gasegase auina atu i fafo, Medical Evacuation Insurance. 4. Galulue ma kamupani tekonoosi i metotia ma auaunaga e mafai ona saofaga mai ai aiga i atunuu mamao e faaoga auaunaga a le Faalapotopotoga i taimi uma. 5. Faapea tapenaga e toe faaleleia ai le Maota tutotonu a le Faalapotopotoga. Ua tele tausaga o faaogaina ma ua moomia le toe faaleleia, ma faauleleina i le taimi nei.

Lau Afioga ou te fia tali atu foi i nisi o mataupu e ese mai i vaega ua ou taua oi luga. Sa fesiligia e se tasi o lauga le tulaga popole ona o le faaitiitia o fesoasoani tuusao a paaga, po o le budget support, ma fesiligia ai pe aisea e le manino ai lona faatulagaina i totonu o le Tala o le tupe a le Malo. Lau Afioga, e sese ma le sao lea faamatalaga. Mo le faamaninoga o lena mataupu, o lo o faatulagaina atoa i totonu o le tala o le tupe so o se fesoasoani ua mafai ona tuuina mai e paaga. O itulau numera faa-Roma, o lo o faailoa atu ai i lona tulaga aoao tetele, overview nei fesoasoani uma, e aafia ai ma nonogatupe taitasi. O vaegatupe faaagaga mo Matagaluega taitasi, ua mafai ona faalauiloa ai vaega tonu po o divisions o lo o faaogaina nei fesoasoani mai a tatou paaga. O le aofaiga foi o fesoasoani faameaalofa, external grants, mai a latou paaga o lo o siitia pea i tausaga taitasi. Ma e le mafai ona tatou iloa mea o le a tutupu taeao. E fai faamaninoina foi se tasi o fesoasoani tuusao, budget support mai le Iuni a Europa, European Union, o lo o tau faamaeaina nei nisi o tapenaga e aafia ai le sainiga o feagaiga, o lo o faamoemoe e sainia i Samoa nei le faaiuga o le tausaga. A taunuu lea faamoemoe o le a siitia ai foi fesoasoani faameaalofa mo Samoa i le lumanai.

Lau Afioga i le Fofoga Fetalai, o se avanoa lelei foi lena ou te toe faaali ai ma le agaga fia fesoasoani o le Malo i le atunuu lea, ua faaoga ai lava a tatou tupe i lona tuuaofiaga e \$11 miliona e faatino ai atinae o le suavai. O se vaegatupe ua le mafai ona maua mai i le Iuni a Europa, ona o le feagaiga o lo o talia nei. O le uiga o sau faamatalaga, o le tofa fetalai a le faigamalo lena, e tali mana'o atu ai i le atunuu. Tali mana'o atu ai i le atunuu, pe a tuai ma le mautinoa se fesoasoani mai fafo e faatino ai a tatou atinae taua po o atinae foi o lo o ave i ai le faamuamua.

Lau Afioga i le Fofoga Fetalai, o lo o faaauau pea i le taimi nei feutagaiga a tatou officials le aufaigaluega a le Malo ma paaga. Ma o lo o maua pea le talitonuga o Samoa o se tasi o atunuu e matuai talitonuina lava lana Faigamalo ona o le faaoga tatauina o ana fesoasoani mai fafo. Lelei ma manino ona tapena lipoti o tupe maua

ma tupe alu aemaise o le maua pea o avanoa i taimi uma e talanoa ai ma paaga. E pei ona faaaogaina ai masini faaneiona po, virtual meetings. Ua mafai ona tatou faatinoina ona o se tasi o miti a le Malo ma le Faigamalo a le HRPP e ala i le laina fesootaiga i luga o le sami, po o le Submarine Cable Project. O lea ua fesootai ai Samoa ma le lalolagi atoa i lenei vaitau.

Sa fesiligia foi nisi o lauga le tulaga ua taoto ai le poloketi tele i Vaisigano lea o lo o faatupeina e le Green Climate Fund, GCF. Lau Afiga i le Fofoga Fetalai, ua maea le vaega muamua lea e pei ona matauina ai le talivai sima mai Vaisigano e oo atu i le auala sima i le Loto o Samsoni. Ua maea ona tapena ata ma saili foi konekarate mo le faaauuina o lenei galuega, ae peitai ua i ai nisi aiaiga a le GCF ua latou faailoa mai e tatau ona faamalieina muamua, ae o ni vaega faaopoopo e lei faailoaina mai i le amataga. O nei fesuiaiga, o lo o feutagai ai foi Sui Sinia o le Malo ma paaga ina ia vave maua ai foi se fofo, ma toe faaauau ai lea galuega. Ona ou oo mai ai lea i se mataupu sa laga e se tasi o sui mamalu. E uiga i se fesoasoani mo le aufaigaluega pito i luma po o muaau, o lo o faalagolago i ai le puipuiga o Samoa mai le Koviti-19. Lau Afioga i le Fofoga Fetalai, e \$500,000 se vaegatupe sa faalauiloaina i le tatou faamama avega lona 2. E patino i le faaputugatupe faapitoa, e faavagavaga mo ni faalavelave e ono tutupu mai i le lumanai, ma aafia ai le aufaigaluega po o le aafia foi i le faamai o le Koviti-19 ma maumau ai le soifua. O lea fesoasoani ua avanoa mo le aufaigaluega galulue ma e mulimulitai i aiaiga ua tapenaina nei pe a oo i le taimi e moomia ai. Sa fesiligia foi i se tasi o saunoaga, pe faapefea ona faatupe e le Malo le uafu ua fuafuaina e fausia i Vaiusu. Lau Afioga i le Fofoga Fetalai o le Maota, o le talosaga na tuuina atu i le Malo, ua faatinoina lenei atinae i fesoasoani faameaalofa po o le grant. Ua faailoa foi lo tatou faataua o lenei atinae mo se manuia o le atunuu, ma ua i ai la tatou maliliega, faataoto uma isi fuafuaga sa tuuina atu muamua ia Saina ina ia faatino e nisi o paaga. Ae talosagaina le ave o le faamumua i lenei atinae e manuia ai Samoa i lenei vaitau. E ala i avanoa faafaigaluega mo fanau a le atunuu ma siitia ai auauana i pisinisi o le a ave Samoa ma laumua e faatino ai, region hub for shipping. Ae ua moomia foi lenei atinae, aua e tupu pea le atunuu i le lumanai. Ma e tatau lava ona mamao le vaai aua a le faia i le taimi nei, e oo atu i le lumanai i le taimi e faatino ai ua faasefuluina le maualuga o le tau e oo i ai. O mea ia e le mafai ona oo i ai le faatofalaiga a e e vaapiapi le vaai, aemaise foi i latou e maua mea. E le o manatunatu i isi tagata ae na o i latou lava. O le itu foi i le siosiomaga ma le saogalemu o le gataifale, ua le tasi ae lasi ona faalauiloa e le Malo le tele o suesuega faapitoa, feasibility study. Ua faatino e le Malo i le agaga, e le tatau

ona i ai se vaega e lape i le silasila a le Malo ma ona taitai. O le mafuaaga foi lena e le faavave pe rush ai e le Malo le faatinoina o lenei atinae taua tele mo le atunuu. O lea sa amata talanoaina ma fuafua mai lava i le vaitau 1970 ina ia maua le atoaga o vaega uma.

E tatau foi ona faasao nisi o saunoaga le faavaea e faapea o Saina o lo o uunaia lea atinae, e matua sese lava ma tau faavalea le ana lenei lafoga tuulafoai. O lenei atinae o se miti ma se tapenaga a taitai o le Malo o Samoa.

Lau Afioga i le Fofoga Fetalai, e i ai le fesili sa faapea mai, sa tatau ona puupuu le Fonotaga mulimuli lenei a le Palemene. Ma e tele se vaega tupe sa tatau ona faasaoina mai ai.

SUI FOFOGA FETALAI: Malie lau Afioga se i vasai foi, ae maua se avanoa lelei. Saunoa lau Afioga.

Tofa Lealailepule Rimoni Aiafi: Lau Afioga i le Fofoga o le Fono, o le toe fia tulai atu lava, e le o lelei lau faalogo. Ona o lea ua manino mai i le saunoaga a le Minisita, ona o lea e le o afio mai le sui lea e lagalaga sooa le tatou uafu a o lea ua afio mai. O le atugaluga tele lea e i ai, o aitalafu. A o lea ua maua nei, pe sao lau faalogo i le saunoaga a le Afioga i le Minisita, o lea o le a grant. O lona uiga la o le faa-Samoa ea o le mea lea, faapea o lea e i ai le vaegatupe e faatino ai lea tulaga. E faafetai lava pe afai o le sao lea lau Afioga.

SUI FOFOGA FETALAI: E tapa lau Afioga i le Taitai o le Maota.

Susuga Hon Tuilaepa Sailele Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, o le mea lea sa saunoa ai, o le manao lena o le tatou Malo. A o lea la ua uma ona fai suesuega, e toe pau lea o le vaega lea e taoto e le i maea le faatalanoaga. Sa i ai le manatu o le faaiuga o le tausaga le la e oo mai ai le latou asiasiga ia ma faamaea ai loa le faatalanoaga o le vaega lea. Lau Afioga i le Fofoga Fetalai, o la ua manino le saunoaga a le Minisita, o tatou faatalanoaga uma nei e fai ma le agaga o atinae fuafua mamao. O aga ia a lo tatou Malo, e faataoto fuafuaga ma faatalanoa mataupu nei ma a tatou paaga. Ua fai si umi o faatalanoa le vaega lea, ona e i ai le mafuaaga ona o le tele o le poloketi. O le fonotaga lea sa faia i Papua New Guinea, masalo po o le 2 nei tausaga. Sa fai ai le matou feiloai, sa i ai foi ma le Minisita o Tupe, faapea foi ma le Ofisa Sili o Pulega o le Va-i-Fafo. O le faagasologa o le faatalanoaga lea, sa i ai le

faamoemoe, e faapea e malaga mai i luga o le invitation le tatou malo le Peresetene o Saina o Xi Mingze i se malaga e agai mai ai i le itulagi leni. Ma i le talanoa mai a le Peresetene o le matua manino o lona tauga o Vaiusu, le Vaiusu Project. O lona uiga afai ua talanoa mai le Peresetene, o le faatumutumuga o le Malo o Saina, o se Malo e matua malosi, po o le pito malosi i le lalolagi i tulaga o fefaatauaiga. E le mama, e atagia ai i ina e le mama ia te ia, ia le faatalosaga lea ua alu atu. Na i ai la le faamoemoe e malaga mai i le faaiuga o le tausaga nei ma faamaea uma ai loa mea ia. E pei lava la ona silafia, o lea la e afaina uma ai ma isi a tatou poloketi. E toetiiti lava uma le tatou faletele lava la e i Malifa. O le fale lea e teu ai measina, o le matua tele o lena poloketi. Ae fai fua e leai se tatou tupe e alu ai. E faapena foi la ma le malaetaalo ia o fanau, tamaiti lea e i tua o le fale o le Malo. I le va lea o le fale o le Malo ma le sami. E aofia ai ma isi atinae ia ua uma ona talanoa atu ai le Minisita o Leoleo, i Tafaigata le Kolisi. A o alofaiva lo tatou Malo i feutagaiga nei maaleale, e le mafai lava ona taofia ai i e fai fili. I le sau pea sau pea o latou faitioga, o uiga lava ia o le soifua. Ma ua masani ai foi le Malo. A toe foi nei i tua le Malo i mafaufauga i le tele o atinae lelei. E fai atu le Iunivesite o le Papaigalagala tetee, le Itu Agai. O le malosi o le tetee lea na fai nei. Taumafai le Malo e fai le suiga tele lea e taofi ie mataga ia sa faaigoa o lalaga fai faalavelave. Taumafai loa lea o le Malo e toe lalaga atoa measina a le atunuu i le faiga fou lea ua alu ai nei, sa tetele foi le tetee. O upu sa faasau foi i le nusipepa lava lea e fai ma fofoga o latou ia e tetee. Ua alai foi le Malo i measina a le atunuu. E taumafai atu le Malo i le fesoasoani i o tatou aiga ma le atunuu, tetee foi latou sa agaia le Malo. O upu o tetee i le 2006 na amata ai le polokalame lea. O le a le mea taofi ai fua, tou te alalai ai fua, tuu pea latou ia e faaali lo latou mauoloa. Ae tou te alai fua e faalaititi pusaapa mai le 48 i le 24. Aua tou te faia lea mea. O lea la sa faaoga i ai le malosi lea sa saunoa i ai ia le Minisita o Tiute. Ae le i taofia ai le Malo, aisea? E talitonu loa le HRPP o le mea lelei, e fiu lava latou, o upu e fai mai ia matou. Aua tou te faalogo i ai, mo mea o manuvale e fe i fe i, fe ou fe ou, ma pepe ifo ai lava. O le a la le mea lea ua i ai?

Fautua atu, aumai le polokalame a le Malo o le a faaulufale mai taavale, e faigofie o na maua ai e le atunuu leni ni taavale affordable e mafai ona maua. I le taimi lena e matua sa taputapu. O le tatou Tulafono lena, e matua sa taputapu ni taavale e feoai i luga o le aualatele e mai Niu Sila ma Ausetalia, leaga e tu i le itu taumatau. O le tatou Tulafono e na o taavale e tu i le itu tauagavale. Na alu le solo tetee, sau i i, na taofi ai le Fono a le Palemene i le anoano o i latou e tetee. E le i taofia ai le Malo. E uma atu lena, Tulafono Tau Faaofi e

3 ia na uma atu nei. O fea la ua i ai? Ua tetee tetee tetee, ae le mafai ona aveesea ni uiga lelei ua taunuu i ai le Malo. E oo mai i le VAGST, na faasolo mai lava le tetee i le 1974, 1975, 1976, 1977, 1978. E i ai le taavale tetee a Tumua ma Pule na ou talia, na ou talia on behalf of the Prime Minister. O matou ma Minisita o le Kapeneta, na ou fautua i le Tootooalii, afio lau Afioga i le Fonotaga a Taitai o le Malo o le Taupulega lea na fai i Sikotilani. Malaga oe, aua ne i taofia fua lou tiute i le va feagai ai ma Malo o le Taupulega, o lea e sau ai le fesoasoani ae taatia mai ia matou. Ia o le tumutumu o lena tetee, fai lava fai mai lava mai le 1994, 1995, 1996, 1997, 1998. O le faaiuga o le 1998, lea na malepe ai ma le Itu Agai ua alu ese ai ma le sa atoa i ai le toa-iva, le toa-iva o faipule e mafai ona talia ai se Vaega Faaupufai. O lea la na toe tuu ifo ai i lalo mai le 9 i le 8. O le lauga a le Tootooalii i le Taitai o le Itu Agai, e te asosi, e te fia pulea le Malo, ae o lena e te le mafaia ona maua se toa-iva e lagolagoina oe. O lea la o le a tuu ifo i le 8. O lea la na faatu ai loa le lafo ma toe teuteu ai ma le Tulafono Tumau. E leai se Vaega Faaupufai e aloaia i totonu o le Palemene lenei, se i vagana ua atoa le toa-valu ona faatoa aloaia loa lea. O le ala la lea, na o le tasi lava le Vaega Faaupufai ma lona Taitai lea e aloaia i le tatou Tulafono Tumau. A oo mai la iinei e le atoa le tou toa-valu, na o le tasi lava le Vaega Faaupufai lea e aloaia i totonu o le Palemene lenei.

Ia, o lea foi la ua ou faalogo, o lele foi ua amata ona faasolo mo mea o pepa e tetee ai i le atinae tele lea i Alaoa. La e foi ua gaoioi, le tiapolo lava lea, e tetee. E oo foi la i le malaevaalele sa tatala e le Vaega lenei i le tausaga e 1985. O le faatoa tulaueleele lea o se 747 iinei i le tatou atunuu. Ia na tetee foi le Itu Agai, matua tetee lava. Ona o atu lea o latou taavale, ua le omai i i ae tutu i o i Satapuala. Fai mai, aua tatou te o i o ae tatou tutu i i, o le a tatou vaavaai i le pau mai o le 747 ona taaia mai ai lea o le ta i pau o le 747. Ia, e leai lava se isi o latou i lena taimi na o atu i o, na o le o atu tutu atu i Satapuala e palaaai e o atu i o, ae ua tetei lava i le vaai atu o sau sau malie le vaalele i totonu, na pau lava i o, e oo mai i i ua tolotolo mai toetiiti lava lea i se leo e faalogo i ai.

Lau Afioga i le Fofoga Fetalai, o tagata pito sili ona leoleoa, e toaitiiti lava, e toaitiiti but there is a silent majority, tagata o lo o i ai le tofamamao e fai mafaufau e le pisa lava latou. Ae iloa gofie lava tagata toaitiiti, e pei lava o le mea foi lea o le kalone foi lele e leai se mea o i ai, a e tago loa e tata, o le pao tele ia.

Lau Afioga i le Fofoga Fetalai, ia o aga na o mea o galuega e faatino e le Faigamalo lenei, e i ai lava latou e tetee ae le mafai ona taofia e le Faigamalo lenei le mea e tatau ona fai. O le mea foi la lea, ia lau Afioga i le Fofoga Fetalai, o aga lava ia o tatou faatalanoaga i

totonu o le Maota lenei. Tuu pea latou e pisa ai, e pisa pisa lava ona gase malie ifo ai lava lea.

Lau Afioga i le Fofoga Fetalai, ia o le toe faaopoopo atu lena i le mataupu.

Afioga Faumuina Asi Pauli Wayne Fong: Lau Afioga i le Fofoga Fetalai, faamolemole lava pe maua se avanoa se i taumafai atu ai foi se vaivaiga i le tulaga lea ua aafia ai...

SUI FOFOGA FETALAI: O le a le mea lea e te fia saunoa ai, o le mea foi lea i Vaiusu?

Afioga Faumuina Asi Pauli Wayne Fong: Ia, a lea sa e faafofoga atu lea sa taua mai au i le tulaga lea. A o la e foi e sau isi faamatalaga...

SUI FOFOGA FETALAI: E leai lava se mea o taua ai le suafa o Faumui, leai se mea e tasi. Se malie le sui usufono, se malie lou finagalo.

Afioga Faumuina Asi Pauli Wayne Fong: Ou te usitai i lau Afioga, a o lena e te silafia lelei lava le tulaga lea ou te taumafai atu ai. Ae leai se mea o i ai, e leai se mea o i ai, o le a pulea foi le loto. E pule lava oe.

SUI FOFOGA FETALAI: Faafetai tele le faaaloalo. Faafetai tausii mamalu.

Afioga Tafua Maluelue Tafua (Aleipata Itupa i Lalo): Lau Afioga i le Fofoga Fetalai, se na o sina minute lava, ou te faaluaina le saunoaga a le Palemia i le 747 foi lea na muai pau i le tatou malae vaalele. O au le isi tagata na sau ai i le vaalele lea. O le mea la lena e faailoa atu ai, o le manaia ia o le vaalele ta te sau ua ta ona i le tele o meainu, tele o meaai, ae ta te sau foi ua folafola atu le lunch a le tatou Malo. Ou te faafetai atu lava i le Palemia ma le Vaega Faaupufai i lena taimi i le manaia o le taliga o matou. Ta te ona mai ota toe ona foi ina ua ta sau ua tele le meainu iinei vaeatu le paia o le Maota.

SUI FOFOGA FETALAI: Faafetai. Ia o le saunoaga lava faa-toeaina matua, le Tuiatua Faanofonofō. E ese le faigata o le faaaloalo. Ia, e le toe oo se matou faamatalaga i le saunoaga a le Afioga i le Taitai o le Malo, ae ou te tapa lau Afioga i le Minisita o

Tupe. Ia faasee mai loa i totonu le sa, ioe. O lea foi ua oo i le taimi e ololi mai ai le Minisita o Aoga ia, ua leva ona fia pai i le vai o tama.

Afioga Hon SILI EPA TUIOTI: Lau Afioga i le Fofoga Fetalai, e i ai le fesili sa faapea mai, sa tatau ona puupuu le Fonotaga mulimuli lenei a le Palemene, e tele se vaegatupe sa tatau ona faasaina ai.

Lau Afioga i le Fofoga Fetalai, o le Fonousu lenei a Taitai o Samoa o lo o ave i ai le faamuamua a le Malo ona e leai se isi e toe aisili, o lea ua potopoto Taitai o le atunuu e faatino la latou tautinoga ma na o le pau lenei o le avanoa e faamaeaina ai saunoaga a sui usufono o itumalo taitoatasi. E le gata ina faafetaia ai o latou itumalo mo le avanoa e momoli ai foi so latou sao i upufai o Malo, a o se avanoa foi e faasoa ai finagalo i le Tala Faaopoopo o le Tupe e poupu ai le sa o Samoa i lenei vaitau faigata. O lo o i ai vaegatupe faaagaaga a le Ofisa o le Fono e faatino ai manaoga uma mo fonotaga a le Palemene.

Sa fesiligia foi e se tasi o lauga pe aisea e fesuisui ai faiga faavae a le Malo mai lea taimi i lea taimi. Ou te fia faamamafaina le taijala aupito taua o lo o faaogaina e le Malo, o le faautaga tatau i le taimi e moomia ai. Lau Afioga i le Fofoga Fetalai, e i ai taijala a le Malo e tapu ai le soona faaaluina o seleni a le Malo i ana faaape pe a talimalo. O lea faiga faavae po o le taijala, e fesuisui e fua i le faatofalaiga a le Malo i taimi e moomia ai.

Mo se faataitaiga, a talimalo loa Samoa i malaga aloaia a taitai o Malo mai fafo po o Peresetene o Faalapotopotoga faava-o-Malo o lo o i ai paaga ma le Malo, e tatala le kapeta mumu, tatala a tatou faaaloaloga maualuluga e tusa ma tu ma aga faaaloalo ua lauiloa ai Samoa i le Pasefika ma le lalolagi atoa. E le taumate foi le faaauau pea o le tatala mai o fesoasoani ma tuu mai o le tauau a tatou paaga ma Malo mai fafo, aua e manatua pea Samoa ma ana faaaloaloga i taimi sa latou asiasi mai ai. O nei faamanuiaga le au maua ua mafai ona tatou ausia ona o le agaga fetuutuunai o le Malo ma le vaaimamao a ona taitai e faatauaina nei faiga paaga i taimi uma.

Lau Afioga i le Fofoga Fetalai, e le mafai lava ona ou tuua nisi o mataupu o lo o i ai faasalalauga i totonu o le atunuu, o ni folafolaga e faatino e isi Vaega Faaupufai pe a tulai mai e faafoe le sa o Samoa. O le mea amiotonu lau Afioga, e tatau ona manino le atunuu pe faapefea ona faatupe nei miti ma mafaufauga e tele pe afai e amata lava saunoaga faatosina e aveesea uma le tele o lafoga o lo o maua ai tupe a le Malo. Mo se faataitaiga, afai e faatino nisi o miti e aofia ai le tufatufaina atu o le tai \$1 miliona a le itumalo i itumalo e 51. O lona uiga, e \$51 miliona se vaegatupe e faatupeina ai, tuu ai ma le \$200 o le penisione a tagata matutua, e \$40 miliona foi e faaaluina ai.

A faaopoopo i ai ma le isi \$100 mo tagata e i ai manaoga faapitoa e 6,000 le toatele, o le a faaaluina ai le \$7.2 miliona, faaopoopo i ai ma le vaegatupe tele e \$200 miliona e fesoasoani i pisinisi e auina atu oloa i atunuu e mamao. A faaopoopo nei miti e tele, e moomia vave se vaegatupe e \$298.2 miliona e faatupe ai a latou folafolaga. E tele foi isi folafolaga ua salalau solo i faasalalauga, e mautinoa lava atonu e leai se tupe e faatino ai. Mo tupe maua a le Malo ua latou faalauiloaina mai, o le a faaitiitia le tele o lafoga, faataugofie auaunaga a le Malo, aveesea lafoga mai isi tagata totogi lafoga ma le tele o isi folafolaga ua uma ona faalauiloa i le atunuu.

A taunuu nei fuafuaga, e \$35.4 miliona ua latou aveesea mai tupe maua a le Malo. A faavasega i se gagana faigofie lau Afioga, o tupe faaalu faaopoopo ua moomia e faatupeina ai nei fuafuaga, ona faatusa lea i tupe maua ua toesea, e faigata faigata lava ma se folafolaga e taunuu. O le taufaavalea ma le taufaasese nei amioga ua faia ma atagia ai le le faamaoni o lenei Vaega ma a latou folafolaga. O le a silasila mai foi paaga i nei taiala ma fuafuaga mamao soonafai, e leai ma se paaga e toe fesoasoani mai pe afai e matau mai ua oo le Malo i se tulaga faaletonu ma ua le toe faaaogaina foi pulega lelei ma taiala malamalama ma amiotonu sa faavaeina ma taiala ai le Malo o Samoa i tausaga e tele i lalo o le Faigamalo a le HRPP.

Lau Afioga e le mafai ona ou tuuavanoa i ni faamatalaga sese ma tuulafoai e se tasi o sui usufono o le Maota lenei faapea ua gau le Malo. O le mea moni Samoa, o le vaitau mulimuli lava na feagai ai si o tatou atunuu ma se gau, po o le matuai le tagolima lava, o le Faigamalo lea na muamua atu i le 1982 a o le i tulai mai le HRPP e faafoe ma taitaia le atunuu. Sa matuai gau aano ma leai ni tupe a le Malo e totogi ai ana tagata faigaluega, leai ni tupe mo fefaatauaiga, leai ni tupe e faagaoioi ai le Malo, leai ni tupe e faatino ai le... leai se faatuatuaga a le lalolagi aemaise Faalapotopotoga faava-o-Malo e toe fesoasoani mai ai ia Samoa.

SUI FOFOGA FETALAI: Ia, malie lau Afioga... E i ai se mea o fia saunoa ai? O lea ua faauma mai.

Tofa Olo Fiti Afoa Vaai: Lau Afioga i le Fofoga Fetalai... Na o nai mea lava e tau faamalamalama. Faamalo atu i le Afioga i le Minisita o tatou Tupe i le saunoaga matagofie. Se i tau koma.

SUI FOFOGA FETALAI: Ioe, o le upu lena ou te faia, ae e te le o tali mai ia te au. O le a le mea lea e tau faamalamalama? Se ai foi a ou toe fai atu foi lau Afioga i le sui usufono mamalu. O le a le vaega

tonu lea e te fia malamalama ai? A e silasila mai, o lea ou te nofo uma ma le Summary o le Hansard e tusa ma tou lauga sa lauga ai.

Tofa Olo Fiti Afoa Vaai: Lau Afioga i le Fofoga Fetalai po o lau Afioga i le Sui Fofoga Fetalai, (.....)

Lau Afioga i le Fofoga Fetalai, se sa ou lauga i le Tupe, sa ou lauga i le tamaoaiga o le atunuu.

SUI FOFOGA FETALAI: E ese le mataupu lea sa e lauga i ai Olo.

Tofa Olo Fiti Afoa Vaai: O lea o le a ta finau lau Afioga, a o lea ou te faauilavea i le Minisita. Ia, onosai mai se i fai lau faauilavea. Lau Afioga i le Minisita ui atu i lau Afioga i le Fofoga Fetalai...

SUI FOFOGA FETALAI: Olo, ua ou taua lou suafa, se malie a tautala le Nofoa ona alaala lea i lalo. Ta te le finau faapea. Malie alaala i lalo. O lea ou te fia fesili atu ona e tulai mai lea e te saunoa mai.

Tofa Olo Fiti Afoa Vaai: Ia, ua le mafai ona fai atu se matou tala alii ia oe alii. Ia o le a le faia se matou tala, pule oe. A o le a foi le mea na tou mananao ai matou te omai i i, a o lea lava e te nofo taofiofi matou. O le a le sao o lea mea?

SUI FOFOGA FETALAI: Olo, leai, its your obligation to attend the session.

Tofa Olo Fiti Afoa Vaai: (.....)

SUI FOFOGA FETALAI: Leai na filifilia faipule e attend i le Fonousu lenei a le atunuu. E le i faapena. Se malie, tuutuu i le loloto le tofa. Malie Olo e le aea e se fili, ia malie lou finagalo. Ou te tapa lau Afioga i le Minisita, see mai loa e faaauau lau saunoaga.

Susuga Hon Laauli Polataivao Leuatea: Lau Afioga i le Fofoga Fetalai, ona o lea sa taua nai a matou folafolaga. E tuga upu ia e saunoa i ai le Minisita o le taufaavalea ma le le moni. O le ala lea lau Afioga leaga o la e faalogologo le atunuu. Malie Honourable Minister, taatia pea nai a matou folafolaga. Malie lou finagalo, o lau interpretation ma ou lagona i faiga faavae na e te i ai i le taimi lenei, fai lena. A o le a lau faafogafoga ma le matou mataupu lea e tau ia

Samoa, ia se i tautino i le taimi ona faataunuu lea. Ae aua le toe lafoa le upu lea o le taufaavalea, e tuga le upu lea.

SUI FOFOGA FETALAI: O le ua maua atu. Laauli malie lou finagalo. E le o se Pati, o sui taitoatasi a outou afioga e le i maea le Paeaiga.

Susuga Hon Laauli Polataivao Leuatea: E matou te le o faavaleaina le atunuu. O le matou talaiga lea e fai i fafo, o le mea ua uma ona matou faatulagaina. E tuga upu ia.

SUI FOFOGA FETALAI: Laauli, alaala mai i lalo faamolemole.

Susuga Hon Laauli Polataivao Leuatea: Nafaitoa, e tuga upu ia o la e faalogologo le atunuu.

SUI FOFOGA FETALAI: Alaala mai i lalo faamolemole.

Susuga Hon Laauli Polataivao Leuatea: Matou te le o faavaleaina le atunuu. O upu na e tatau ona faasao. Ua fai soo.

SUI FOFOGA FETALAI: Malie lou finagalo alaala mai i lalo. E le i oo i le taimi... o le saunoaga lea ou te faamauina i i, a silasila mai ou te galue lava, faamau lelei ma aloaia saunoaga.

O le saunoaga a le Afioga i le Minisita o Tupe, Pati. E le i oo i le taimi e faalauiloa aloaia ai mea ia ma amanaia i totonu o le Maota se isi Pati. E tasi lava le Pati na o le HRPP lea e feagai i le taimi nei. Se i maea ona alo lava lea i le mea e te finagalo ai. Malie lou finagalo o le a tuu atu le avanoa i le Minisita o Tupe e faaauau lau saunoaga.

Susuga Hon Laauli Polataivao Leuatea: Se ioe lau Afioga. E ui lava ina le taualoa leni taumafaiga i le Maota, a o lena e te silafia, o au o le sui aloaia o le Pati. Pe toa-tasi lava la au, ua uma ona resitala le Pati. Pe le aloaia i le Maota, a o lena e te silafia. Se Nafaitoa, aumai se avanoa. E le mama upu ia e lafo e le Minisita o Tupe.

SUI FOFOGA FETALAI: Ioe, malie lou finagalo, e le i aloaia le Pati i totonu o le Maota.

Susuga Hon Laauli Polataivao Leuatea: Ua aloaia ia Samoa atoa.

SUI FOFOGA FETALAI: Alaala mai i lalo. Ia, e lelei lava le toa e pulea lona loto, ma ou te le toe faatagaina ona e tulai mai. Malie le Minisita o Tupe e tulai mai e faaauau lau saunoaga.

Afioga Hon SILI EPA TUIOTI: Faafetai i lau Afioga i le Fofoga Fetalai. Ia e leai se... O le tulaga lea faapea e sese nei faamatalaga e leai se faatuatuaga o le lalolagi, aemaise Faalapotopotoga faava-o-Malo e toe fesoasoani mai ia Samoa. Tapunia faitotoa o faletupe faava-o-Malo e le toe fia nono mai ni tupe aua e le mafai ona toe totogi atu. O se vaitau toilalo tatou te le toe fia manatuaina. Ae faapefea le aso? U aveva Samoa o se atunuu laalaa i luma, progressive Samoa. Ua tele atinae tetele ua tatou faatinoina, ua siitia ma tupu le Malo, toatele le aufaigaluega ma siitia mauuluga foi le auaunaga. Ua lelei ma malosi a tatou tupe mo fefaatauaiga. Ua aveva tatou o se paaga faatuatuaina, a trusted partner i le va faafeagai ai ma atunuu po o faalapotopotoga faava-o-Malo mai fafo. Ua le toe oge pe mativa Samoa. Ua tu mauuluga Samoa i upufai o Malo. Lau Afioga e matau mai i tausaga taitasi, o le Tala Faatatau o le Tupe po o le Budget Estimates a le Malo, ua na o ni tapenaga mo le 12 masina o le tausaga o muamua, lea e faatulaga manino ai fuafuaga o tupe maua, tupe faaalu ma tupe faameaalofa mai fafo faapea nonogatupe. A maea le tausaga faaletupe, ona toe tapena lea e le Malo o faamatalaga o ana tupe maua ma tupe faaalu, public accounts ma tuuina atu i le Ofisa Suetusi e faatino ai la latou pitolaau.

A matau i le tele o tausaga, sa tele ina ausia e le Malo se faasiliga o tupe maua i tupe faaalu, po o le Budget Surplus, e ui ina faamauina i le amataga o le tausaga i le Budget, o le a sili atu tupe faaalu i tupe maua o le Budget Deficit. O le tausaga ua mavae atu nei 2019/2020, lea sa faamaeaina ia Iuni 2020/2020 sa faamauina ai se faasiliga o tupe maua i tupe faaalu a le Malo, Budget Surplus e tusa ma le \$17.4 miliona. Ae a sa fuafuaina e \$87 miliona le faasiliga o tupe alu i tupe maua po o le Deficit. O isi foi tausaga faaletupe i tua atu, sa mafai lava ona ausia e le Malo ia pasene itiiti o tupe pau, po o le taunuu foi i se faasiliga o le surplus ina ua maea le tausaga faaletupe ma sueina tusi a le Malo.

Ou te ootoina atu faapenei, o le tausaga 2016/2017, mai le 3.5% o le Budget Deficit sa fuafuaina, e maea le tausaga faaletupe ua na o le 1.1% o le deficit sa faamauina. I le tausaga na sosoo ai 2017/2018, mai le faasiliga o tupe alu i tupe maua, deficit sa fuafuaina e na o le 0.2% o le fuainumera o tupe pau sa faamauina.

I le tausaga 2018/2019, e 3.5% le deficit sa fuafuaina, ae maea ifo le tausaga faaletupe, ua 2.7% le faasiliga po o le surplus.

SUI FOFOGA FETALAI: Malie le Afioga i le Minisita o saunoa se i tuu atu le avanoa i le Taitai o le Maota.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, e taua lava le mea lea ua oo i ai le saunoaga a le Minisita, o le eseese o le Budget ua na o ni estimates ma fuainumera ia ua aumai, ua uma ona faaalu tupe ma ua talanoa mai le Minisita i tupe moni na maua ma tupe moni na faaalu. Na pau lava lena o le mea lea ou te tulai atu ai.

I le faagasologa o le saunoaga a le Minisita, sa oo foi i ai saunoaga a sui usufono, e 2 mea eseese. E eseese a le Budget e deal pe tagofiaina tupe e fuafua. O lona uiga o tupe o lea ua fuafua atu, ae le i oo i le amataga o le tausaga. Ona faagasolo loa lea o le tausaga se i tau lava i le faaiuga ua maea ona faatoa faamaopoopo loa lea o tupe maua moni lava, ma tupe faaalu moni lava, ia ona tapena loa lea o le tala o le tupe sao na maua ma le tala o le tupe sao na faaalu. Lea la ua oo i ai le saunoaga a le Minisita. O mea ia taua sa ou tulai atu ai, ae pe a matau e lau Afioga, ina ua sausaunoa le Maota, sa olo lava le fua, sa matou nofonofu lelei ma faalogologo. O lea la ua uma ona sausaunoa le Maota, ou te le i manatua na faalavelave se isi i le saunoaga foi a le sui usufono mo Gagaifomauga Nu.3. E le i faalavelave lava a o faagasolo, e oo foi ia Olo. E le i faalavelave le Kapeneta, sa matou nofonofu ma matau. O lea la ua oo i le taimi e tutulai ai le Kapeneta e faamatala lea mea ma lea ae faalavelave. O le a le mea lea sa ou vaai? O le tatou Tulafono o le Maota, e tulai mai loa se sui usufono i luga ona faanoi atu lea ia oe o se mea e fia faasao poo se mea e fia faamalamalama, ona toe nofo lea i lalo ae se i faatali lau faaiuga. A o le mea lea ua tupu, tu sasae ae lava Olo ia alu loa ma lana faamatalaga, e le o fia faalogo mai i lau Afioga ma le faatulagaga o Tulafono o le Maota lena e faavae lava i luga o aga faatamalii. A tulai atu loa se isi e fia saunoa, ia ona toe nofo loa lea i lalo se i faatali sau faaiuga. A o le a le mea lea na tupu? Tu sasae ae lava i luga e saunoa atu lau Afioga ae saunoa mai le sui usufono, saunoa atu lau Afioga ae saunoa mai le sui usufono ma tutu lava o lea e te saunoa.

Ua ala ona taua le mea lea, ona o le talaave i le faafofoga mai a le atunuu. Ia tu atu loa teva i fafo. Uma le isi amioga le mafaufau sosoo ma le isi amioga le mafaufau. Ia, lau Afioga i le Fofoga Fetalai, pei o le tulaga lena, o lea e taumafai atu matou. Sa matou nofonofu lelei lava ma tapuai saunoaga a sui usufono, uma loa ma faasolosolo mai ai lava. O lea foi la ua faasolo atu matou, ae na o le laitiiti ane lava taofi, taofi, taofi. E lelei le tulaga matou te fia tali atu, a ia ui pea i ala

o mea, se i fai sau faaiuga ona toe tutulai atu lea o matou. O ala na o mea. Lau Afioga i le Fofoga Fetalai, leaga o lea e faafogafoga mai le atunuu.

SUI FOFOGA FETALAI: Se i alaala mai lava i lalo Olo se malie. O le Fonousu a le atunuu, ua uma ona taoto ona taiala. O Tulafono e faafoe ai le Fonousu a le atunuu, o la e tapuai mai, tapuai mai ma tatalo mai ia ae manuia faiva. O lupe na faia mai i le fuifui aua tonufai a le atunuu. Lea e afua ai ona matou tautatala ai. Ua uma foi ona matou tauto i luma o le Atua e fai le amiotonu, savali ia sao. Tulafono Tumau e 82(4) e faapea: “O le a i ai i le Fofoga Fetalai le pule faitalia e faataga ai pe teena le faauilavea a se sui usufono e faavae i luga o tulaga aloaia ma le talafeagai o le faauilavea.” O Tulafono Tumau na, ma e leai se sui usufono e alu ese ai.

O lea la ua saunoa le Taitai o le Maota, ua ou manatu e oo i ai sa matou tala i le taimi lenei. Malie sui usufono o lo o fia saunoa, o le tiute o le Nofoa, faasagatonu le Fonousu a le atunuu leaga o a tatou nei, a o isi a taeao. O mamalu o le atunuu. O lea la ua saunoa le Afioga i le Taitai o le Malo, leaga e alu i tua le tala. A o le faamoemoe o le Nofoa na tatou amatamea i le Atua, faaiumea i le Atua e sologa manuia. O le a foi se finagalo o fia faaaliga, malie sui usufono o le faaiuga e avatu e le Nofoa, o lena. Ae lelei, o le Tulafono Tumau, a fia faauilavea pe fia faamalamalama se finagalo o se sui usufono i le faaaliga o tali a le Malo, e ao ona faailoa mai ma toe alaala i lalo. Se i fesiligia, afai e talafeagai, o le a le mea e tuu ai? E faataga e le nofoa. Ae afai e leai, e teena e le Nofoa. Ou te le i sau i inei e aoai le mamalu o le atunuu, a o Tulafono Tumau a le Maota, o le Tusi Paia a le Maota o le taiala lena o le Nofoa.

Ua ou manatu ua manino mea ia ou te taumafai e faamalamalama atu aua le faafogafoga a le atunuu. O lena e i ina le tofa, o lea e i i le tofa, na filifilia tatou i tatou uma ina ia sologa manuia le Fonousu a le atunuu.

O le mea lea ou te toe tuualalo ai ma le agaga mauualalo, sui usufono mamalu, malie e usitai ma savali i a tatou Tulafono Tumau ona mamalu lea o le Fonousu a le atunuu. O le faaaliga lea a le Nofoa e ao ona utagia mai ina ia sologa manuia ai le faamoemoe pei ona i ai lenei aso. Ia alofa mai le Atua faaiuga manuia le Fono i lenei aso.

Afioga Faaulusau Rosa Duffy Stowers (Gagaifomauga Nu.3):
Lau Afioga i le Fofoga Fetalai, pe maua se avanoa faamolemole.

SUI FOFOGA FETALAI: Pe i ai se mea o fia saunoa ai, e lelei ona faamanino mai.

Afioga Faaulusau Rosa Duffy Stowers: Ioe lau Afioga i le Fofoga Fetalai faamolemole na o sina mea lava e faasao e oo lava i le Afioga i le Palemia e fia faasao i ai. Ma lou faaaloalo lava faafetai.

SUI FOFOGA FETALAI: Ou te le o maua le saunoaga ae...

Afioga Faaulusau Rosa Duffy Stowers: O saunoaga lea e opea i le Maota, o lea e tele lava o taimi lea e felafuai ai totonu o le Maota. Masalo po o le finau o se sui i lana i se mataupu o lo o finauina, e tele ai lava ina galo, e 2 sui usufono o Gagaifomauga Nu.3. E oo lava la i le Afioga i le Palemia, e saunoa mai ai foi lava i le mea lea. Ae ao lava ona faasao, e 2 sui usufono. O le isi sui usufono e matua malamalama lelei i le deficit. A o le isi sui usufono, e le malamalama. O le sui tamaitai la lea e malamalama. A toe saunoa la sui usufono mamalu e le faatonuina foi ae na o se tuualalo, ia ona saunoa mai lea, ia, tulai mai le sui usufono alii o Gagaifomauga Nu.3. Ma lou faaaloalo faafetai.

SUI FOFOGA FETALAI: Se i tulai mai le Taitai o le Maota aua o lea e taua lou suafa.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, ou te faatoese atu ma le loto maualalo i le sui tamaitai o Gagaifomauga Nu.3. Ia o le faalavelave lena, e tau fai foi ma galo. Ae ou te faatoese atu, e sao le sui usufono. E le toe faia.

SUI FOFOGA FETALAI: Faafetai. E pei foi ona ou toe faailoa atu, ua fai le faaiuga a le Fofoga Fetalai, o le faaiuga a le Fofoga Fetalai e mausali. O le isi lea mea e ao ona manatua. Faafetai.

Susuga Hon Laauli Polatiavao Leuatea: Lau Afioga e tuga upu ia, faamolemole aumai se avanoa se i faamatala leaga o lea ua toe paia lava lota matai lota lima faamolemole lau Afioga.

SUI FOFOGA FETALAI: Ia, o le a tuu atu le avanoa leaga o lea sa taua le sui usufono o Gagaifomauga alii.

Susuga Hon Laauli Polataivao Leuatea: Faafetai. O le mea muamua lava, ou te faamalulu atu i le mea lea na saunoa i ai le Minisita o Tupe, ona o tulaga faapea e le taualoa si o matou aiga i totonu o le Palemene. Sa tatalo atu ma le faaaloalo, a o lea lava e tafili saunoa a outou saunoaga i le FAST. Malie lo outou finagalo, o

lea ua ou faalalolalo atu, taatia ia si a matou polokalame. Se i sau le faaiuga a Samoa po o le a le mea e fai.

SUI FOFOGA FETALAI: Ia, o lea ua maua agai sao i le lona 2.

Susuga Hon Laauli Polataivao Leuatea: Lona 2, Faaulusau, ou te le toia le va, ou te ava tele, faaaloalo tele atu. Afai ua e poto tele, fai lena. Tuu pea o lea ua agiga lou faalumaluma i lou tagata faatauvaa ou te le malamalama. Ia ua ou faamaualalo atu, ae fai lou atamai lena. Se i fai le faaiuga a lo ta itumalo, po o ai o taua e atamai moi. Ia ma le agaga faaaloalo.

SUI FOFOGA FETALAI: Ia, a maea loa le Fonotaga ona oulua o lea i fafo e fai lelei ai le va lea.

Afioga Faaulusau Rosa Duffy Stowers: Lau Afioga i le Fofoga Fetalai, e pei o le agaga lena. Se i uma ona ma o lea i fafo, faafetai.

SUI FOFOGA FETALAI: Ia vaai e ese le manaia o le mea lea. O i tonu lea ae...

Tofa Hon Lopao Natanielu Mua (Minisita mo Faatoaga ma Faigafaiva): Lau Afioga i le Fofoga Fetalai, pe maua se avanoa...

Afioga Sulamanaia Fetaiai Tuiliili Tuivasa (Vaimauga Sasae): Lau Afioga i le Fofoga Fetalai, e maua se avanoa...

SUI FOFOGA FETALAI: Malie o lea e tulai mai le Malo, lau Afioga i le Minisita o Faatoaga, leaga o le tou tiute lea e... ia se i saunoa.

Tofa Hon Lopao Natanielu Mua: Faafetai i lau Afioga mo le avanoa, ia mo lena faamatalaga manaia lea sa fai mai e le Minisita o Tupe, le faamalamalamaina o le Tefesiti. Talosia ua lagona, ae pau lava le mea na ou tu atu ai, o lea na ou sauni mai i lau taavale la e i ai ia mea faipele e 4, faitalia lava au ma ou laufali ae fai le lua paga i fafo. Ia ma le faaaloalo lava.

SUI FOFOGA FETALAI: Ia, ou te... maumau pe ana i i mai se vea i le mea lea semeamanu e le faataga lau Afioga i le Minisita... ia

Susuga Hon Laauli Polataivao Leuatea: Lau Afioga i le Fofoga Fetalai, leaga o lea o le a faaoloataua le middle man lea. Ioe, malie

lau Susuga i le Minisita taumafa steak, ia aua e te faaososoina maia au, e le mafai ona ou faia se mea faapea i lou tuafafine. E le mafai pe sau lava e po ou liliu atu le isi itu. Po liliu atu le isi itu, e faapena, ae faaeteete aua le fai sooa.

SUI FOFOGA FETALAI: Laauli aua e te amanaia fua, ia faafetai, faafetai i lau Afioga. Faafetai i lau Afioga, ia e lelei foi ma fai toe laitiiti ae malo faafetai.

Afioga Hon Lautafi Fio Selafi Purcell (Minisita mo Pisinisi, Alamanuia ma Leipa): Lau Afioga i le Fofoga Fetalai faamolemole.

SUI FOFOGA FETALAI: Ae malo faafetai ia te outou toeiina, o suaga a toeiina, faapena Fonotaga i aso ia o ou aoga. Ia o lea ua o tatou oo mai, ia o lea lava e tatou te solisoli mulivae i ai. Ia e matua lava i le oo ma fiafia mea uma.

Tapa lau Afioga i le Minisita o Tupe, ia se faasee mai...

Afioga Hon Lautafi Fio Selafi Purcell: Lau Afioga e fia maua se avanoa.

SUI FOFOGA FETALAI: Ia malie lau Afioga, tulai mai le Minisita o Pisinisi ma Alamanuia ma Leipa.

Afioga Hon Lautafi Fio Selafi Purcell: Faafetai, manaia le fai ma fai nai a tatou commercial ia that's what I call mea ia. Ou te tulai atu lau Afioga, se i ou faafesili i le Minisita o Faatoaga, aua o lea e fai mai o la e i ai ia mea faipele i tua o... e 4 mea la e i ai. O lau faafesili la lau Afioga, na i ai se isi na e fuafua e aumai e faaaoga ai mea ia? Ia na pau lena o lau faafesili lau Afioga.

Afioga Hon Loau Solamalemalo Keneti Sio (Minisita mo Aoga, Taaloga ma Aganuu): Lau Afioga i le Fofoga Fetalai, pe maua se avanoa.

SUI FOFOGA FETALAI: Se ua pei ua tau ese foi le mea lea ua fai e la outou... ia se i tulai mai lau Afioga i le Minisita o Aoga.

Afioga Loau Solamalemalo Keneti Sio: Ioe lau Afioga i le Fofoga Fetalai, ou te nofo lava a e popoe. Ua alu le po anapo o talanoaina le upu lea o le deficit. Ia na iu lava ina faamaeaina le Fono e le i manino lava le mata o le vai. O le ala lea o lou tulai atu ona o

au o le Minisita o Aoga, malamalama lelei i le tulaga ma lona faauigaina.

O le terminology lea e faaoga e le au accountant e pei o matou, o le gau lea e faapea mai ai lea itu, a o le pau maualalo. Leaga la e i ai lona uiga i le French Dictionary, lea e ala ai ona ou tulai atu. O le upu o le deficite, e pei e faapena lona tauga, ae uiga tutusa. E pei e foliga e sipela tutusa ae eseese ona uiga. O le deficite, o le pau i le laau.

Ae i ai foi la lona uiga i le Spanish Dictionary, ioe, o le deficita, e tai tutusa lava le sipelaina, ae eseese ona uiga. O le pau i le solofanua, tulou le.... leaga e tatau ona manino, ina ia taape ai lenei aso aua ne i toe talanoaina pe a ou lauga i le Aso Gafua, ma le agaga faaaloalo.

SUI FOFOGA FETALAI: Ia, faafetai, ia amata ai lava lau lauga, leaga o lea o le a sosoo faafetai.

Afioga Sulamanaia Fetaiai Tauiiili Tuivasa: Lau Afioga i le Fofoga Fetalai...

Afioga Afoa Amituanai Faleulu Maui: Lau Afioga i le Fofoga Fetalai...

SUI FOFOGA FETALAI: Se i saunoa mai po o le a le mea lea e te fia saunoa ai sui usufono mai Vaimauga i Sasae.

Afioga Sulamanaia Fetaiai Tauiiili Tuivasa: O le sui usufono lenei e tumu i le faaaloalo i le Maota Fono o le atunuu, leaga fai mai o le malae lenei...

SUI FOFOGA FETALAI: O se mea e fia faasao po o...

Afioga Sulamanaia Fetaiai Tauiiili Tuivasa: O se mea e fia faasao lau Afioga.

SUI FOFOGA FETALAI: Ia se i saunoa.

Afioga Sulamanaia Fetaiai Tauiiili Tuivasa: O tatou uma lava na tofofi mai e le Atua e omai e faia upu a le atunuu. Ae matau lava i lenei itula o le afiafi ua... leaga o la e faalogologo le atunuu lau Afioga i le Fetalai. E pei ua e tuumamaina lau taitaiga o le Fonousu lenei a le atunuu. O le malae lenei o le faautugatagi a Samoa, popoe i ai le sui usufono lenei o Vaimauga.

Ae ou tatalo atu i lau Afioga e le mama saunoaga a le sui usufono lea o Olo. O lea sa saunoa ai “o lau lasi taitaiga lena o le Fono”. E le logomalie i le sui usufono lenei. O le ala lena o lou tulai, aveese faamaumauga ia, ma faamaumauga a le tatou Palemene.

O le toe sau i totonu o le tagata ma le le toe sau, o le mea lena a le Atua. Ae aua ne i fuao e se isi se isi. Tulai lena o lenei sui usufono, leaga o la e faalogologo le atunuu e tele aa o le tagata. E i ai o ta tamaliiaga ma e tau mai. A faalogologo la i ituaiga saunoaga la, e le logomalie i le sui usufono lenei o Vaimauga. Saunoa le Taitai o le atunuu o i inei e le milia faau ai ni upu, ae fai i le avafatafata ma le migao.

Aua ne i tuumamaina le vaai a lau Afioga i le Fofoga Fetalai. O lau Afioga i le Fofoga Fetalai ua ave i ai le faa-ao a le Palemene lenei o Samoa. Ae tulai mai i lenei afiafi, ia ou te le fai atu sau tala. O lea ou te tatalo atu ai i lau Afioga i le Fofoga Fetalai, aveese faamaumauga ia na saunoa ai le sui usufono lea. Ia ma lou faaloalo lava.

SUI FOFOGA FETALAI: Malie le sui usufono na aumaia le finagalo e faatu le lafo.

Afioga Sulamanaia Fetaiai Tauilili Tuivasa: Ou te faatu le lafo, *E aveese ai saunoaga ia a Olo.*

Faaluaia e le sui usufono mo Falealili Sasae ma le sui usufono mo Safata Sisifo.

Tofa Olo Fiti Afoa Vaai: Lau Afioga i le Fofoga Fetalai, na o lou faafesili atu lava, o le a se leaga o le faamatalaga? O lea ou te fia fesili atu i le sui usufono mamalu.

SUI FOFOGA FETALAI: O lea ua faalua le lafo Olo, se i alaala mai i lalo.

Tofa Olo Fiti Afoa Vaai: E matuia atu isi saunoaga i totonu o le Maota lenei, i lo le tala lea e fai atu. Afai na tatou sua, ia o le tulaga lena.

SUI FOFOGA FETALAI: O le a ou fesili, alaala mai lalo. Afai e le tuga ia oe e tuga ia te au. Pe afai o le mea lena e te faafesili i ai. E tuga, ia e ava i le Nofoa. Ua faalua le lafo ma o le a tuuina atu le fesili.

Na faamaonia le lafo.

SUI FOFOGA FETALAI: Olo, ua ou tapa i le suafa e le o se tuli ua vale, sa ou taumafai lava e folo i totonu. A lea ua pasia e le Maota, o le a aveese upu ai a lau Afioga, ae taofi i lou loto.

Ua e silasila mai o lea ua vaai atu ou mata, fai malu lou faiva. Ia alofa mai le Atua i faamoemoega o totoe o lenei aso.

Tapa lau Afioga i le Minisita o Tupe, faaauau lau saunoaga.

[Upu na faatonu e le Fofoga Fetalai e aveese mai faamaumauga o le saunoaga a le sui usufono mo Salega Sasae “*Enjoy your last time.*”]

Afioga Hon SILI EPA TUIOTI: Lau Afioga i le Fofoga Fetalai, o le faagaioiga o galuega a le Malo, e faaauau pea. E ese mai i pisinisi e faatauaina le fesili, po o gafatia e tupe maua ona faaauau galuega. Pe faa-Peretaniaina foi, o le principle of going concern, e le mafai ona muta galuega a se Malo. E oo foi i tupe maua e faatino ai atinae, o lo o maua avanoa i fesoasoani tuusao.

O nonogatupe e aupito mama tuutuuga, maua foi ma avanoa e fetuunai ai faiga faavae ina ia talafeagai ma suiga o le siosiomaga ma le tamaoiga o lo o i ai le atunuu. O le uiga o lea faamatalaga i lau Afioga, o lo o lelei ona faasoasoina ma aoina mai tupe a le Malo i tausaga taitasi, e ala i le faasiliga o tupe maua faatusa fuafuaina e tatau ona aoina mai. O nisi foi o tupe faaalu o lo o faaagaga i totonu o le Tala o le Tupe, e tele tausaga e multi year project, e faatino ai ma e le faamaeaina i totonu o le tausaga e tasi.

Ua atagia foi le lelei faataoto o faiga faavae e puipuia ai tupe ma meatotino a le Malo. O upu masani a le atunuu, aua le manao i le ia ae manumanu i le upega, ae tuu atu Samoa i lau faamasinoga ma lau faatofalaiga. O le Faigamalo a le HRPP e tautala galuega. O se Faigamalo ua aloaia faava-o-Malo i pulega lelei ma taiala o lo o faafoeina ai ana galuega faatino. E faatuatuaina e paaga ma o lo o faafoeina e tamafanau a Samoa, ua lava le silafia ma le tomai e atiae ai le atunuu mo se manuia o tagata uma.

A tatou toe manatu i nisi o matatia na ausia e si o tatou atunuu laitiiti, o lea ua mafai ona usuia iinei i Samoa ia fonotaga tetele e Taitai o Malo o le lalolagi. Ua faia mai i Samoa nei taaloga Faava-o-Malo o lo o moomoo uma i ai atunuu o le Pasefika. Ua tofia Taitai o Samoa e avea ma Taitaifono o Fonotaga Faava-o-Malo. O Samoa o lo o ua muaimalae e avea ma sui faavae o faalapotopotoga Faava-o-Malo tetele o le lalolagi.

Lau Afioga i le Fofoga Fetalai, o se faaaloalo o lo o atagia ai le amanaia o le Faigamalo o le HRPP i le lalolagi. O le Malo leni ua matua i upufai o Malo, ua lava le silafia ma le tomai e na te faatonu folau ai le sa o Samoa. Ioe, e le taua upu ma tala, ae tautala galuega ua faatino.

Lau Afioga i le Fofoga Fetalai, ae e le i faaiuina le lauga, ou te fia fonu faapipii i le faafetai momoliina atu i le Afioga Leaupepe Faafisi, lou uso a Minisita ia Tuitama Leao Dr.Talalelei Tuitama, faapea sui usufono mamalu uma o le Palemene ua faailoa mai lo outou faamoemoe, e le toe auai i sailiga tofi i faiga filifiliga a le atunuu ia Aperila. Malo le tautua, faafetai mo la outou auaunaga ia Samoa, e ala i le valaauina.

E faapitoa lau faafetai i le Minisita Lagolago o leni Matagaluega, lau Afioga Mulipola Leiataua Laki. Faamalo le tautua, faafetai mo galuega uma.

Afioga Sulamanaia Fetaiai Tauilili Tuivasa: Lau Afioga i le Fofoga Fetalai, pe maua se avanoa ona o lea e matau atu o le a see i fanua le sa, ae e i ai le mea taua sa taua i le lauga a leni itumalo faamolemole.

SUI FOFOGA FETALAI: Faafetai, ia tuu atu le avanoa, saunoa le sui usufono mamalu.

Afioga Sulamanaia Fetaiai Tauilili Tuivasa: Masalo e momoli le agaga faafetai i le Minisita o Tupe. Sa i ai i le lauga a leni sui usufono na fai i le Tala Faaopoopo lea o le Tupe, sa taua ai nai faamanuiaga mo Pulenuu. Sa matau foi ma le totoa i le tulai mai o le Minisita ma tolaulau le tele o taiala ma mea o lo o faatinoina i totonu o lana Matagaluega, Matagaluega lea o Tina ma Tamaitai.

Ae o le agaga na ou tulai atu ai i le Tala Faaopoopo lea sa ou lauga ai, pe i ai lava se ponesi mo nai Pulenuu uma o Samoa e matau pe na o se 400+ ia Pulenuu. E pei o le ala lena na ou tulai atu ona o lea o le a foi i fanua le sa o le Minisita, ae le o afea... silasila foi lau Afioga i le Fofoga Fetalai, o nai Pulenuu i leni taimi o le Koviti ma le... o lo o tua i ai le atunuu. O lo o tua i ai e le gata o Pulenuu Tama o nai Tina, tele o galuega fai i totonu o afioaga. O i ina lea e malu ai lo tatou atunuu. Ae e leai lava ma se mea o afea ai, i leni foi tulaga i le faamai lea ua i ai.

O le isi tulaga na aumai foi le tuualalo a nai Pulenuu, silasila foi e 2 vaiaso lea e maua ai le... ae e pei e faapitoau lava ma faapito le tula i le totogi o Pulenuu i le totogi o Tama. O lea la sa aumai foi le tuualalo a nai Pulenuu, e a pe a faatutusa? Ona e tutusa lelei lava a

latou galuega e fai. Ia ae o le tatalo sa ala atu i le Minisita o Tupe, ia pe le o vaai ifo aua o lea e matau foi lenei sui usufono, i le Tala Faaopoopo lea ua ou vaai ai, lea ua toe faafoi i totonu foi e lenei foi Vaega Faaupufai seleni ia na aumai ai. Faafetai atu ai i lenei Vaega Faaupufai.

Ia pe le i afea ai se faamanuiaga mo nai Pulenuu Tina ma Tama po o Sui o Malo ia e tua i ai ia lo tatou Malo ma lo tatou atunuu i totonu o Pulega a Alii ma Faipule. O le agaga lau Afioga i le Minisita...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai...

SUI FOFOGA FETALAI: Ia lea ua maua le faauilavea, saunoa mai le Taitai o le Malo.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: O ituaiga mataupu faapenei, e tagofia loa mea o alauni, e alu faatasi uma lava. Ma sa tatau ona aumai le fesili i le Minisita e faafeagai tonu ma Pulenuu, aua e le mafai ona tagofia, e laa mai fua le isi Minisita, e lote mataupu a le isi Minisita.

Ia o le tulaga lena a oo lava ina tagofia loa alauni o Pulenuu ma Komiti, e alu faatasi lava. Ia ne i te i ua e manatu i le Palota, ua atili ai ona le talafeagai le tope o ni mea i le taimi nei. Ia ae talosia ia se i uma le palota, ia ona tilotilo lea i ai faatasi uma lava ma Komiti uma lava a le tatou Malo. E faapena ia faiga faavae. E lote loa se alauni o se vaega se tasi, ia tau fai tilotilo uma aua e le na o le tasi se Komiti. E tele mau Komiti.

SUI FOFOGA FETALAI: Ia, malie ia le sui usufono o lea ua uma atu le tali atu atoa o le mataupu.

Afioga Sulamanaia Fetaiai Tauilili Tuivasa: Ia e pei o le agaga lena sa tatau lava ona tali mai le Minisita. Ae e le o amanaia e le Minisita aua foi o la o le a uma foi lana ia vaitaimi. Ae o le saunoaga a le Palemia, e leo le Palota lea, o se manuia aoao o Samoa lea e tulai ai le sui usufono.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, o le tulaga ia e pei ona ou fai atu, o ituaiga

mataupu lenei e tagofia loa mea ia, e le faapitoa na o se vaega e tasi. Aua e te tapa loa i le isi, amata ona fesili mai isi.

O le ala lena e mulimulitai lava ia lo tatou Malo i faiga faavae, ia aua ne i tasii isi ae faasavali isi.

SUI FOFOGA FETALAI: Faafetai, masalo lea ua manino auofala i le mataupu lea.

Afioga Hon Tuitama Talalelei Tuitama: Lau Afioga i le Fofoga Fetalai, leaga lea ua pei o lea ua agai mai ia te au le sui usufono. Ma e le toe faasili foi se leo o lea ua saunoa le Taitai o le Malo, o le tali foi lena o le mataupu lea.

Ia ae onosai, aua e te popole o lea ua uma ona i ai faiga faavae, ua uma ona faataotooto e lo tatou Malo mo le faatinoina o tulaga ia. Ia ae mo lenei taimi, ia o lea o le a ou alu e sauni mai i tua ia... lea e i ai mea faipele ia e i tua o le taavale... ia ma le faaloalo.

SUI FOFOGA FETALAI: Tapa lau Afioga i le Minisita o Tupe faamaea mai le saunoaga.

Afioga Hon SILI EPA TUIOTI: Lau Afioga i le Fofoga Fetalai, ia o lea sa tau molimoli atu le faafetai ma le faamalo i lau Minisita Lagolago, le Afioga ia Mulipola Leiataua Laki. Faafetai mo galuega uma, o matou moomooga ia agalelei le Atua i lou valaauina, i nisi foi tiute o le a e auauna ai i lo tatou atunuu.

Lau Afioga i le Palemia o le agaga faafetai e fia faaleoina. Faafetai mo le faatuatuaga e tautua ai le Faasaleleaga Nu.1 i totonu o lau Kapeneta i le tofiga o le Minisita o Tupe. E momoli atu foi lau faafetai ma le faamalo i Faauluuluga o Pulega ma le aufaigaluega o Matagaluega ma Faalapotopotoga a le Malo o lo o i lalo o lau vaaiga. Faamalo le galulue, faafetai le tautua ia Samoa. Ia faapena foi ona momoli atu le faamalo ma le faafetai i Faauluuluga o Matagaluega ma Faalapotopotoga a lo tatou Malo, malo galulue.

Ia ona ou oo atu lea i si ou itumalo lau Afioga i le Fofoga Fetalai. Ia ae e le i oo atu se tala i si ou itumalo faapalota o Salelologa ma Tafua, ou te muamua lava ona tapa tulia i le tata, ae a le Viiga ma le Faafetai i Le Atua, ona o lona alofa taumulimuli i aso e tele, mai i lenei 5 tausaga o le a mavae atu. Faamalo i la outou tapuaiga, ua malietoa ua malotau, malo le finau. Ave laia o le faamua i Le Atua, aua o Ona aao lava sa faamamalu, a o alofaiva le Palemene i ana Fonotaga. Ua le afe ai se Atua o le ala, o lea ua fulifao le vaa o mala, aua ua le o se poto po o se malosi, foi laia o le Viiga i le Atua nei ma e lua.

E momoli atu le faafetai i aufaigaluega i Susuga i Faafeagaiga ma outou faletua mai i Salelologa, ia faapea foi Tafua. Ua faamalo tatalo ua manuia ai faiva, ona o la outou tapuaiga e ala i talosaga molia. E le faagaloina le tapuaiga ia te oe Lologanapule, aua le Afio ia Tia ma le Aiga Saluamanuvae, faapea foi oulua Matua. Susu Sua Maopu o le Nafanua, Susu Tiimalu faapea Saunoaimalu faapea foi le Matua. Susu le Fuaiala o le malelega a Malietoa Papalii, Seiuli ma Galumalemana, Alaalatai lau Tofa i le Tuua, ma lo outou Falefia, faapea foi le Fale Salafai, o le Lologanapule ma le Faitoaga e te manino lave i ava.

E manatua foi le tapuaiga a si ou nuu o Tafua, aua le Afifio o Faasisina ma Alaala i Matuatala, faapea lo oulua sa seelua lau Fetalaiga Ulu, le Maota faapea foi le Toiloto. Ua faamalo lo outou tapuai e la i lo outou po le fala ma feula le mulila, aua sa tuu i le lagi ia outou faiva tapuai. Ua malie le papaigalagala, ua malie foi le faatolotologatama.

O lea ua taoto le tele o atinae, ua mafai ona faatino i totonu o le tatou itumalo i le tausaga 2016 e oo i le taimi nei e aofia ai le fausia o auala galue i matoa ma laoa, faapea faatoaga ma isi atinae. O le faaleleia o le suavai ma eletise i maota ma laoa, toe tatalaina o le malae vaalele i totonu o lo tatou itumalo, mo femalagaiga i Savaii ma Upolu faapea fuafuaga mamao mo Amerika Samoa ma isi atunuu o le Pasefika i le lumanai.

O le fausiaina o le Ofisa fou o le NPF e le gata ina faa-faigofie atili ai manaoga o lea auaunaga, ae maua ai foi auaunaga a fanau a Salelologa, faapea fuafuaga a le Malo toe faatulagaina o le taulaga i Salelologa, o le laumua o si o tatou motu i Salafai. O lenei fuafuaga ua tapena i ai Matagaluega ma Faalapotopotoga a le Malo, ua tofofi e le Kapeneta e gafa ma lenei galuega, lea e aofia ai le faatuina o se maota tutotonu o le Malo e maua uma ai Matagaluega ma auaunaga eseese a le Malo, ma le toe moomia ai le faimalaga mai i Apia mo nisi o auaunaga a le Malo e moomia mo aso uma.

Ua i ai foi tapenaga a le Malo mo Aoga Tulagalua a le Malo i Salelologa lea ua i ai le faamoemoe, e toe siitia mamao ese mai le sami mo le saogalemu, aemaise le siitia maualuga o fuainumera o le fanau, ua aoaoina ai i le taimi nei ma moomia ai auaunaga uma e pei ona faatulaga mai e le Matagaluega o Aoga.

Lau Afioga i le Fofoga Fetalai, ia ou te toe faatepa le mamalu o le Palemene aemaise Samoa o lo o tapuai i nisi o Sini Autu sa faavaeina ai le Tala o le Tupe a le Malo i totonu o le 5 tausaga i lenei Paeaiga. E le tau faailoaina, o Samoa e itiiti ana punaoa o lo o faamoemoe i ai le tamaoaiga o le atunuu, aemaise atinae e tele e fia faatino, ma moomia ai tupe mo lona atinae. O le ala lea sa faavae ai a tatou

tapenaga mo le Tala o le Tupe mo le tausaga faaletupe 2015/2016 i le Sini Autu, e fua le manao i mea o lo o tatou maua.

Mo le tausaga o lo o faagasolo nei 2020/2021, ua faaautu i le tatou lalagaina faatasi o le lumanai manuia ma mausali. A tuufaatasi nei fuaitau taua, e mafai ona o tatou faapea ifo, e ui ina utiuti ma le au le faaso a si o tatou Malo. E mafai ona tatou siitia maualuga le tamaoaiga ma ausia taunuuga silisili pe a tatou galulue faatasi. O matou upu faaiu ia, ia agalelei le Atua ia Samoa, i le atunuu a o alo atu ia le atunuu, i ana faiga filifiliga mo le isi 5 tausaga o muamua. Soifua ma ia manuia.

Na faaalua le agaga fiafia o le Palemene i le patipati o latou aao i le maea ai o le saunoaga talifuaitau a le Minisita o Tupe.

SUI FOFOGA FETALAI: Ua faamalo saunoa ua faamalo malele i lau Afioga i le Minisita o Tupe. Na o moomooga ia o le Palemene nei ma le tapuaiga a Samoa. Ona i ai lea o le manatu o lele ua e faaae i le fata, ae folasia i malae mataupu uma sa agai i ai finagalo o sui usufono mamalu o le Maota. Leai lava se vaipanoa e le i talatala, ua e tatala le faitotoa o le fale talatala nai Fogaa.

E momoli ai le faamalo ma le faafetai, malo galulue, e le itiiti lo outou sao. O lea ua faafofoga le atunuu ma le Palemene, afua mai i le tausaga 2016 seia oo mai lava i le aso, o lea lava ua faailoa mea uma. O le mea lea e momoli atu ai le faamalo ma le faafetai i lau Afioga, o lea foi ua faafofoga lou itumalo. Ia amuia lou itumalo, amuia lou itumalo, tulai mai i le Minisita o Tupe. Malo tautua malo lotonuu. O lea ua laulausasa lava ia outou faiva e le gata i lenei Paeaiga, a o lea foi ua e faailoa fuafuaga alualu mamao o le Paeaiga fou. O le mea lea e momoli atu ai le faamalo ma le faafetai.

E afe foi ia se matou tala e momoli le faamalo ma le faafetai i Ofisa Sili o Pulega o Matagaluga sa outou galulue faatasi. E le o se galuega faigofie, o lea ua faafofoga le Maota ma Samoa, tele o galuega ma atinae, afua i se a? O le alofa i le atunuu, ia faamanuia le Atua i galuega sa faatino.

Ia, e momoli foi le faamalo ma le faafetai i le paia maualuga o le Palemene, lau Afioga i le Palemia ma le Aiga Minisita, Minisita Lagolago faapea foi lea itu o le malu, Taitaifono o Komiti Tumau o le Palemene, ma sui usufono mamalu uma. Ia lea ua outou faafofoga e i ai foi taimi e siisii ai le tai, uiga na o le soifuaga e le mafai ona tuufauina tatou e le alii o le lalolagi. E ai filofilo pea i ai tatou ina ia faaleaga se mea ua lelei. Peitai ua o tatou sii lo tatou faiva o le Fonousu a Samoa i le Atua. A lea ua taumanu le faamoemoe, tetele

lava pesega ae matua i le oo. Momoli ai le faamalo ma le faafetai i a outou afioga. Malo papale, malo le tofa, ia malo foi le uta.

Ia paia e o Samoa, o lau tapuaiga e le galo. E sii foi so matou faiva ae taliu ae popoe i lau tapuaiga. Ne i mea ane ua le tau lau o le faamoemoe, na o outou filifilia ai sui usufono mamalu uma o le Palemene aua se manuia o Samoa. Faamalulu atu i la outou faafofoga ma la outou silasila. Ia ae matua atu i ina le tuu. Samoa o oe lava o le atunuu mamala. Faafetai le tapuai mai i lenei afiafi, ia o lea ua ae manu faiva o lau Palemene.

Ia, le paia e o le aufaigaluega tofoti a le Atua, fata faiataulaga e fia, ia e afe atu foi se faamatalaga faaiuga o galuega o lenei vaiaso a lau Palemene. Malo tatalo mai, ua maua le malosi, ua maua le potu, ua maua le iloa, tou te sii pea le Fonousu a le atunuu i le Atua. O lea ua manuia ai galuega o lenei vaiaso.

Faafetai i Ofisa Sili o Pulega o Matagaluega Tumaoti a le Malo, faafetai lava i lo outou taupati mai. Faailoga o le tautua matavela e le faatuaaia. Momoli atu le faamalo ma le faafetai aemaise le Matagaluega o Tupe. Faamanuia le Atua i la outou galuega.

Afe foi le faamatalaga e momoli le faamalo i lau Afioga i le Failautusi o le Fono, Sui Failautusi ma le mamalu o le Ofisa. Ua taumamafa le Palemene, ua maona ua feinu malilie i la outou tautua, ia toe faatutumu e le Atua. Faamanuia le Atua i la outou tautua.

Matagaluega o Leoleo i lau Afioga i le Komesina, alii ma tamaitai leoleo, faafetai i lenei vaiaso mo le leoina o le Maota. O la outou matafaioi lena. Matagaluega o le Soifua Maloloina ua o matou afe atu momoli le faafetai tele mo lo outou galuega. Malo le tautua Malo ia aua le saogalemu o le soifua maloloina o sui usufono mamalu uma.

Ia, ae tatou te le i tolopo ou te valaau ma le faaaloalo i lau Fetalaiga Saleaula, o oe le Tama matua, ia e te faaiuina le tatou galuega i se tatalo.

Na tolopo Taualumaga a le Fono Aoao Faitulafono i le itula e 7:05 i le afiafi seia aulia le Aso Gafua, 01 Mati 2021 i le itula e 9:00 i le taeeo.